

42383/C

NO



PUNTI, G. A.



DE VICTU
FEBRICITANTIUM

DISSERTATIO

AUCTORE

JOSEPHO ANTONIO PUJATI SACILIENSI

IN PATAVINO GYMNASIO

PRAELECTOS MEDICÆ ORDINARIÆ P. P. P.



PATAVII, Typis Seminarii MDCCLVIII.
SUPERIORUM PERMISSU.

THE NEW YORK PUBLIC LIBRARY

ASTOR LENOX TILDEN FOUNDATION

1000 5TH AVENUE, NEW YORK

1000 5TH AVENUE, NEW YORK

1000 5TH AVENUE, NEW YORK

1000 5TH AVENUE, NEW YORK

309715

1000 5TH AVENUE, NEW YORK

1000 5TH AVENUE, NEW YORK

SENATORIBUS AMPLISSIMIS
JOHANNI EMO
D. MARCI PROCURATORI,
MARCO FUSCARENO,
ET
ALOYSIO MOCENICO IV.
EQUITIBUS, ET MARCIANÆ ÆDIS
PROCURATORIBUS,
PATAVINÆ SCHOLÆ REGUNDÆ
TRIUMVIRIS

Joseph Antonius Pujati

F.



Roxime elapso Scholastico anno, SENATORES AMPLISSIMI, febres, earumque curationes agitare jussus, sub finem litterarii curriculi, hanc disputationem e loco superiore habere coeperam, sed temporis defectu præventus, totam dicere minime quivi.

Cum autem totam quidam ex meis Diligentioribus Auditoribus desiderarent, illorum cupiditati satisfacturus, eam typis edere animum induxi, ut, quam audire nequiverunt, uberiore fructu ob oculos essent habituri. Nil vero opportunius, nihilque optatius mihi contingere poterat, quam ut, vobis Patavinam simul iterum Scholam Moderantibus, ea publici juris fieret. Quatuor prope anni sunt, SAPIENTISSIMI TRIUMVIRI, ex quo per vos in eodem AMPLISSIMO MAGISTRATU constitutos, ipse, novus homo, nihilque tale, non modo sperare, sed ne optare quidem audens, Primarius Medicinæ Practicæ Professor in Alma hac Universitate designatus sum, ac, Vobis de me benignissime referentibus, Munificentissimo AUGUSTI SENATUS VENETI decreto, e nivosis Rheticarum Alpium latibulis, in hanc hominum, litterarumque lucem, atque in locum honoris, dignitatisque plenum deductus sum. Favor vester omnibus, qui Professorio munere decorantur, summus, mihi autem singularis, ac prope Divinus habendus, a me flagitabat, ut quantocius devotissimi, atque ad

rogum

rogum memoris animi signum aliquod publicitus darem. Cum igitur ob eam, quam dudum attuli, rationem, Dissertatiunculam edere constituerim; mihi peropportune contigisse video, eo hanc tempore in lucem dari, quo Vos simul huic Lycæo regundo præestis: ita enim vobis, quasi totidem Numinibus Servatoribus, muneris mei primitiis litari posse arbitratus sum. Neque a proposito doni exiguitas me abduxit: Magnanimi enim Homines, qui beneficiis, & benefaciendi voluntate Deos æmulantur, vel tenuissima clientulorum dona, ubi ea præsertim grati animi inditia præsetulerint, & æqui bonique facere, & ferre, hilarique vultu suscipere consueverunt. Quid autem, quod eorum meritis, & Amplitudini paria offerri minime queant? Porro vos (finite, quæso, me pauca, modestia quoque vestra averfante, subjicere) ob Majores vestros Magni: ob animi autem Magnitudinem, integritatemque: ob summam Prudentiam, Sapientiamque: ob quæ in bonum Reipublicæ domi, forisque gessistis: ob Dignitates, Auctoritatemque jure merito acquisitas, Maximi; eo in loco constituti

estis, ut vobis, nisi quæ a vobis distent quamplurimum, ab nemine tribui possint. Eo, itaque, tantum animo Opellulam hanc Nominibus vestris inscribere ausus sum, ut, non modo presentibus, verum, si forte fortuna ad eos pervenerit; venturis quoque hominibus, & Eximii Favoris vestri testimonium, & gratitudinis, obsequii, voluntatisque in vos meæ pignus, certissimumque Monimentum existat. Non possum autem, quin spe læter, qua estis Humanitate, & Magnanimitate, vos facile laturos, eam Patronis iisdem, Mecenatibusque gaudere, quos, bonis avibus, Parentes quodammodo, Auctoresque sortita est. Pluribus vos non distinebo, TRIUMVIRI SAPIENTISSIMI: addo tantum: qualiscumque in hominum judiciis dissertatio hæc futura sit, eam in commodum, utilitatemque Discipulorum, qui vobis cordi adeo sunt, elaboratam, editamque fuisse. Valete.

Dabam Patavii. Idibus Januar. Anno Salutis
MDCCLVIII.

A U-

A U C T O R LECTORI BENEVOLO

S.



Uidam summi ingenii, acerrimique judicii vir, B. L., optime cum rebus humanis actum iri putabat, si quædam, sine quibus hominum Societates stare non possunt, post emensa non paucorum annorum spatia ad sua primordia iterum reducerentur. De sententiæ veritate ipse nequaquam pugno, sed mihi persuasum habeo, rem in maximum commodum Medicæ Facultatis cessuram, si ad artis scriptæ principia, atque ad suam primævam simplicitatem Medicina retroduceretur. Cum enim hoc in casu, puris, atque ab ore, ut ita dicam, ipsius Naturæ susceptis observationibus, haud sane omnia, quæ a posteriorum hominum industria inventa dicuntur, sed quæ ex iis tantum pro veris habentur, adjici possent; tunc minus, quidem, supervacuis ornamentis luxuriantem, sed necessariis, solidioribusque adjumentis suffultam medicinam haberemus. Verum, ut in primo casu maxime verendum, ne morbis, quibus Societates affliguntur, pejora remedia forent: neque enim sine maxima rerum omnium perturbatione, & summa vi, sive bona, sive mala, quibus assuerunt, deserere, & moribus, legibusque obsoletis se se submittere vellent homines: neque, ut illi quidem præsentium præjudicio occupati regerent, post inventas fruges, vellent iterum ad glandes redire: sic in altero vehementer timendum esset, ne loco a-
licu-

licujus medicinae ; qualiscumque sit , quam habemus ; nullam haberemus . *Votis itaque , & paucorum solummodo desideriis prætermisissis , non inutile ipse puto , iis , qui medicinam ingrediuntur , medendi vias , quas prisca homines , artisque exordiis proximiores institerunt , saltem ostendere ; ut videant , & aliis , quam quibus itur , progredi posse ; nec putent , ea tantum eundum esse , qua securissimos difficultatum currere quosdam e recentioribus vident ; & si velint , dum opportunitas dabitur , unam methodum alteri conferre , quæque potior , commodiorque videbitur , eligere queant .*

Circa eam Praxeos partem , quæ victu , & alimonie administratione febres curat (quod non modo apud saniores Medicos , sed etiam apud reliquos homines , qui communi sensu haud plane carent , pro præcipuo artis auxilio semper habitum fuit) id Auditoribus meis , Dissertatione hac illis elaborata , & in eorum gratiam , commodumque edita , præstare annisus sum . Quo autem successu , id tuo , B. L. , iudicio relictum . Alicui tamen supervacuum videri poterit , me de argumento , quod tot Scriptorum calamos exercuit , atque ab ipso annorum pondere protritum est , plura verba fecisse . At qui Tironibus instituendis qualibet in facultate student , vetusta , sæpiusque scripta , & agitata prætermittere minime possunt . Si febrium curationes absolvendæ mihi erant , de victu quoque , quo illis succurritur , agere debebam . Quod profecto præstari non poterat , absque eo quod recocta crambe Discipulis apponeretur . Ea tamen illorum gustui recoctæ sapore displicere haud potest , quoniam non alias illam degustarunt . De sæpissime repetitis in hac Dissertatione verba , utique , fiunt ; sed iis , & quædam nova ab Clariss. viris inventa ; & principia quædam , ut ut maxime obvia , aut non observata , aut non exculpta inserun-

seruntur ; & ratiocinia , ab obviis licet deducta , non tamen trita insperguntur ; & quedam accuratius perquisita , & examinata miscentur , quæ vetustioribus quoque , aliquam novitatis speciem dare queant . Quod sentio , fateor : sic vetera , & trita me condidisse mihi adblandior , ut situm , rancoremque minime oleant . Ideo , si animi tantum gratia , vel in arte Profectiores , Doctioresque , in hoc scriptum oculos conjecturi sint , spero , eos nequaquam ex illius lectione fastidium capturos , neque nauseabundos , postquam Dissertationem projecerint , in illud erupturos :

Occidit miseros crambe repetita Magistros.
ut ne spe cadam , utque una bene valeamus velim , L. B.



NOI RIFORMATORI

Dello Studio di Padova.

A Vendo veduto per la Fede di Revisione, ed Approvazione del P. F. *Francesco Antonio Mantoa* Inquisitor Generale del Santo Uffizio di *Padova* nel Libro intitolato, *De Vitu Febricitantium Dissertatio*, *Auctore Josepho Antonio Pujati Saciliensi MS.* non v'essere cosa alcuna contro la Santa Fede Cattolica, e parimente per Attestato del Segretario Nostro, niente contro li Principi, e buoni costumi, concediamo licenza a *Gio. Manfrè Stampatore di Venezia*, che possa essere stampato, osservando gli ordini in materia di Stampe, e presentando le solite copie alle pubbliche Librerie di Venezia, e di Padova.

Dat. li 17. Novembre 1757.

(*Gio: Emo Proc. Rif.*

(*Marco Foscarini Cav. Proc. Rif.*

(*Alvise Mocenigo IV. Cav. Proc. Rif.*

Registrato in lib. a cart. 20. al num. 168.

Giacomo Zuccato Segr.

Adi 29. Novembr. 1757.

Registrato nel Magistr. Eccellentissimo degli Esecutori contro la Bestemmia.

Francesco Bianchi Segr.

*Debent enim , arbitror , ædificiis fundamenta jaci firmà ,
& scaphis poni idonea Carina , si quid ædificandorum ,
pangendorumque in iis futurum est firmum . Ubi enim
prima ipsa basis , ab initio , natura debilis fuit , qui
fieri potest , ut quod superextruxeris futurum infirmum
non sit ? (Galen. 11. method. c. 13.)*

*Stulta hæc invidia est , cui cuncta recentia fordent :
Invida stultitia est , cui nova sola placent .*

(Owen. Epigram. l. 3.)



DE VICTU
FEBRIENTIU
DISSERTATIO.



Ebrium curationes prosequuti sumus , sed nondum de præstantissimo febrium omnium remedio diximus . Hoc febrientibus suppeditat ea victus rationis pars , quæ ad alimoniam , cibumque febricitantium pertinet . Quantum reliqua artis auxilia hoc antecellat inde colligite , quod cum per se plurimum possit , sine eo quidquid vel efficacissimum in arte est , parum omnino valeat . Utque vobis persuasum sit , nos de re Medico scitu apprime necessaria , ægrotantibusque utilissima agere ; sciatis & vetustissimos , cla-

A

rissi-

(II.)

rissimosque cujuscumque medicæ Scholæ Magistros ; & Doctiores ex iis , qui postea subsequuti sunt , huic Medicæ Praxeos parti , ut præstantissimæ , utilissimæque semper plurimum tribuisse , eique excolendæ sedulam operam assidue impendisse . De hac igitur acturi , solitum morem , quo in reliqua Praxi tradenda usi sumus , servabimus . Universam scilicet de febricitantium victu doctrinam elementarem , cum primis , in modum trademus , & quid hac Dissertatione præstare nobis præcipue constituerimus proponemus : tum , quæ circa Doctrinam traditam , & quæ proposuimus , obijci possunt , difficultates enodabimus ; solidiora deinde principia , quibus febricitantium diæta regi debeat , exponemus : quæ fusiore explicatione egent , neque obscure , neque inepte explicare conabimur ; ac tandem generatim agitata ad particularia trahentes , singulis febrium generibus , quæ cibi victusque ratio conveniat , designabimus .

Porro , nisi judicando fallor , nullam faciliorem , planioremque hujusce Tractationis Institutionem vobis tradi posse reor , quam si historiam Praxeos ab antiquis in alendis febricitantibus servatæ contexam , ac Fontes unde eam hauserim , digito quasi commonstrem , rationesque insuper addam , quibus Prisci medentes eam firmabant , aut sibi firmare videbantur . Ac quamvis Praxis hæc nostris temporibus superstitionior , ut ita dicam , videri possit , neque is ipse sim , qui eam ad amissim servari debere contendam ; nihilominus cum & ab observatione exorta sit , & observationibus superextructa ; ea semper erit veluti Basis , & fundamentum eorum , quæ de alimonia febrici-

bricitantium a Medico tradi possint : via hac igitur ingrediamur

I.

I. **V**etustissimi Medicorum, qui artem scriptis ornarunt, auxeruntque, morbos, cum primis, in Acutos, & Chronicos divisere; scilicet, in longiores, atque breviores: qua universali, & præcipua divisione febres quoque comprehenduntur, quarum aliæ Chronicæ, aliæ acutæ sunt. Quamvis tamen nomen hoc *Acuti* nomini *Chronici* oppositum spatium solummodo, & brevitatem morbi, ac celeritatem, qua morbus movetur, progrediturque significare videatur; nihilominus ex *Acuti* nomine ea in nobis idea exurgit, ut non solum concipiamus morbum celeriter se se moventem, progredientemque, sed qui suo citato motu & graviora, & periculosiora symptomata secum ducat. Hæc morbi acuti idea, præterquamquod passim obtinet, nobis ab Hippocrate & Celso proponitur; quorum primus (a) eam sic delineavit: *sunt autem acutissimi, & maximi, & gravissimi morbi, & maxime lethales in continua febre*: quibus verbis non modo morbi brevitatis, sed gravitatis quoque, & discrimina enuntiantur: alter vero (b) morbi acuti characterem ita pinxit: *ubi sine intermissionibus accessiones, & dolores graves urgent, acutus morbus est*. Illa igitur acuta febris est, quæ sine intermissione cum gravioribus symptomatibus cito ad bonam, vel malam ju-

(a) 6. Epid. Constitut. temp. 3.

(b) 1. 3. c. 2.

(IV.)

dicationem, exitumve perducitur: ita tamen, ut ad acutiem febris dimetiendam potius celeritas febrilis motus, quam symptomatum sævities faciat, cujus magis est morbi vehementiam, gravitatem, & pericula significare, necnon ægritudinis mutationem, exitumve præmonstrare.

II. Sed quia febres, aliique acuti febriles morbi æque acuti omnes, scilicet, æque breves non sunt; ex Praxi ipsa, & observatione morbos acutos quadri-fariam dividere. In acutissimos, quos perperacutos Barbari dixerunt Medici; in brevissimos scilicet: in acutiores, seu peracutos: in acutos simpliciter; atque in acutos ex decidentia, seu permutatione, vel degeneratione. Acutissimi, & perperacuti sunt, qui circa quartum diem judicantur: acutiores, seu peracuti, qui judicantur circa septimum: simpliciter acuti, qui circa decimumquartum, aut vigesimum (horum primos dixerunt quoque acutos exacte, postremos non exacte acutos) qui vero post vigesimum, ad quadragessimum usque cum febre continua trahunt, acutos ex decidentia vocavere. Ab hoc termino, quæ continuant febres, & morbi, Chronici audiunt.

III. Ne tamen in terminis, idque sub ipso Dissertationis limine, hæreatis, explicanda vox illa est *judicantur*, qua usus sum, quæque sæpissime a Medicis, præsertimque ab Hippocrate, & Galeno usurpatur. Putavit Hippocrates, deductique ab eo viri, dari nobis insitam facultatem quandam, quam *Naturam* appellare plerumque consuevit; morbos autem nihil aliud esse, nisi hujusce Naturæ laborem & pugnam, qua malos succos, vitæ sanitatisque infestos

hostes

hostes expellere tentat . Ex hac pugna vel Natura omnino victrix de morbo triumphat , vel contra eum superior solummodo evadit , vel morbus Naturam vincit prosternitque , vel eam modo debilitat , atque frangit , vel in alium morbum mutatur . Dum pugna ea pugnatur , dictique incidunt casus , necessario mutationes quædam in morbis apparent , quæ *judicia* vocari consuevere , ac Græco nomine , longo tamen usu Latio donato , *Crises* , quia ex iis de statu Naturæ , morbique judicium Medicus pugnae observator , & veluti iudex fert . Ita ipsemet Hippocrates (*a*) *Porro judicari in morbis est , cum morbi augeſcunt , aut marceſcunt , aut in morbum alium mutantur , aut deſinunt* . Dummodo vos non fugiat , quod nequaquam fugere poteſt , morbos , ſcilicet , deſinere , & cum Natura vincit , ægerque ſanatur , & cum Natura vincitur , ægerque perit ; videbitis Hippocraticam ſententiam quinque a me reſenſitos judicationis , ſeu Criſeos modos complecti . Quæ tamen ſententia ut plane intelligatur , neceſſe eſt iis animum adhibere , quæ ſuper ea egregie animadvertit Martianus : (*b*) ſcilicet , nequaquam pro morbi augmento hic intelligere Hippocratem tempus illud particulare , quo morbus adoleſcit ; ſed cum augeatur in malitia ; ut , ſi e ſalutari periculofus , atque e benigno malignus fiat . Sic e contra , haudquaquam marceſcere cum declinat ; tunc enim , ut plurimum judicatus eſt ; ſed quando illius ſævitia tollitur , atque ex lethali ſalutaris , & ex vehementi lenis efficitur . Quoniam vero mutationes iſtæ aliqua cum eva-

cua-

(*a*) text. 8. de affectionib.(*b*) ad eum locum

evacuatione plerumque fiunt , ideo evacuationibus istis judicationis , & Criseos nomen inditum est . Quin Galenus (*a*) illas quoque perturbationes , quæ evacuationes hæc præcedere solent , judicationis , & Criseos nomine comprehendendas docet .

IV. Hisce provisis , ita victus rationem ad febres prisce Hippocratis Sectatores coordinavere , ut & illam , quemadmodum de morbis acutis eos fecisse diximus , quadrifariam diduxerint . Scilicet in extreme tenuissimam : in tenuissimam non extreme : in simpliciter tenuem ; ac tandem in plenam . Victum extreme tenuissimum omnimoda abstinentia constituebat . Tenuissimum , sed non extreme , usus melicrati (misturæ , nempe , aquæ & mellis , quam hydromel quoque dicimus) Oxicratum (mistura scilicet aquæ & aceti) & succus Ptisanæ , seu Ptisana colata , seu Ptisanæ Cremor (omnibus hisce nominibus significatur illud edulii genus , quod *sugolo d' orzo* dicimus) circumscribebant . Victus tenuis in Ptisana integra , & non colata , in hordeo nempe , stabat ; ita tamen , ut Ptisana hæc ad Victum quoque plenum pertineret , sub quo ova , alica (de hac alio loco) & pisces saxatiles ægro concedebantur . Videte , si vultis , hac super re cum primis Galenum (*b*) Heurnium (*c*) Rodericum a Fonsæca (*d*) unum ex meis decessoribus , Sanctorium (*e*) atque alios .

V. Diversæ istæ Victus rationes aliis quoque nominibus

(*a*) I. de Crisib. I.

(*b*) Com. I. aphor. 4. & Com. I. de victu acut.

(*c*) ad aphor. 4. I.

(*d*) De febr. acut. & pestil. remed. ubi *de cibi quant.* & Com. ad 4. aphor. I.

(*e*) Ibid.

(VII.)

minibus enuntiari apud antiquos solebant. Eas dixeret *potus*, *sorbitiones*, *cibos*. Potus spectant ad victum tenuissimum non extreme, quia Melicratum, Oxicratumque victus hujusce materia, potantur. Sorbitio quoque huc referenda est, quia Ptisana colata, seu Cremor hordei, neque manditur, neque potatur, sed absorbetur. Cibus vero, quia neque potatur, neque sorbetur, sed manditur, de victu pleno dicitur, & aliquo modo etiam de simpliciter tenui. In hoc enim Ptisana integra, seu hordei grana dabantur, quæ aliquousque mandenda sunt; atque in pleno, & Ptisana, & alica, & pisces saxatiles, qui dentium molæ, & attritui sunt subjiciendi. Ne putetis tamen hoc in rigido sensu cibi nomen semper assumptum fuisse. Cum alia nomina *potus*, & *sorbitio* iis quæ manduntur tribui recte non possint; cibi nomen utpote genericum, & potui, & sorbitioni antiquiores aliquando dedere. Sed unum, antequam ulterius procedamus, animadvertite: non ratione quantitatis, sed qualitatis tantum, ab iis cibum dictum tenuissimum, tenuem, vel plenum. Cibus potest esse tenuis, & copiosus: plenus, & paucus. Qualitas cibi, a natura morbi; quantitas autem a viribus cum primis, tum ab ætate, a regione, ab anni tempore, & a consuetudine ipsa determinabatur. De cibi quantitate, ita Hippocrates (a) *Et quibus semel, aut bis, & quibus plura, an pauciora, & per partes oporteat afferre considerandum. Condonandum autem aliquid tempori, & regioni, & ætati, & consuetudini.*

VI. Ptisana ἀπὸ τῆς πίσης, a pinfendo nempe dici-

(a) 17. aphor. 1.

(VIII.)

dicitur. Quod nomen omnibus granis e frugibus fic-
cis, commune, quia pinfuntur; cum sine ullo addi-
to dicitur; antonomastice hordei grana significat.
Quanti fieret hordeacea Ptisana apud antiquos meden-
tes, inde noscere quisque potest, quod non modo ea
passim uterentur, sed etiam Galenus de ea libellum
composuerit, illiusque conficiendæ universum artifi-
cium diligentissime prosequutus fuerit. Nostri tempo-
ribus hoc nomine abutimur, ac quasdam decoctiones,
Ptisanas vocare solemus.

VII. Ne putetis tamen utilissimum hoc acutis mor-
bis edulium, neque illius cremorem, neque cremo-
rem alicæ, alicamve ipsam, neque panem lotum
(hoc etenim quoque aliquando utebantur) juri ali-
cui e carnibus veteres incoxisse: omnia hæc ciba-
ria ex aqua tantum parabant. Condiebant autem
(Ptisanam saltem, de reliquis enim non habeo quid
affirmem) condiebant, inquam, Ptisanam, ut gratior
ægotantibus evaderet, oleo, aceto, sale, anetoque.
Dum coqui incipiebat, acetum & anethi modicum
illi addebant: postea, parum salis, & olei. Videtis
ex hisce, quæ fuerit antiquis ex Hippocratis schola
materia victus in acutis febribus; utque ab eâ quid-
quid ab animalibus sumitur, acutis ex decidentia
exceptis, excluderent.

VIII. Diversis autem hisce victus rationibus ita
utebantur. Morbis perperacutis, iis nempe, qui sta-
tim in vigore sunt, quique circa quartum diem ju-
dicantur, victum extreme tenuissimum, omnimodam,
scilicet, abstinentiam præscribebant. Quod si eam æ-
ger aliqua de causâ ferre non posset, potus, aut
forbi-

forbitionem ei concedebant, Melicratum nempe, aut Oxicratum, aut Ptisanæ Cremorem. In peracuto morbo, qui ad septimum trahere solet, victus erat Melicratum, Oxicratum, Ptisanæ Cremor. Si hæc parum ægrotanti forent, aut copiosiore Cremoris quantitate, aut Ptisanam integram in pauca quantitate dabant. In acutis autem simpliciter, qui ad decimum quartum, vel ad vigesimum usque perdurarent, tota integraque Ptisana utebantur. In iis tandem, quos acutos ex decidentia vocabant, ægros alebant, non modo Ptisana eadem, sed alica quoque, ovis, & saxatilibus piscibus. Atque hæc quoad rationem victus acuti morbi generi convenientis.

IX. Non solum tamen acuti morbi genus quam diligentissime distinguere satagebant, ut aptam victus rationem instituerent; sed attentissime quoque morbi tempora considerabant, tum universalia, tum particularia. Ad universalia morbi tempora quod attinet, nil magis Cordi illis erat, quam exordiente morbo prænoscere, quando morbi status, seu summus morbi vigor futurus esset; tuncque si ægritudo ex iis foret, quam trahere longius posse conjicerent; sub iniitiis copiosius, pleniusque ægrum alebant, circa vigorem deinde, & in vigore ipso cibum ei detracturi. Ad tempora vero morbi particularia quod spectat, & in Periodicis accessionibus, & in aliis exacerbationibus non Periodicis, ab alendis ægris abstinebant. Haud ita tamen ratos, firmosque Canones hosce esse volebant, ut cum opus esset, iis aliquando non derogarent. Occasio autem iis derogandi erat ætas, anni tempus, regio, consuetudo, atque ægri

peculiaris temperies, quam idiosyncrasia nomine significabant. Ideo hieme copiosius, quam æstate; juvenes plenius præ senibus alebant; in regionibus frigidis minus parci erant, quam in calentibus; atque erga edaciores liberalius se se gerebant, quam erga minus edaces. Ne putetis tamen, ut ut a sancitis regulis aliquando recederent, plurimum eos recedere suevisse. Tota illorum indulgentia in eo sita erat, ut, vel quantitatem cibi augerent, vel perfectæ abstinentiæ loco victum non extreme tenuissimum; hujus loco, tenuem; aut vice tenuis plenum ægris exhiberent: nunquam tamen ad carnes terrestrium animalium ascenderent. Quod si ii censendi sint id aliquando præstare potuisse (neque enim mihi ex illorum lectione adhucdum constitit eos præstitisse) tunc solummodo præstiterit, cum cibaria illa ægrotantes vehementer concupiscerent; cumque ex iis assumptis exiguum damnum, aut facile reparabile eventurum foret.

X. Nullus dubito, quin vobis traditæ historiæ, postremam præcipue partem, audientibus, quæ de victus ad acutos morbos sanciti administratione pertractat, animo non subierint loca, ac quasi fontes, unde illam hauserim. Credere etenim juvat vos meminisse Hippocraticorum aphorismorum, quos a clarissimis Theoricæ Medicinæ Professoribus nostris hoc anno explicatos audiistis. Igitur, ut victu extreme tenuissimo premi, atque in perfectâ abstinentia contineri debeant, qui perperacutis febribus, morbisque laborant: ut victu tenuissimo, sed non extreme, alendi sint, qui peracute solummodo affliguntur: ut non tenuissime, sed tenui-

tenuiter tantum viciſſitare iis conveniat , qui febre ſimpliciter acuta ægrotant ; ſextus , & ſeptimus aphoriſmus primæ ſectiõnis nos docent . Sextus habet : *extremis morbis extrema exquiſite remedia optima ſunt* . Extrema autem inter auxilia , victum quoque extreme tenuiſſimum , perfectam ſcilicet abſtinentiam procul dubio comprehendere , & Galeni , & aliorum expoſitorum ſententia eſt . Septimus autem ſic : *ubi igitur morbus peracutus eſt , & ſtatim extremos habet labores , extreme tenuiſſimo victu utendum eſt* . Ubi vero non , ſed pleniorẽ victum contingit adhibere , tantum cibi indulgendum eſt , quantum morbus extremis eſt mollior . In morbo , qui trahit , & morbi ſtatum præcognoſcendum eſſe , & ita victus rationem adminiſtrandam , ut ſub initiis plenius , ſub vigore autem tenuiſſime æger alendus ſit ; præter octavum , & nonum , decimus monet id aphoriſmus . Quibus igitur ſtatim morbus in vigore conſiſtit , iis etiam ſtatim tenuis victus adhibendus eſt : quibus vero poſterius debet conſiſtere ; iis & in ipſo conſiſtendi tempore , & parum ante illud cibus eſt ſubtrahendus ; prius vero plenior victus adhibendus eſt , ut æger ſufficiat . Quod de temporibus morbi peculiaribus diximus , depromptum eſt ex undecimo : *in acceſſionibus abſtinere oportet & quibus per circuitum ſunt acceſſiones , abſtinere oportet* : ſcilicet , non minus in acceſſionibus periodicis , quam in non periodicis exacerbationibus , a cibo abſtinendum eſt . De reſpectu ad ætates , ad anni tempora , ad regiones , ad conſuetudinem pertractant 13. 14. 15. 17. Ad quem poſtremum adnotandum eſt , haud ibi ſimpliciter aſſeri : *dandum ætati , conſuetudini &c.* ſed dandum *aliquid* : cujuſce limitativæ

(XII.)

particulæ nolim obliviscamini . Quamvis vobis haud generatim dixerim veteres Hippocraticos humido solum victu febrientes aluisse ; ex recensita tamen victus materia satis noscere potuistis, eos humidum cibum commodiorem acute febrientibus censuisse , de quo aphorismus 16. Vos tamen clam forte erit , unde conjecturam postremo loco propositam sumpserim ; veteres scilicet , a debito alimonix genere discedere potuisse , si id ægrotantes plurimum concupierint . Eam deprompsi ex libro *de affectionibus* (*a*) & ex sexto Epidem. (*b*) Primo loco ait Hippocrates : *quoscunque cibos aut obsonia , aut potus ægri concupiscant exhibeto , si non corpori damnum inde accessurum est* . Altero autem loco ait ægris esse gratificandum , quousque ab eo quod illis conceditur lædendi non sint ; aut si forte ab eo lædantur , damnum facile reparabile sit .

XI. Quamvis observata & facta ipsa victus rationem , quam descripsimus , & præcepta ad eam spectantia Hippocraticis Medicis subjecerint ; ne reamini tamen soli observationi confisos eam administrasse : ratione quoque observationes & facta illustrabant ; vel , si mavultis , methodum factis innixam , rationibus confirmabant , aut sibi confirmare videbantur . Censuisse Hippocratem a morbo cibum non indicari , sed a vita & viribus , ei patere potest , qui adductis aphorismis animum paulo attentius adverterit . Id vero explanatius a Galeno (*c*) habetur , qui aperte scripsit , morbum suæ affectionis auxilia indicare , alimoniam autem a virtutis custodia desiderari . Cum
igitur

(*a*) tex. 4.

(*b*) sect. 4.

(*c*) Comm. I. de vic. acut. 44.

(XIII.)

igitur alimonia a virtutis custodia desideretur; tanta desiderabitur, quanta esse debet virtus, quæ in eo morbo necessaria est. In acuto autem morbo tanta, non amplior, vis est necessaria, quanta egemus, ut vivamus: Ita Galenus (*a*) *Nam neque ut valeamus, nec ut a morbo liberemur ab ea* (a vitali nempe indicatione, de qua ibi loquitur) *quicquam primum desumimus, sed ut vivamus*. Si igitur æger ea instructus virtute sit, qua per quatuor circiter dies vivere, morbumque eo spatio finitum, ferre valeat, nulla indiget alimonia, quia nullam virtutis custodiendæ necessitas indicat. Talis æger est, qui morbo acutissimo, seu perperacuto laborat; nullo ergo ille indiget alimento, eoque in abstinentia continendus est. Ægrum autem, de quo loquimur, ea instructum esse virtute, qua per quatuor dies vivere valeat sine cibo; inde deduci cum primis potest, quod homo eam virium quantitatem in se habet, qua sine cibo plus, quam quatuor dies vivere possit; quodque nequaquam homines a productis jejuniis sæpius acutis morbis corripere soleant; sed cum eorum ventriculis, & duodeno præcipue, non parum alimentitiæ substantiæ adhuc inest.

XII. Quod si morbus, non circa quartum, sed circa septimum judicandus sit, virtutis custodia exigit, ut æger alatur. Licet enim falsum sit quod traditum est ab Hippocrate, vel ab alio, quisquis ille fuerit, qui librum de principiis, sive de carnibus (*b*) scripsit: hominem, scilicet, qui septem dies sine cibo transegisset, si etiam die octavo viveret, mortem tamen

a) 9. method. c. 13.

(*b*) tex. 12.

(XIV.)

men effugere haud posse; nihilominus, aliis considerationibus relictis, difficile admodum est, ut morbo, & vehementi quidem detentus, tot dies, & jejunus trahere, & morbum ferre, & deinceps vivere possit. Ad vitam autem eo usque trahendam satis esse veteres observaverunt, si Melicrato, Oxicrato, aut solo Ptisanæ Cremore æger vesceretur. Hæc igitur victus ratio huic morbo conducibilis putata est. Namque cum huc perventum foret, ajebant Naturam, quæ in prior morbo, scilicet in acutissimo, circa quartum diem suam vim, ut illum domaret exeruerat; in hoc circa septimum insurgere, atque e pugna, vel victricem, prostrato hoste evadere; vel morbo imparem, & frustra laborantem, ab eo viribus præpotente superari.

XIII. Ut autem bellatrix ista facultas totis suis viribus uti posset, alio e pugna revocanda nequaquam erat, idque eo præsertim tempore, quo majore nisu morbum tundere conabatur: conatur autem prope vigorem, & in vigore ipso morbi. Hac de causa cibus tunc temporis detrahendus erat, ne huic subigendo accurrens a pugna recederet, victoriamque hosti relinqueret. Ut igitur summo huic infortunio obviam iretur, & vires, quasi arma, naturæ paratæ forent, quibus in tempore uti posset, neque eas tunc sibi quæsitum, arreptumque digrederetur; plenius aliquanto æger sub initiis morbi trahentis alendus erat. Præterquam enim quod si in statu periclitanti naturæ cibo subveniretur, ea, quemadmodum dicebamus, ab incæpta pugna retrahenda erat; observatum quoque fuerat, quod habemus ex Hippocrate

(XV.)

crate (*a*) cibum , sicuti sano robur auget , ita febricitanti morbum addere . Cum autem a sanitatis statu ille minus recedat , qui a morbo inchoante occupatur , quam qui a morbo vigente , atque in statu constituto affligitur ; necessario sequi debet sub morbi trahentis exordio minus cibum morbo additamentum fieri , magis autem in virium materiam converti , quæ tempore majoris discriminis pugnanti naturæ præsto esse possint .

XIV. Nolim putetis , me , imagine hac bellantis naturæ quicquam veteribus Hippocraticis appinxisse , vel eos de natura , deque illius potentia allegorice tantum locutos fuisse . Revera hanc facultatem Præsidem nobis inesse putabant , quam aliquando innatum quoque calorem appellavere . Vires mechanicæ animatæ , quibus , & præsens sanitas conservatur , & amissa recuperatur , & per quas a salubri quoque statu corpus detruditur , si vitium cæperint , illis notæ nequaquam erant : ideo in animalis œconomiae ignorance , qua veluti caligine quadam circumfundebantur , Hypothesim de natura Præsidi sibi extruxerunt , cujus ope naturalium effectuum , plurimorumque Phænomenorum & in sano , & in ægrotante homine apparentium , rationem reddebant . Idem a posteris præstitum est , neque nostris temporibus adhucdum amor Hypothesium deferbuit . Eas repudiare nequaquam volumus , aut valemus ; cumque eas in aliis reprehendamus ; opinionum commenta , & ingeniosa figmenta , quorum ope philosophemur , nobis cudere non desistimus . Sed e diverticulo in viam .

XV.

(XVI.)

XV. Non eandem ob causam , ob quam circa morbi vigorem , atque in vigore ipso cibum minuendum præcipiebant , in accessionibus tam Periodicis , & ordinatis , quam in exacerbationibus , quæ ordinem , periodumque nequaquam servant cibum prohibebant . Id fanciebatur , ne natura tunc a morbo oppressa a cibi onere magis aggravaretur . Ita , ut alios præteream , Vallesius (*a*) *Fit accessio facultate expultrice* (facultas hæc veteribus erat unum , ut ita dicam , e naturæ brachiiis , quibus illa operabatur) *insurgente in causam morbi , & tentante expulsionem . Ergo eo tempore impeditissima est facultas committens pugnam cum morbo , quare ledetur oblato cibo* Nam præterquamquod facultas aggreditur tunc primum morbum , est calidum innatum compressum , subitque periculum suffocationis . Hæc ipse non pingo , sed Vallesius , ut certa , narrat .

XVI. Cum autem putarent cum Hippocrate (*b*) hieme calidiores esse ventriculos , quod in causa esse rebantur , ut hieme felicius , faciliusque digestio perficiatur ; ideo tunc temporis aliquanto plenius alebant . Eandem ob rationem frigidarum regionum incolas , qui plerumque stomacho magis valent , quam quibus cælum calidius est , copiosius nutriebant : contraria autem de causa aliter se se gerebant Sirio furente , & in calidioris regione . Minus quoque victu premebant pueros , quia plurimus illis calor innatus (*c*) cibos facile consumit ; contrario autem modo , ob contrariam rationem tractabant senes . Atque ab hisce omnibus præscindendo , si ægrotans dum sanus esset
cibo

(*a*) ad II. aphor. I.

(*c*) 14. aphor. I.

(*b*) 15. aphor. I.

cibo se se plurimum implere fueverat ; eum minus tenuiter , quam pro morbi ratione , ut consuetudini parerent , alendum putabant ; ut & quem abſtinentia peſſundabat (ſunt etenim homines difficulter jejunium ferentes , quos a putata intolerantiæ cauſa *πικρόχολως τὰ ἀνῶ* vocabant , ſuperne , ſcilicet bilioſos) ei , contra ac morbus , & morbi tempora flagitarent , nutrimentum præbebant , non tanti morbum , neque morbi tempora , quanti idioſyncraſiam facientes . Ita optimam Praxim , non optimis , ut plurimum , rationibus confirmabant . Sed nos nequaquam ſolliciti ut illi philoſopharentur , ut agerent conſideremus , utiliſſimo illorum exemplo proſecturi .

XVII. Eo itaque univerſa victum adminiſtrandi ratio in acutis febribus apud viros Hippocraticos veteris ævi collineabat , ut æger tantum vivere , & ſe ſuſtinere poſſet , quoad morbi ſtatus , vigorque adventarent . Ideo cum illis perſuaſum foret , animales cibos , atque e Cerealibus ipſummet triticum copioſiore vi , & alimentitia ſubſtantia abundare , quam ab acutis febribus morbiſque deſideraretur ; eos ut alienos , ab acute febrientium victu excluſere . In libro de ratione victus in morbis acutis , qui ad Hippocratem autorem refertur , panis acute ægrotanti dati mentio nunquam fit . Alii ſcriptores aliquando illius meminere : ſed illum , priuſquam eo ægros nutrent , diutius aqua lavabant , panemque lotum vocabant : qua præparatione vim panis nimium alimentitiam infringere , eumque ſic morbo opportuniorem reddere opinabantur . Hordeum itaque victus acutorum materiam præcipue fecerunt , eoque , prout morbus acutior ,

(XVIII.)

aut minus acutus foret ; vel integro , ut alias diximus , tota scilicet Ptisana utebantur ; vel illius solo cremore , & succo . De hujus alimonie commodis atque præstantia , non modo Græci Galeno juniores , sed Galenus ipse , ipsemetque Hippocrates effuse scripserunt . Cibo eodem acute ægrotantes , & æquales Hippocratis , & illius etiam superiores medicos sustinere suevisse , ex laudato Hippocratis libro de victus ratione in morbis acutis , constat .

XVIII. Sed scire plurimum præstat , victus hanc tenuitatem ad acute febrientes , nequaquam solius Hippocraticæ Scholæ Dogma , Praximque fuisse . Methodicos (fuit hæc Medicorum Secta ab Hippocratica diversa , quæ sub Autore Themisone , vel potius ab ipso Asclepiade deducta floruit , ac Romæ , Galeni tempore in æstimatione erat) Methodicos , inquam , non aliis ad acutos morbos , quam e frugibus cibis , rejecto tamen & ab iis Tritico , usos fuisse , ex Aureliano , vel si mavultis , ex Sorano , quorum uterque methodicorum dogmata sectabantur , constat . Eiusdem rei pro idoneo teste Celsum quoque habere possumus , qui quamvis in plurimis Hippocrati adhærere sueverit , in curationibus tamen ad Asclepiadem aliquando deflectit . Cum Hippocraticis hordeum in usu præcipue esset , alicam isti maxime adhibebant , quæ aliquanto valentioris præ hordeo substantiæ putabatur . Quam tamen lotam exhibendam Celsus (a) putavit eandem ob rationem , qua panem lavari suevisse diximus . At non modo carnes , quæque ad animale victum spectant , ab acute ægrotantibus arcebant ;
sed

(a) l. 3. c. 6.

(XIX.)

sed summam ad aliquot dies, exordiente morbo, abstinentiam adhibebant; eoque, ut autor est Galenus (*a*) Hippocratem, qui in perperacutis solummodo abstinentia utebatur, quique indulgentior erga ægros erat, ut nimium eos replentem accusabant. Celsus, qui, ut ante posui, Asclepiadi in curationibus favebat, loco laudato ait: febrientibus cibum ex materia quam levissima convenire, & maxime sobrietatem; eamque, si febres magnæ fuerint, quam tenuissimam esse debere docet. Hujusmodi autem cibo, ut ut tenuissimo, nequaquam singulo die ægros alendos tradit (*b*) ubi de febribus, quæ quotidie urgent pertractat; sed tertio quoque die tantum. *Igitur* (sunt Celsi verba) *tertio quoque die cibus ægro commodissime datur, ut alter febrem minuat, alter viribus subveniat.*

XIX. Vidistis, Egregii Juvenes, ut antiquiores artis magistri, diversæ quamvis scholæ, & sententiæ forent, unum tamen æque in febribus, acutisque morbis respicerent; scilicet ut tenuiter ac parce ægrotantes alerent. Ex dictis autem vos plane colligere potuistis, quam longissime non pauci ex hodiernis Practicis ab illorum Dogmatibus, & exemplis abeant, qui non solum in acutis morbis victum animale ab ægrotantibus non arcent; sed præter decocta e car-nibus sæpius die data; præter ova, cibosque Triticeos; consumatis juribus; expressis e carne succis; car-nibus contusis, nec non restaurantibus sic dictis, ægros saginare, ut ita dicam, non desinunt. Quin cum morbi acutiores sunt, cumque ægri maxime la-

C 2 borant.:

(*a*) Commen. 1. Acut. 24.

(*b*) l. 3. c. 5.

borant : nempe cum cibis illis esset extenuandus , & circumcidendus ; tunc præcipue valentioris substantiæ alimoniam eis ingerunt . Ut methodus hæc rationi , quæ sanior videtur , repugnet , atque ut ægrotis noxia sit , vobis demonstrare mihi animus est . Sed quia magni Hippocratis auctoritate illi tutari se aliquo modo credunt , quem victus plenioris amantiozem , & doctorem fuisse perhibent ; priusquam solidiora principia vobis exponam , quibus acute febricitantium Diæta regenda est ; consultum duco propugnaculum , quo se munire satagunt , diruere , vobisque clarissime ostendere , ut Hippocratica auctoritate , non modo male utantur , sed inepte abutantur .

II.

UNum tamen monendi estis , antequam in arenam descendendo . Sæpissime Hippocrates ; quamvis de rebus vulgaribus minime loquatur ; vulgari , ut ita dicam , & politico loquendi modo utitur . Præceperat in libro de vetere medicina (*a*) oportere medicum omnibus nota dicere : fere præcepto a se tradito paret : ideo nequaquam rigidus sectator illius exactitudinis , quam artis sermo desiderare videretur ; sæpius res profert , ut vulgares eas dicerent . Id autem maxime præstitisse videtur , ubi de victu ad acutos adhibendo pertractat , forte , quia non solum Medicos , sed alios quoque interesse putabat , rei summi momenti , aliquam cognitionem habere . Non ad unguem igitur accipienda illius verba sunt , sed sæpius

pius inquirendum quid intellexerit, quidque dicere maluerit.

II. Hoc præmisso monito, qui suæ indulgentiæ nimiae in Hippocrate Patrocinium quærunt, nequaquam negant aliqua in illius operibus inveniri, quæ tenuitatem alimoniae Medicos docent. Tale est illud libri acutorum (*a*) *multo autem minus ad additionem procedendum est, nam detractione omnino tollere saepe conducit, ubi suffecturus est aeger, donec morbi vigor maturescat*. Sed, ajunt, hac super re nequaquam sibi Hippocratem constantem fuisse, ac alibi docuisse (*b*) victus tenuiores acute ægrotantibus difficiles, ac periculi plenos esse; quin, subdunt, eum ex professo (*c*) pleniorum victum in acute ægrotantibus commendasse. Præter ea, quæ explicite, proposita difficultate, afferuntur, alterum, sed implicite, eadem continetur. Dum ea plenioris victus amantiorem fuisse Hippocratem traditur; clam subjicitur, victum, quem reprobo illius autoritate fulciri. Sed primum nunc missum facio, ac concedere lubet; quod tamen paulo post falsissimum demonstrabo; Hippocratem in acutis febribus tenui diætâ nequaquam usum. Nihilominus illius Patrocinio defendi posse medicos nequaquam ajo, qui febrientibus contusa, expressa ex animalium carnibus, jura consumpta, & sic dicta restaurantia exhibent.

III. Id porro demonstratu facillimum est, cum universa quæstio, & tota quæstionis vis in facto versetur. Conferenda solummodo est materia pleni antiquorum victus cum materia a plerisque nostratibus adhibita. Materia victus pleni antiquorum erat Pti-
fana

(*a*) tex. 19.(*b*) 4. aphor. 1.(*c*) 5. aphor. 2.

sana integra, alica, ova, pisces. Materia victus, quem improbo, jura consummata, carnes contusæ, expressa e carnibus, restaurantia. Vel materia hæc valentior altera est, vel facultatis ejusdem. Si valentior: ergo materia victus pleni antiquorum, hanc facultate minime æquat. Ergo in acutioribus febribus ea nostrates præscribunt, quæ non modo in acutis simpliciter, sed neque in acutis ex decidentia antiquiores præscribebant. Sin facultatis ejusdem: ecur eam præscribunt? Non ne ideo præscribunt, quia valentiozem putant? Igitur alimonia hac ægros magis nutriunt, quam victu pleno Hippocrates, & antiqui nutrent. Ut igitur exemplo, & autoritate Hippocratis tutari se posse credent, qui quamvis pleno, si ut volunt, victu febrientes aleret, non alio tamen, quam recensito alebat? Consulant, si lubet, omnia scripta, quæ Hippocratis nomen ferunt, sive genuina, sive supposititia, sive integra, sive interpollata ea fuerint: excutiant Galenum: sicubi invenerint continua febre laboranti cibum adeo alimentosum præscriptum, lubens manus do. Sin minus: fateantur, victus rationem ab iis ad acutas febres adhibitam, tantum distare a victu, non jam tenui, sed pleno antiquorum; quantum victus istorum plenus ab omnimoda abstinentia distabat. Igitur, posito etiam, Hippocratem putasse, ac docuisse, aliquanto plenius acute ægrotantes alendos esse, id favere nullo modo potest usui victus, quem improbo.

IV. Sed jam objectio ab Hippocratis inconstantia petita nobis solvenda est. Objecere itaque primo quartum primæ Sectionis aphorismum, quo Hippocrates

(XXIII.)

crates tenuem victum in acutis damnare quibusdam videtur . Prima aphorismi particula talis est : *victus tenuis , atque exquisitus in morbis quidem longis semper , in acutis vero in quibus non convenit , periculosus* . Puto , immo pro certo teneo , in hac particula nequaquam loqui Hippocratem de victu extreme tenuissimo , quem omnimoda abstinencia constituebat . Quis enim adeo stipes esse potest , ut putet Chronico laborantem morbo integra abstinencia exerceri posse , aut debere ? Fuit quidem Heraclides Tarentinus Empiricorum Clarissi . , qui quartana laborantes septidui abstinencia premebat ; at hunc binis sæculis post Hippocratem florentem , Hippocrates minime norat . Loquitur igitur de victu non extreme tenuissimo , qui constituebatur ab usu Ptisanæ colatæ , melicrati , Oxicrati . Quid vero de hoc victu , relate ad acutos morbos Hippocrates ? Eum periculosum esse , si ei acutæ ægritudini adhibeatur , cui alienus est . Quem Canonem sanxit contra Cnidios Medicos , quorum quidam , ut habetur ex ejus libro acutorum , omnes acute ægrotantes tenui ; quidam pleno ; alii vero extreme tenuissimo victu ex æquo exercebant . Potest autem victus tenuissimus morbo acuto nequaquam convenire , modo jure , modo tempore . Jure illi acuto morbo conducibilis non est , qui ad decimumquartum diem pertingit , atque adeo minus si pertingit ad vigesimum , quibus , non tenuissimus , sed tenuis victus debetur . Multoque adhuc minus si fuerit acutus ex decidentia , & ad quadragesimum protrahatur , cui victus plenus adhibendus est . Ecquis , quæso , non videt , hæc morbi genera illius tenuitatem victus nequaquam desi-

desiderare ? In hisce igitur jure non convenit , quoniam *tantum cibi indulgendum est (a) quantum morbus extremis est mollior* . Quod si idem cibus sub initiis , aut simpliciter acuti , aut acutioris , & ad septimum pertingentis adhibeatur ; tunc loco , seu tempore non convenire putabat Hippocrates , quia juxta eum , non poterat æger ita modice cibatus ad statum usque morbi pervenire ; neque vires ob tantam alimonie parcitatem fractæ , & vasa exhausta , crisin promovere , eandemque ferre poterant : *prius vero (b) uberius alendum , ut æger sufficiat* . Potest quoque contraria ex ratione in morbo exquisite acutissimo nequaquam convenire , in quo expedit ægrum extreme tenuissimo victu , omnimoda , scilicet , abstinentia cruciare . In hac igitur aphorismi particula victus tenuis ad acutos *absolute* non improbatur , sed damnatur tantum , ubi neque genus , neque tempus acuti morbi illum exigunt . Prosequamur aphorismi explicationem .

V. *Et rursus summe tenuis victus difficilis* . Hic loquitur de victu extreme tenuissimo . Ridenda enim res esset si de eodem , de quo primum locutus est , quemque , ubi non convenit periculosum dixit , nunc iterum verba faceret , & diversa traderet , dicens eum absolute difficilem , gravemque esse . Quin cum eum comparet extremæ repletioni , ut mox ; satis patet de extrema inanitione , de totali , scilicet , abstinentia loqui . Revera Leoniceni versio , quam Clariss. Bergomas Pasta recognitam , notulisque auctam utilissime exhibuit , sic habet : *qui ad extremum devenit tenuitatis gra-*

(a) 7. aphor. I.

(b) 10. aphor. I.

gravis est. Ait itaque, absolute victum extreme tenuissimum gravem, difficilemque esse. Scilicet omnimodam abstinentiam, graviter ab ægris ferri, ac difficile esse, ut eam a medico imperatam servant. In prima particula damnavit tenuissimam diætam in morbo acuto, cui nequaquam convenit; eamque vocat *σφαλερὰν*, scilicet fallacem, & deceptricem, a *σφάλω*, quod est circumvenio, decipio, fallo, ut ut interpretes verterint periculosam, quod quid majoris momenti significat: in altera, non loquitur de periculo victus exacte tenuissimi; sed Medicos absolute monet, omnimodam abstinentiam, & toleratu gravem ægrotantibus esse, & eam difficile eos servaturos. Ne quispiam de hac explicatione diversum iudicium ferat, priusquam sequentis aphorismi universam explicationem perlegerit. Huc usque igitur, neque tenuissimum, neque extreme tenuissimum victum absolute damnavit Hippocrates.

VI. Tertia aphorismi particula est: *nam & extreme refectiões difficiles sunt*. Ita versio Vallesii. Heurnius habet *renutritiões*. Cæteri melius *repletiões*. Quidam putant, atque inter hosce Vallesius, hic loqui Hippocratem de sanorum summis repletionibus, de quibus superiore aphorismo egerat sub nomine athletici habitus, sensumque esse, ut in sanis summæ repletiões a cibi copia inductæ periculo minime carent, ita ab opposita ratione, & contrariorum lege, summas inanitiões, quas abstinentia fecerit in acutis morbis, periculosas esse. Sed male, me iudice, si ad Hippocratis doctrinam attendatur. Etenim, ut argumentum valeret, inferendum esset, extremas inanitiões

semper esse malas , ut extremæ repletiones semper malæ sunt . Id autem adeo ab Hippocratica Doctrina distat , ut cum extremas repletiones constantissime Hippocrates reprobaverit ; extremas inanitiones , omnimodamque abstinentiam , ubi ea convenerit , & præceperit , & collaudarit , & adhibuerit . Ita ille septimo aphorismorum primæ sectionis : *ubi peracutus est morbus , & statim extremos habet labores , extreme tenuissimo victu utendum est* . Itidemque : *Extremis morbis , extremæ curationes optimæ* . Ad quæ Vallesius : *Afferit Hippocrates omnem curationem summam , & exactam tentandam esse , ut de summe tenui victu hoc intelligatur* . Quid , quod Hippocrates non sola victus tenuissimi ratione , sed artis quoque , tum Pharmaceuticis , cum Chirurgicis auxiliis , ubi opus erat , atque id ægrotantium vires permetterent , vasa vehementer evacuabat ? *Atque (a) ubi usque ad animi defectum expedit ducere , faciendum , si æger possit tolerare : atque alibi : & si acutus fuerit dolor (b) ducere usque ad animi deliquium* . Summæ autem evacuationis ab eo præstitæ nobis exemplum reliquit (c) ubi viro in Oeniade sanguinem se eo usque eduxisse profitetur , donec exanguem eum redderet . Igitur si Hippocrates contrariorum lege , a summa repletionem sanorum argumento ducto , quæ semper , & absolute mala est , improbare voluisset extremam victus tenuitatem , & abstinentiam ; hanc quoque absolute , & quolibet in casu damnasset , cum tamen , ut vidimus , eam ubi convenit præcipiat , atque collaudet .

VII.

(a) 23. aphorif. 1.

(b) tex. 52. de vic. acut.

(c) 5. Epid. tex. 2.

VII. Atque hæc, ni multum judicando fallor, demonstrant, totum aphorismum circa ægros versari, neque ibi de repletionem sanorum verba fieri, quæ fuit quoque Doctissimi Slani sententia. Sensus itaque totius aphorismi est: victum non extreme tenuissimum in morbis longis semper periculosum esse; nec minus periculosum in iis acutis, quibus neque jure, neque tempore convenit. Victum porro extreme tenuissimum, omnimodam, scilicet, abstinentiam, gravem ægris esse, & difficilem toleratu, quemadmodum & summæ repletiones iis graves sunt. Quod profecto, neque tenuissimi, neque extreme tenuissimi victus usus adversatur; sed commonet, iis in omnibus acutis, omnique acutorum tempore nequaquam utendum, quemadmodum quibusdam e Cnidiis Medicis in usu fuisse libro de victu acutorum tradiderat. Neque verum est Hippocratem ibi Prodicum, & Diatritarios (tertio isti solummodo die cibum ægris dare sueverant) accusare voluisse, quemadmodum a Fonsæca (a) asseritur. Quoniam de Prodico, sive Erodico, lego quidem, eum (b) exercitationibus, luctis, fomentisque febricitantes interficere suevisse; inediam autem, ut ait Fonsæca, adhibuisse, nequaquam lego. Ad Diatritarios autem, quod attinet, sive isti a Themisone, sive ab Asclepiade ipso deducantur, quemadmodum ex Celso (c) non obscure intelligi potest; Hippocratem contra illos scripsisse, qui plurimis post eum annis venturi erant, nisi eum Prophetico spiritu afflatum velimus, nequaquam dicendum est. Extitisse au-

D 2

tem

(a) ad hunc aphorismum.

(b) 6. Epid. sect. 3.

(c) l. 3. c. 4.

tem medicos , qui ad sextum usque diem ægros abstinentia macerabant ; & ipse Hippocrates aperte dixit ; & Celsus idoneus , locupletissimusque testis , loco laudato asseruit : *plerique ex antiquis tarde dabant , sæpe quinta die , sæpe sexto , & id fortasse , vel in Asia , vel in Ægypto Cæli ratio patitur .*

VIII. Sed quas putatis fuisse summas istas repletiones , quas ægris graves , difficiles , lædentes quoque , si vultis (de iis enim dicit χαλεπαί : χαλεπός autem , non modo audit difficilis , gravisque , sed etiam damnosus) vocavit Hippocrates ? Forte eæ , quæ comparantur victu , cibisque sanorum ? Haud ædepol . Constat quidem ex Galeno (*a*) fuisse Petronam , seu Petronium quemdam , qui vino , & carnibus acute ægrotantes alebat ; sed hic Hippocrate posterior fuit , ac propterea dici nequaquam potest , de hac , adeo damnanda methodo , Hippocratem loqui potuisse . Abs re nequaquam duco hic vos obiter unum monere . In indice Galeni ab meritissimo Brasavola confecto , ter Petronas iste nominatur . Bis ex libris de compositione Pharmacorum per genera : semel ex Commentario laudato super victu acutorum . In libris medicamentorum per genera , non Petronas , sed Petronius a Galeno dicitur . Cum autem ab Eruditissimo Daniele Clerico (*b*) Petronius ponatur inter Asclepiadis discipulos ; nimium profecto fuisset , si adeo a Præceptore deflexisset , ut cum iste primos dies ægros abstinentia premeret , ille carnibus , vinoque nutriret . Probabile itaque non est , Petronam unum , eundemque cum Petronio

(*a*) sup. l. acut. 13.

(*b*) Hist. med. P. 2. l. 3. c. 11.

tronio fuisse . Sed ut eo , unde digressus sum regre-
diar , agit ibi Hippocrates (vos forsitan mirabimi-
ni) de plenitudine , quam tota Ptisana ægris , qui-
bus aliena erat , inducebat . Quod ut demonstrem ,
idemmet Hippocrates cereum mihi lucebit .

IX. Textu quarto acutorum , de iis agens , quæ a
Cnidiis Medicis ignorabantur , ait : *Cur nam in acutis
morbis aliqui medici omne ævum terunt Ptisanas non cola-
tas exhibentes , & recte se mederi putant ? Aliqui vero
plurimi faciunt , ut nullum hordeum æger devoret , magnum
enim afferre detrimentum arbitrantur , verum per linteum
excolantes succum exhibent . Quidam vero ipsorum , neque
Ptisanam crassam dederunt , neque succum , atque , partim
donec ad septimum diem perveniat , partim vero perpetuo ,
donec judicatus fuerit morbus .* Hic si memineritis , quod
in dissertatione Elementari vos monui , Galenum to-
tam Ptisanam , non minus tenui , quam pleno victui
ægrotantium dicavisse ; videbitis Hippocratem aperte
loqui de quadruplici victu diversis acutorum generi-
bus accommodato : de pleno , scilicet , tenui , tenuis-
simo , & extreme tenuissimo . Hippocratem vero exi-
stimasse a tota Ptisana aliquando ægros nimium im-
pleri , ex textu septimo libri ejusdem palam fit . Ibi
postquam , & de confectione Ptisanæ , & de illius vir-
tutibus verba fecit , subdit : quod si quis ægro , cui
ea tota nequaquam conveniat , totam dederit , ante-
quam huic cibo aptum illum reddiderit (ex iis ve-
ro , quæ subjicit , & mox recitabo , tunc solum non
aliena huic ægro tota Ptisana est , cum morbi vehe-
mentia remiserit) multimode eum læserit . *Etenim ,
verbi causa (sunt ipsissima Hippocratis verba) quibus*
cibus

cibus intus conclusus est , si quis non facta deorsum evacuatione sorbitionem dederit (hic totam Ptisanam sorbitionem vocat) dolorem , si adest , amplius exacerba-verit ; & si non adest statim induxerit , & spiritus densior fiet . En nimiae repletionis effectus . Paulo autem post : Quin etiam si lateris dolor assiduus est , & ad calefactoria non remittit , & sputum non prodit , sed citra putrefactionem , ac concoctionem valde viscosum sit ; si non solverit quis dolorem , aut ventre mollito , aut vena secta , utrum tandem horum con-ducet ; Ptisanam autem ita habentibus dederit ; cita mors talium continget . Textu vero decimo , de tempore exhibendae sorbitionis agens , cuius oblationem protra-hendam docet , donec calor ad pedes descenderit ; priusquam ad usum Ptisanæ integræ deveniatur , ait , illius Cremore ægrum alendum esse . Non ne ex hi-ſce patet eum timuisse , quosdam ex acute ægrotanti-bus a tota Ptisana nimium repleri ? Ab hac igitur in quibusdam ægris nimiam repletionem timebat , & de hac repletionem nimia in postrema aphorismi explicati particula agit ; non autem de repletionem ægrotantibus inducta per cibos , qui solis bene valentibus conduci-biles sunt ; multoque minus de nimia sanorum reple-tione , quam sub titulo athletici habitus superiore a-phorismo agitaverat . Vidimus igitur non reprobari hoc aphorismo victus tenuitatem in morbis universim acutis ; sed in iis acutis solummodo , in quibus non convenit : quin eodem tempore , eandem implicite commendari ad eos , quibus convenit . Qui enim ait eam periculosam esse ubi non desideratur ; verbis iis eandem approbat , ubi expetitur . Nulla igitur incon-stantia in Hippocratica Doctrina super victus tenuita-te ,

te, cum hæc commendetur ubi convenit, improbetur autem, ubi nequaquam conducit.

X. Sed qui inconstantiam in Hippocratica doctrina objiciunt, hic nequaquam se sistunt. Objectione, quam dissolvimus, viam ad majora sibi parare nituntur: ad ostendendum, scilicet, Hippocratem a tenuiore victu in acutis medicos dissuadere voluisse, amplioremque alimoniam illis concedendam absolute præcepisse; eumque in ea sententia fuisse; quod si in victu acute ægrotantibus instituendo errandum sit, minus sit malum peccare in ampliore, quam in tenuiore victus regimine. Quam sententiam sibi firmare videntur sexti aphorismi primæ sectionis auctoritate, qui sic habet: *In tenui victu ægri delinquant, quo fit, ut magis ledantur. Quicumque enim error committitur major in hoc fit, quam in paulo pleniore victu. Propterea etiam sanis periculosus est valde tenuis, exquisitus, & constitutus victus, quoniam in eo errores gravius feruntur. Ob hoc igitur tenuis victus, atque exquisitus eo, qui est paulo plenior, magis periculosus.* Hoc igitur aphorismo haud paucis, neque indoctis viris visum est, & videtur, contraria omnino iis ab Hippocrate tradi, quæ alibi habet de victu acutorum. Rorarius, ut de uno fane docto pro cunctis loquar, in contradictionibus Hippocratis ait: *victu pleniori potius, quam parciori alendos esse ægros palam tenet* 1. aphorism. sectione aphorif. 5. *inquiens: in victu tenui &c.* Ut vero & iste, & alii veram Hippocratis doctrinam cum aphorismo concilient, omnino diversa a sensu verborum, & auctoris mente tradunt. Ea prosequi nimis longum foret: dixisse suffecerit, Clariss. Hippocratis Explanatorem
Valle-

Vallesium, ut ut plenioris victus amantior, finistrum adeo de istorum Commentationibus iudicium tulisse, ut scripserit: *mibi omnes hæc interpretationes, displicent: tum quia nulla earum videtur verbis quadrare, sed comparatæ videntur solum ad argumentorum dilutiones & ad fugam; tum etiam &c.* At illi ferendi sunt; quia quamvis verum aphorismi sensum minime assequantur; nihilo minus manibus, pedibusque faciunt, ut aphorismum cum reliquis locis concilient, atque Hippocratis de victu acutorum doctrinam fartam, tectamque servant. Minus bene ii facere videntur, qui ab apparente aphorismi sensu decepti, reliquis auctoris locis inconsultis, & ratione, observationibusque totius medicæ antiquitatis insuper habitis, absolute pronuntiant, ad mentem Hippocratis eos agere medicos, qui ampliore victu ægris indulgent; ac potiore eam Praxim existimant, quæ uberius acute ægrotantes alit; putantes, errores plenioris victus facilius corrigi, quam levioris. Horum sententiam, & rationes examinabimus, postquam verum aphorismi sensum explicuerimus.

XI. Cum primis maxime mirum videri cuilibet debet, Galenum, acerrimi ingenii virum, oculatissimumque, atque in Hippocratis scriptis, doctrinaque versatum, magni magistri discipulum, quidem, sed non mancipium, adeo nullam in laudato aphorismo contradictionis notam cum Hippocraticis Dogmatibus, neque ullum, vel leve argumentum in plenioris victus favorem, non dicam jam vidisse, sed ne suspicatum quidem fuisse; ut postquam de diversa aphorismi in antiquis Codicibus lectione verba fecerit, quæ-

quæque obtinet , utpote quæ universaliorē aphorismum faciat , prætulerit ; paucissimis , vera aphorismi sententia explicata , subdiderit : *quæ vero de aphorismo sequuntur , sunt manifesta* . Hinc meritissimus Vallesius , qui vulgarem difficultatem in aphorismo sibi videre videbatur , dixit : *Frigide admodum interpretatur Galenus sententiam hanc Hippocraticam , alioquin difficilem* . At dummodo , ne quis ad eam Barbarorum medicorum auctoritate occupatus accedat ; si ab iis opinio fluxit ea contineri præceptum de victu pleniorē acute ægrotantibus adhibendo , quemadmodum nos suo loco ; apertissima , ita me Dii ament , & facillima est .

XII. Sic habet prima aphorismi particula : *in tenui victu ægri delinquant* . Profecto æquivoca dictio hæc est ; significare enim potest ægros delinquere dum tenui victui se se submittunt ; & tenui victui submissos delinquere . Si errant se se tenui victui submittentes ; ideo errant , quia noxiam sibi rem præstant : si tenui victui submissi , eoque utentes , in aliis errant ; culpa non est in victu , sed in aliis , quæ peccant , atque in semetipsis , qui peccant . Unde vero scire poterimus , num errent eo victu utendo , ut propterea electus victus malus , damnosusque censendus sit ; an vero in aliis , quæ patrant , postquam victui tenui se se submiserint , eoque utuntur ? Ex iis , quæ in aphorismo eodem sequuntur : *Quicumque enim error committitur , major in hoc fit quam in paulo pleniori victu* . En rem in aperto positam . Noxa non est in victu , sed in erratis , quæ cum eo victu , scilicet , dum eo victu utitur æger , patrantur . Ambiguitatem itaque sententiæ tollamus eam aliter efferentes : *In tenui vi-*

(XXXIV.)

Et ægri delinquentes magis læduntur . Quid ? putatis forte id meum esse Commentum ? Cornarii versio ea est , quam Græci Codicis fidem accuratius prosequi fassus est Clarissi. Tozzi ad hunc aphorismum ; quamquam veritatem quam vidit , quamque prope amplexatus est , sibi in verbis sophisma eudens , reliquerit . Hæc igitur est Hippocratis verissima , & apertissima sententia . Si qui ægrotant , & in ægritudine tenui victitantes victu errorem qualemcumque committunt ; magis ab eo errore læduntur , quam si illum commisissent victu copiosiore utentes . Quicumque enim error (sunt ipsissima aphorismi verba absque Paraphrasi ulla , quia priore soluta difficultate facilia intellectu) committitur , major in hoc fit , quam in paulo pleniore victu . Propterea etiam sanis periculosus existit valde tenuis , & constitutus quoniam errores gravius ferunt . Ob hoc igitur (non quia in se malus ; non quia ex se periculosus , acutisque morbis , & sanis etiam hominibus semper alienus fit ; sed quoniam non minus ægri , quam sani eo victu utentes , si quidpiam errent , gravius errores ferunt , & gravius læduntur) tenuis victus , atque admodum exquisitus eo , qui sit paulo plenior , est magis periculosus . Nisi quis inepte , & contra dialecticas regulas , propositionem , quam in particulari sensu Hippocrates protulit , universalem reddere velit ; nodus jam dissolutus , atque dissectus est . Qui quamvis Gordianus non sit , eoque Alexandro aliquo dissecatore minime indigeat ; nihilominus enodationis Gloria ad me nequaquam pertinet ; cum & ad hunc modum aphorismum intellexerit summus Hippocratis interpretes Galenus ; & ita cum , præmissa prius versio .

versione , quæ verbum verbo redderet , Doctissimus Manardus (*a*) explicarit ; & Manardi sententiam , explicationemque ille , vere Hippocratis genius , Martianus (*b*) obviis ulnis amplexatus sit .

XIII. Ne putetis autem , quod jure attendendum , Egregii Juvenes , est , solius ægrotantis , qui victu tenui utitur , errores aphorismo comprehendi : aliorum quoque errores circa eum ægrum admissos complectitur . Præter ergo ægrotantem , qui peccet , peccare quoque possunt , & assidentes , & Medici , quorum deinceps culpæ gravius pœnas æger luat , si tenui , quam si pleniore victitet victu . Plura autem sunt peccata , quæ ægrotus admittat . Cum enim morbo acuto ægrotet (nisi enim acuto morbo captus hujusmodi victui subjicitur) quæ in morbo mitiore peccata non essent , in acutiore peccata fiunt . Ideoque si lecto se se continere nolit : si ob ægre ferendum calorem , vel frigido aere gaudere velit , vel necessaria velamenta abjiciat : si intempestive frigida utatur : si inopportunis horis sermones trahat : si ab animi affectibus se se turbari sinat , delinquit . Error autem , qui commissus ab eo , qui victu pleniore uteretur , ob firmiorem facultatem minus offenderet ; quoniam victu tenuiore utens imbecillior est , gravior ei fit , & gravius affligit , utpote qui causis lædentibus minus resistit , earumque vim violentiorem sentit . Cum vero plura ex recensitis præstare æger haud possit , nisi assidentes illi indulgeant ; in iis assidentium quoque peccata consistunt . Ab assidentibus vero omnium maximus error patratur , ubi de imbecilli-

E

2

tate

(*a*) l. 4. Epist. 2. ad Anton. Favent(*b*) sup. 6. aphor. 1.

tate ægri timentes , pleniorē cibum illi offerunt . Medici quoque circa hosce ægrotantes decipi maxime possunt , ac præcipue in remediorum evacuantium administratione . Medicamentum ad unguem proprium , nec scribi omnino posse , nec dici tradidit Galenus (*a*) qui præterea docuit , nihil magis medicam artem in agendo conjecturalem facere (*b*) quam quantitatem remedii , quæ ægro conveniat determinare . Si itaque medicus , vel in alvum solventibus præscribendis tantillum peccet ; vel per sectam venam aliquanto copiosius evacuet ; ut errorem gravius sentiant , graviusque ferant qui tenui victu utuntur ob vires infirmas & nimium depleta vasa , quam si copiosiore uterentur , necesse est .

XIV. Hæc autem , non ideo scripsit Hippocrates , ut tenuem victum , ubi jure locoque convenit damnet , medicosque ab eo , dum necessarius est , adhibendo , averteret ; sed ut cautissime agerent ; utque dum ægros , qui victu hujusmodi opus habent , ei subjiciunt ; quam diligentissime caveant , ne per ægrotantes ipsos , neve per assidentes , neve ab ipsis medentibus error aliquis committatur . Ecquis , quæso putaret , dum facinoris alicujus difficultatem , necessarii tamen , quis indicat , ab eo aggrediundo , qui illud facturum est , avertere velle ?

Non fit sine periculo facinus magnum , & memorabile
ajebat servus ille apud Comicum . Non ideo tamen Clitipho , ut Bacchis reverteretur voluit ; quoniam jam eum in locum res redierat , ut necesse foret , si &
Cli-

(*a*) 3. method. c. 3.

(*b*) de curand. ratio. per sang. miss. ad Glaucon. c. 12.

Cliniam sua , & semet Bacchide potiri vellet , eam domum Patris adduci . Ideo , non quia in victu tenui commissos errores gravius ægrotantes ferunt , ideo victus tenuis , dum morbus eum desiderat , non est præscribendus ; sed perquam diligenter cavendum , ne errores committantur .

XV. Quispiam nihilominus objicere poterit . Si ægri circa semetipfos errare possunt : si peccare possunt & adsidentes , & Medici : si errores isti leviores fiunt in victu pleniore , quam in tenuiore ; eccur periculum hocce vitandum non erit , aliquanto plenius , quam parcius ægros alendo ? In rebus summi momenti Artium omnium magistra , Prudentia nempe , non jam poscit , sed flagitat , ut , non modo errores , sed errandi quoque pericula vitentur . Si igitur in maximi momenti re , qualis est acutus morbus , a quo vita homo periclitatur , in victu tenuiore discrimen subest , ne gravius habeat æger , si forte circa eum error aliquis committatur ; discrimen hoc profecto fugiendum est , & plenior victus ei periculo nequaquam obnoxius , instituendus .

XVI. Vix speciosior ratio viro prudenti se se objicere potest . Verum , Lectissimi Juvenes , priusquam illi assentiamini , nescio quid mecum perpendere ne vos , quæso , pigeat . Periculum multo minus est in sanguinis emissionem , quæ per scarificatas cucurbitulas obtinetur , quam in ea , quæ pertusione venæ peragitur . Ecquis hoc negare ausit ? Nonne plures : nonne , vel ipse Ludovicus IX. Galliarum Rex ab infortuniis venam perperam sectam subsequentibus , vel vitæ amittendæ periculum incurrerunt , vel il-
lam

(XXXVIII.)

Iam amiserunt ? Ergo in inflammatione vehementi , ubi & copiosa , & cita , & per amplius foramen facta sanguinis evacuatione opus est , fatius est admotis cum ferro cucurbitulis eum extrahere , quam e vena scalpello forata educere . Quid vobis videtur ? Nonne ridiculi potius notam , quam prudentis viri nomen mereretur quicumque ita argumentaretur ? Scio vos responsuros : dummodo vires id ferant , vena potius scalpello secta sanguinem cito , & copiose per majusculum foramen effundat : secetur autem ab experto Chirurgo , ut , quantum fieri per homines potest , infortunia , & pericula præcaveantur . Quod si vires ægro defuerint ; tunc scarificationes adhibeantur , quibus sanguis cum minore virium dispendio educitur . Vos argumentum egregie solvistis , mihiqve veram viam aperuistis , qua ad alterum solvendum incedam . Si acutus morbus victum tenuissimum desiderarit , & ægri vires eum ferre possint ; victus tenuissimus imperandus , & instituendus est . Ne tamen in hoc victu pericula , & ærumnæ contingant , quantum fieri potest , errata præcaveantur , quæ circa ægrum committi possunt . Sin vires non suppetant ; paulo pleniore æger vescatur . Probe jam meministis ex Hippocrate , & Galeno , cibum non a morbo , sed a viribus indicari . Sed ægrotantibus parumper dimissis , de sanis , qui tenui victu utuntur , verba faciamus : eo etenim aphorismus nos vocat .

XVII. *Propter hoc igitur (sunt aphorismi verba juxta accuratiorem Manardi versionem) & sanis fallaces sunt valde tenues , constitutæ , & exactæ victus rationes , quoniam peccata difficilius ferunt . Quæ autem sunt hujusmodi*

modi tenues , constitutæ , exactæque victus rationes sanorum ? Ut res plane intelligatur , neve tenuis sanorum victus cum victu tenui ægrotantium confundatur , non nescire necesse est , sanis quoque triplicem victus rationem ab antiquis constitutam fuisse , quod ex Clariss. Heurnio (*a*) accipio . Prima est vulgaris victus , quo scilicet , sani homines , nullo habito ciborum delectu , passim ad saturitatem utuntur . Hanc φαῦλον , nempe vulgarem , dixere veteres . Altera est mediocris , seu supravulgaris , quæ delectu non modo qualitatis , sed tanta quoque , non ampliore quantitate continetur , hominesque in ea semisaturi e mensa surgunt . Dixere hanc ἐπίφωλον , & μετεόν . Tertia tandem tenuis , parcior , exquisitiorque , quæ cum victu pleno ægrotantium coincidit : hanc ἀκρίβως appellavere .

XVIII. Fluxa , debilique admodum valetudine , ut ii e sanis hominibus utantur necesse est , qui tenui , constituto , exactoque victui se se obligant . Hosce censui sanorum vix quis adscripserit . Eos tamen , si tali victu utentes peccent , magis affligi , & errores gravius , difficilisque ferre necesse est . Historia etenim , & observatione constat , illos quoque , qui mediocri tantum , sobrio , sed ad libellam exacto victu , non tenui tamen , vivunt , si errores committant pœnas facilius , graviusque dare . Exemplo sit Nobiliss. ille Patritius Venetus Ludovicus Cornelius (*b*) qui cum diutius hujusmodi victu usus fuisset , illiusque tantum , non alia ope , a suis morbis convaluisset ,
prof-

(*a*) ad 4. aphor. 1.(*b*) de vitæ sobr. commod. ex version.

Latin. P. Lessii S. J. apud Ramazz. T. 2. Oper. p. 190. Edit. Patav. 1718.

prosperrimaque ab annis pluribus salute frueretur; cum ad domesticorum desiderium, Medicorumque, minus ædepol Sapientium consilio, duabus solummodo unciis cibum, totidemque potionem auxisset; primum male animo habere cæpit; tum gravissime, & cum periculo ægrotavit. Id vero illi ideo contigit, quia illius ventriculus per plures annos tantæ, non ampliori, cibi quantitati fuetus; quæque in eo erant sanguinem propellentes vires, a multo tempore solitæ tantam, non ampliorem, succorum vim per vasa projicere, & in girum ferre: primus cibi, ut ut parum excedentem quantitatem, bene conficere minime valuit: reliquæ autem paulo majorem fluidorum copiam, neque expedite propellere; neque, ut æquum erat, elaborare; neque minus elaboratam per secer-nicula potissimum transpirantia expellere potuerunt. Si quis vulgari, plenoque victu utens, non modo tantillum, ut illustris Cornelius, sed majorem quoque errorem commisisset; non solum eandem læsionem non incurrisset, sed nullam, aut levissimam. Eccur vero hoc? Quia viribus potens; & cibum, & sanguinem copiosorem melius elaborare potuisset.

XIX. Si ea valetudine, & viribus homo gaudeat, quibus copiosorem alimoniam facile conficere possit; dum hanc minuit, & vires sibi, & robur imminuit. Viribus paululum imminutis, errorem quemlibet iste committat: Venere, exempli gratia, paullo frequentius utatur. Majore, dubio procul, damno afficietur, quam si suis viribus instructus, voluptati plusculum indulgisset. Idem graviores labores subeat: lædetur magis, quam si viribus valeret. Aeris injurias, vicifitu-

fitudinesque excipiat: imbecillior ob debitam cibi copiam sibi detractam redditus, aeris qualitatibus minorem resistantiam objiciet. Ob hæc etiam sanis fallax, vel si mavultis, periculosus est, non dicam valde tenuis, ut ajebat Hippocrates, sed constitutus tantum, & ad mensuram exactus victus, quia in eo errores gravius ferunt. Propterea vero errores gravius ab iis ferri contingit, quia commissi, victus tenuitate præsentē, majores fiunt, quam in paulo pleniorē victu. Ideo ne concludendum, sano ei cui plenior victus incommodior est, pleniorē nihilominus cibum exhibendum esse? Ne, quæso, Dialectica hac utamini. Adeo plenus victus alienior Cornelio erat; ut non in tenui; sed in sobrio, ad mensuram tamen exacto, ei medicina fuerit. Dum vero paululum excessit, cito ægrota-
vit.

XX. Sed quoniam huc pertinet, de Famigeratissima Celsi Regula ad sanos aliqua dicamus; quia quidam ex aphorismorum explanatoribus, explicato aphorismo, victum tenuem in sanis absolute ab Hippocrate damnari putantes; sententiam quam tenent, imbibuntque, ea confirmare se posse credunt. Ait igitur Celsus (a) quod sanus homo, *qui & bene valeat*, & suæ spontis est, nullis se se obligare legibus debeat. Hunc varium vitæ genus habere jubet, variasque & frequentes exercitationes (respicit hic Gymnastica exercitia, quæ suo tempore in usu erant, nostro autem obsoleverunt) ut ne ignavia corpus hebetetur, laboribus autem confirmetur. Nullum cibi genus, quo populus vescitur, fugiat: *modo plus justo, modo*

F

non

(a) l. i. c. i.

non amplius assumat : bis die potius, quam semel cibum capiat, & *semper quamplurimum*, dummodo hunc concoquat. Claudit deinceps caput vetans, & genere exercitationis, & alimonia, Athleticam ne sibi compareret habitudinem. Sanum itaque hominem vulgari, & vario, neque exacto, constitutoque victu uti vult. Sed, quem sanum? Qui & bene valeat, robustus, scilicet, sit. Plurimi etenim sunt fani, sed imbecilles: atque adeo plurimi, ut sint ii, ad quos spectat alterum ejusdem libri Caput; major, nempe, pars urbanorum, & cupidi litterarum, quibus regulam Celsus nequaquam scripsit. Ei itaque, cui bene futurum est vario, & libero vitæ genere uti, haud sufficit sanum esse, sed ut robustus quoque sit oportet. Hinc cum primis videtis, quod si hic mavellet Celsus pleniorum victum sanis hominibus persuadere; propositio nequaquam universalis esset; sed intra arctos adeo cancellos circumscripta; ut ad tot modo spectet, quot fani sunt, & robusti, quorum numerus profecto minimus est, quemque vix æquant, prope dixerim; ut de numero bonorum ajebat Satyricus;

Thebarum Portæ, vel divitis ostia Nili.

Sed, vultne revera, ut plenius vescatur? Vult, si bene concoquat: sin minus, parcius illi edendum est. Qui autem bene non coquunt, num sanorum bene valentium numero adscribendi sunt? subjicit: athleticam habitudinem ab iis sibi cavendam. Habitus porro Athleticus comparatur, ubi quis plurimum nutritur: plurimum vero nutritur, cæteris consentientibus, ubi plurimo indefinenter, non vero ubi modo plurimo, modo parciori utatur cibo. Vult igitur sanum, & bene valentem, non plena, sed varia

ria victus ratione uti . Vult , ut supra posuerat , si bene coquat . Quod enim non coquitur , tantum abest , ut nutriat , ut ne nutriat quidem , sed corrumpatur : tuncque ex celeberrimi Sanctorii animadversione (*a*) cum excrementis , aliquid quoque bene cocti prioris cibi exit . Vult eum edere plurimum , non *absolute* , sed *respective* : tantum scilicet quantum coquit . Quod , ut ut sano & bene valenti convenire possedemus , omnibus sanis profecto dandum non est ; cum neque omnes sani bene valeant ; neque omnes sani quantum sumunt tantum coquant , cum id optimis solum Naturis , quas passim non offendimus , concessum sit ex Galeno , asserente (*b*) optimam Naturam solummodo , quantum appetat , tantum etiam coquere . Regula itaque decantata Celsi , nequaquam sancit sanis *absolute* pleniorē victum convenire ; sed sanos , robustosque , quique sui juris sunt , vario vitæ generi consuescere debere ; ne si uni , & constituto assuescant ; cum necessitas tulerit , ut aliquid in eo mute- tur , gravius , & incommode ferant . Nunc ad Hippocratem redeamus .

XXI. Ex illius autoritate itaque , quam nobis frustra objecerunt , a primo ad ultimum stat , Hippocratem sanis victum pleniorē nequaquam suadere : quin universim , & *absolute* , mediocritatem in universo vitæ Regimine iis commendasse luculentissime patet ex Sectione sexta sexti libri Epidem. *Labores , cibi , potus , somnus , res Veneræ , omnia mediocria* . Stat quoque tenuioris in acutis victus , quibus jure , locoque convenit , amantiorē fuisse ; quod cum ei notum esse pos-

F 2

sit ,

(*a*) 93. aphor. 3.(*b*) Art. medic. l. 3. c. 2.

fit, qui paulo diligentior solummodo explicatis aphorismis attentionem adhibeat; ille sane percipiet, qui textum vigesimum secundum libri acutorum legat. Ibi ait apertissime, eum magis errare medicum, qui cibum ægrotanti dat putans ab exhaustu imbecillum esse, quam qui revera ab exhaustu debili cibum attenuat. Videri ne cuiquam potest, Lectissimi Juvenes, eum, qui minus malum putat esse demere ubi addendum, quam addere ubi demendum, plenioris victus in acutis amantem, fautoremve esse posse? Minime gentium. Nihilominus decebat prudentissimum virum Medicos monere; ut tenui victu præscripto quamdiligenter caveant, ne circa ægros quicquam peccetur, quod explanato aphorismo præstitit; quia errores ab ægris, & circa ægros tenuiter victitantes commissi, graviores evadunt, difficiliusque feruntur. Univerſa itaque, quæ ad rem hanc posuimus sua autoritate claudat, firmetque unus, e celebrioribus Hippocratis Interpretibus, Heurnius, qui ita (a) scripsit: *Si quis subsultim legat hunc aphorismum (nos dicemus, binos hosce aphorismos) existimet Hippocratem rejicere, aut accusare dietam tenuem, aut tenuissimam. Minime. Hanc enim summe laudat ubique: hac, nihil felicius præscribi potest in morbis acutis, & acutissimis; immo necessario his debetur talis victus. Sed jure & loco præscribi debet: quod si id non fiat, erit periculi plenus talis victus.*

XXII. Ast Hippocraticæ autoritatis abusum, rationibus quoque firmare quidam contendunt. Hecquet Solidistarum Clarissi. Antesignanus ait, per tenuiorem
victum

(a) ad 4. Aphor. 1.

(XLV.)

viſtum vaſa exinaniri : exinanita autem coaleſcere, & ſolidari. Inde ſubtilioribus liquidis curſum, viamque intercipi. Addam ipſe : intercipi quoque modum, quo liquida hæc elaborari poſſint. Organa etenim iis elaborandis, perficiundiſque apta & dicata, e cavis ſolida facta, inofficioſa omnino redduntur. Quamobrem, non modo liquidorum vitia augeri, ſed motus eorundem circularis, ſine quo vita eſſe non poteſt; prius in minimis; tum in paulo majoribus; in magnis tandem ſuſflaminari debet.

XXIII. Vaſa exinanita concidere, quoniam neceſſarium, certiffimum eſt. Coaleſcere quoque, ſi non omnia, teneriora ſaltem, & ex cavis ſolida fieri ſi diutius exinanita permaneant, a ratione alienum non eſt. Ajo quoque proſcriptas fuiſſe, damnatasque ab Hippocrate evacuationes eas, quæ vaſa cito exinaniant : *plurimum, atque repente evacuare.... malum; omne enim nimium nature inimicum* (a) Quin ultro concedo, regulam hanc & absolute propositam, & absolute veram eſſe. Pro adnotatione tantum illi ſubjicio, æquum, immo neceſſarium fore, ut nos adhibeamus menſuram ad dimetiendum illud *plurimum*. Quod enim plurimum in uno caſu eſt, in altero non eſt; quæque evacuatio plurima reſpectu Titii dici poteſt, plurima nequaquam dici poteſt reſpectu Sempronii. Nihilominus aſſero, neque per omnimodam abſtinentiam, neque per viſtum tenuiſſimum, acute ægrotanti vaſa pernicioſe exinaniri poſſe, neque coaleſcere.

XXIV. Plures de diuturniore a cibo abſtinentia hiſtorias non moror, neque homines pluribus diebus ſine cibo

(a) 51. aphor. 2.

cibo vivere posse, ex narratione a D. Luca (*a*)
relata probare contendam, ne quis mihi regerat illud
miraculo contigisse. Neque nobilis mulieris casum a
me visum narrabo, quæ plures dies omnino sine ci-
bo vixit; tum quia in morbo eo mortua est; cum
maxime, quoniam clysmata nutrientia adhibita, ut
vitam diutius protraheret, in causa forte fuere. Mit-
to quoque historias, quas habet Stalpartius Vander-
Viel (*b*) quasque meritissimus Bonetus (*c*) habet ex
Sampsonio, Helvigio, Thoma Bartholino: mitto quas
refert Rhodius ex Dominico Sala, Horatio Augenio,
& Musa Brasavolo. Unicam a Tulpio (*d*) relatam
afferam, quæ longioris abstinentiæ a cibo exemplum
exhibet, non tamen voluntariæ, neque morbosæ, ve-
rum coactæ. Septem Britanni Scapham ingressi, ut
non longinquam Insulam peterent, a venti vehemen-
tiore vi in altum pellebantur. Undecim integros dies
per freta longa jactati sunt absque ullo cibo. Immi-
nente ob inedia morte, fortes unanimiter miserunt,
ut ex iis unus, quem fors tulisset, jugulari se
fineret, suo sanguine & carnibus sociorum vitam su-
stentaturus. Horum unus, qui necati socii carnibus ve-
sci noluit, ob famem in furorem actus se se in ma-
re præcipitem dedit: reliqui tam diro cibo cibati in-
columes evasere. Hinc primum noscite, ex omnimo-
da undecim dierum abstinentia, & inter, quidem,
maximos, assiduosque labores, qui adeo per se consu-
munt, lata, iis vasa nequaquam coalita fuisse contra
auctoris, quisquis ille fuerit, libri de carnibus, Hip-
pocra-

(*a*) Act. Apost. c. 27.(*b*) T. 2. observ. ad observ. 15.(*c*) T. 1. M. S. l. 3. sect. 3.(*d*) l. 1. observ. 43.

(XLVII.)

pocrati adscripti, sententiam, qui scripsit: *Si quis in septem diebus nihil edere, aut bibere velit, plerique quidem in iis moriuntur. Sunt autem qui ipsos transmittunt, & tamen moriuntur. Sunt etiam quidam, qui persuasi sunt, ut ne desperarent se ipsos fame conficientes, sed comederent, ac biberent. Verum venter non amplius suscipit; jejunum enim intestinum in his diebus concrevit, moriunturque etiam illi (a).* Noscite, & alterum; hominem undecim saltem dierum inedia ferre posse, absque eo quod minima vascula illi exhauriantur. Quod si non exhauriuntur sano vehementerque laboranti; an timendum ei perperacuto morbo correpto, illo scilicet, qui circa quartum diem judicatur, cui soli Hippocrates victum extreme tenuissimum, omnimodam, nempe, abstinentiam præscribit, vasa perniciose, lethaliterque exinaniri? Si hoc verum foret, universi Diatritariorum ægrotantes mori debuissent, quod tamen satis notum est falsum esse. Neque Hippocrates longiorem abstinentiam, qua Cnidii Medici ex eodem, quaque, Celso teste, Ægyptii, Asiaticique utebantur, improbat, quia mala absolute esset; sed quia indiscriminatum omnibus ægrotantibus eam adhibebant. Observatio igitur ostendit, metum, ne acute ægrotanti vascula perniciose exhauriantur, si tenui, aut extreme tenuissimo victu, prout genus morbi requirit, tractetur, nullum omnino fundamentum habere.

XXV. Præmissa observatione consideremus nunc, num observationi ratio respondeat. Vasa minima ob abstinentiam victumque tenuiorem nequaquam exinanirentur, si crassior sanguinis pars, quæ capacioribus

cana-

(a) tex. 21.

(XLVIII.)

canalibus continetur eo exilitatis redigi posset, ut quæ hujusce extenuationis capax est, ad minima ingredienda, & perluenda vasa apta fieret. Id autem in acute febrientibus, primis saltem morbi diebus, cum plurima in venis supervacua continentur, nec reliqua multum densata sunt (*in principiis* etenim ex Hippocrate (*a*) *omnia leviora*) non contingere non potest. Cum ex vasis rubris flava; ex flavis lymphatica; ex hisce minora adhuc, tum minima vascula nequaquam exoriantur, sed transpirantes quoque syphunculi ex arteriis immediate enascantur, quod præstantissimo Hallero per injectiones constitit: cumque ex eodem (*b*) globuli rubri sanguinis solo calore & fotu in flavos abeant, adeo ut totus sanguis in flavum liquorem, etiam in vivo homine, converti possit; quanto facilius id continget, ubi & per febris calorem, & per motum adauctum illorum dissolutio faciliior futura est? In serum itaque, & in liquores sero subtiliores conversi exilima ingredientur vasa, neque ea collabi sinent; præsertim cum rarefactio individua caloris comes, massulas rariores, & turgidiusculas faciat.

XXVI. Verum enim vero locus Hippocratis de evacuationibus exinanientibus a nobis supra allatus, diligentiores animadversionem desiderat. Animadvertite itaque, dixisse Hippocratem malum esse, non plurimum tantum, sed plurimum, & repente evacuare. Plurima etenim, & repentina; scilicet subitanea; scilicet cito peracta evacuatio, vasa quidem cum periculo exinanit; plurima autem non repente, scilicet,

non

(*a*) 30. aphor. 2.

(*b*) in prim. Physiol. lin. c. 7. 163.

(XLIX.)

non acervatim facta , vasorum exhaustiendorum caret periculo . Mulieres mensium nimietate laborantes , non modo ad menses , sed ad annos quoque plurimos morbum ferunt . Si quis sanguinem effusum ponderaret , miraretur profecto , ut tanta illius vis effundi potuerit , muliere superstite . Plurima facta fuit evacuatio , sed non facta repente , non cito , non acervatim . Aliquando e contra , non minus quæ abortum passæ sunt , quam quæ maturos foetus ediderunt , nimium reſeratis uteri vasis inexpectato , & ferme improviso objerunt . Magnam , utique , & istæ sanguinis effusionem passæ sunt ; sed nullo modo ei comparandam , quam annuo spatio mulier nimis mensibus exercita fudit . Non ideo vitam cum morte commutarunt , quia tantum cruoris effuderunt ; sed quia repente , parvo scilicet tempore , acervatimque , illum emisserunt . In repentina enim , copiosa , acervatimque facta sanguinis profusione , fieri non potest , quin ex hydraulica lege plurimus cruor ad vasa , quæ evacuantur , ob ablatam resistantiam , vehementer fluat , excurratque . Parum hinc , & , ut ita dicam , tantillum sanguinis ad cerebrum it , paucioresque spiritus , a paucio sanguine secernuntur . Horum defectus , ut sanguinis ad cerebrum pulsi , singulis cordis contractionibus crescit , & cito mulier cum sanguine vitam amittit . Periculum hoc imminere ex vulneribus observavit Hippocrates , quapropter monuit (a) *in vulneribus sanguis concurrit : opitulandum igitur , ut vacuum expleatur* . Vacuum autem , ut cuilibet patere potest , ideo fit ; non quia sanguis tantum evacuatur ; sed

G

quia

(a) 6. Epid. sect. 5.

quia ad fauciatâ vasa concurrit : scilicet , quia copiosa , & cita evacuatio est . Copiosiores , itaque , evacuationes tunc inanitionis vasorum periculum inferunt , cum repentinâ quoque , nempe , cum breviori tempore fiunt , non autem ubi spatiis longioribus contingunt .

XXVII. At quis , quæso , dixerit , si etiam evacuatio , quæ ab abstinentia , victuque tenuissimo venit , summa foret , eam repente , brevissimo tempore , acervatimque fieri ? Nemo sane , qui ea , quæ oculis usurpantur , negare nolit . Nullum ergo periculum nimiae , periculosaque inanitionis vasorum ab ea abstinentia est iis in morbis , quibus alienior ea minime est . Quoniam evacuat hæc quidem , ut ita dicam , *negative* (a) *inedia non per se evacuat , sed per quamdam perspirationem , quia nullum alimentum , quo evacuata materia instauretur , introducitur*) scilicet : dum nihil novi vasis inditur , vitæ vires , quæ agere continenter pergunt , veteres succos digerunt , extenuant , consumunt , expellunt ; sed id non affatim , neque paucotempore , & repente fit ; sed sensim sine sensu , ut dicitur ; & non interrupta quidem , sed paulatina , & diutina evacuatione . Abstinentia igitur ea aphorismi particula nequaquam comprehenditur , qua plurimas , repentinaeque evacuationes Hippocrates improbat , sed altera , qua ponit : *quod paulatim fit tutum est* . Optimo jure , igitur , ad morborum principia , præ quibuscumque aliis auxiliis , abstinentia a Celso (b) commendatur : *Plurimi falluntur , dum se primo die protinus subluros languorem aut exercitatione , aut balneo , aut vomitu , aut*
coacta

(a) Comment. 1. de humor. 12.

(b) l. 3. c. 2.

coacta dejectione, aut sudoribus, aut vino sperant. Non quod non interdum id incidat, aut non decipiat, sed quod sepius fallat; solaque abstinencia sine ullo periculo medeatur.

XXVIII. Unicum nunc effugium iis restat, qui plenius ægros acute febrientes alendos esse contendunt, scilicet consuetudo. Non modo ætati, regioni; temporì; sed consuetudini quoque aliquid dandum esse Hippocrates præcipit. Cum itaque nostris temporibus copiosius, magisque opipare ali soleant homines, quam temporibus Hippocraticis; necesse est medicos, ut huic consuetudini indulgeant, aliquanto copiosius, quam fuerat Hippocrates, ægros alere. Hæc est vetustissima cantilena, quam quælibet ætas exacti temporis laudatrix semper cantavit:

Ætas Parentum pejor avis tulit

Nos nequiores, mox daturos

Progeniem vitiosorem.

Itemque: *Terra malos homines nunc educat, atque pusillos.*

XXIX. Nisi ex litterarum monumentis constaret, homines qui cultiores sunt habiti, qualibet ætate in victu intemperantes fuisse; sola humanæ naturæ consideratio Philosophum docere posset, eos anteaetis quoque, non minus, ac nostris temporibus, gulæ deditos, & de cute curanda sollicitos extitisse. Homini sponte in voluptates prono, sobrietas & temperantia virtuti semper, incommodo, scilicet, fuit; eoque, si paucos excipiamus, quos æquus amavit Jupiter (multitudini enim nunquam meliora placuisse certissimum est) dicendum, quolibet tempore sibi bene homines voluisse, genioque indulgisse. Propterea quibus nota intemperantia fuit, quibusque & sanitas, &

ætas , & res domi non angusta id facere sivit ; & lautitiis pro temporum genio gavisi sunt ; & opipare , neque solum ad vitæ necessitatem , comedere sueverunt . Non negavero quasdam Nationes extitisse , & forte existere , quæ universim parce , & frugaliter vivunt . At barbaræ , & incultæ , eoque minus vitiosæ , Apicianam scientiam minime norunt ; neque ideam aliorum ciborum habent , quam quos illis Grex , solumque obvios , simplices , facilesque offerunt . Ex iis istæ sunt , de quibus dici potest , quod de Scythis ajebat Trogi compilator , (*a*) plus scilicet illis profuisse vitiorum ignorationem , quam Græcis cognitionem virtutis . Legi , Persas frugi admodum esse . At Clariss. Auctor , unde hoc habui , subdit , illos non virtute tales , sed alterius vitii vi existere . Cum enim in vestibus , in gemmis , in equis , in Famulatio magnificentissimi sint , in luxumque hujusmodi effusissimi ; ob expensas , quas , ut uni vitio indulgeant , faciunt , nequaquam iis superest unde alterum colant , ac laute comedant . Hi quoque qui fervidiori Cælo subsunt parciores in victu esse consueverunt ; tum quia forte intemperantiam ignorant ; cum maxime , quoniam *sub axe nimium propinqui Solis* , haud minore , quam cito vitæ dispendio Gulæ vitium stat . Sed , quemadmodum supra posui , litterarum monumenta abunde testatum faciunt , cultiores Nationes Gulæ , atque intemperantiæ deditas semper fuisse . Galenus , qui sub Antoninis floruit , intemperantiam (*b*) sui temporis carpit . Plutarchus , qui (*c*) sub Trajano

(*a*) Justin. hist. l. 3.(*b*) Com. 6. aphor. 28. 29.(*c*) T. 3. moral. sympoſ. 1. Quæst. 2.

no vixit, sui temporis menſas pingendo, noſtras quoque, haud per Jovem, frugales, perbelle pingit. *Proinde ridiculum eſt coquis, & menſæ miniſtris curæ eſſe, quid primo, quid ſecundo, medio, ultimoque loco apportent.* En, ni fallor, quatuor menſas: *Portate hodie dici-mus.* Plinius ſenior Veſpaſianis coævus fuit. Ex ejus verbis (a) noſcere poſſumus qualis eſſet tunc tempo-ris vivendi modus: *At nunc Coci Triumphorum Imperiis parantur, & coquorum piſces; nulluſque jam mortalis æſtimatur pluris, quam qui peritiſſime cenſum Domini mer-git.* Ex Senecæ Episto-lis, præcipueque ex nonageſi-maquinta ſatis apparet, ut Neronis tempore Gula ob-tineret. Progrediendum nobis eſt ad ætatem Augu-ſtæam? Habetur lex Julia. Syllæ tempore cœnarum diſpendia, lege, caſtigata fuere. Ante Syllam, Lici-nia quoque, & Fannia contra eoſdem conviviorum ſumptus rogatæ ſunt. Quid porro indicant Paraſiti a Terentio, qui cum Africano vixit, & a Plauto Terentio antiquiore, in Comœdiis introducti? Num Græcos illorum temporum, ad quæ fabulæ illæ refe-runtur, homines frugi fuiſſe? Quid de temporibus Platonis dicendum? Iſte in Convivio Pauſaniam in-ducit ſuadentem in vino temperantiam, conſitentem-que ſe adhuc heſterna crapula gravatum, idemque de aliis opinantem. Ariſtophanes vero ait ibidem, ſe u-num ex iis eſſe, qui prægreſſa die non jam pluſcu-lum biberunt, verum ſe ſe ingurgitarunt. Quin idem Ariſtophanes aſſidue ſingultiens introducitur, addita ſuſpicionem, ne a repletionem nimia ſingultiret. Num altius quoque ad ejuſdem Hippocratis tempora aſcen-

den-

dendum est? Profecto, quod neque ciborum varietatem, neque copiam damnasset Hippocrates, si apud sui temporis Græcos parsimonia, & temperantia obtinuissent. Quæ igitur (malum) ut nos nostrorum pudeat, tempora, & sæcula nobis objiciunt? Saturnia, Fabulas nempe. Sane, asserere ætatem extitisse, qua Populus Barbariem exutus, politiorque factus, cumque aliis excultis Nationibus commercia miscens, Virtutis & Temperantiæ sibi studium adsciverit adeo fabulosum est, ut nulla Fabula fabulosior esse possit. Qui ajunt, igitur, nostris temporibus ægros plenius alendos, quam temporibus Hippocraticis, ut consuetudini inserviamus: scilicet, quia nunc intemperantius, quam olim, vivitur; rem nullo innixam fundamento effutiunt.

XXX. Non a vi consuetudinis, sed aliunde ortum habuit ea Praxis, qua acutis correpti morbis plenius aluntur. Zacutus Lusitanus (*a*) a Barbaris medicis quæsitum fuisse ait, num victus ratio incrassando, an extenuando procedere debeat; ac Doctissimus Slanus asserit (*b*) Barbaros Medicos primum putasse, aphorismo, quem postremo explicuimus, præceptum contineri de victu pleniore acute ægrotantibus adhibendo. En itaque mali fons. Isti, qui post Arabes ad instaurationem usque Scientiarum, ad Sæculum nempe decimum quintum provectum Scholas obtinuerunt, Barbari dicti, plenius ægros alere cœperunt. Mos ægrotantibus non injucundus, Græcæ Medicinæ reviviscentis cultores, sectatoresque tetigit; quorum quidam ut credere æquum est, natura indulgentiores, ne ægro-

tantes

(*a*) 1. 2. Hist. Med. Princ. Quæst. 50.

(*b*) 7. aphor. 5. 1.

tantes turbarent ; non pauci , ut conjicere non iniquum , in adulationem proni , ut eos sibi benevolos redderent ; plerique autem , ut certissimum , viri Doctrina magis , atque Eruditione , quam Praxi Medica Clari , illum retinuerunt ; ac quem sanioris medicinæ Græcæ Proceres constanter damnarant (ut de iis fit , quæ quamvis mala , aut inepta , postquam in communem usum recepta sunt , ratiunculis non minus ineptis firmare satagimus) ejusdem Hippocratis auctoritate , illius sensa detorquendo , atque a consuetudine , cui aliquid concedendum ille docuerat , argumenta sumendo , probare studuerunt .

. sic observatio crevit

Ex atavis quondam male cœpta , deinde secutis

Tradita temporibus , serisque Nepotibus aucta .

Traxerunt longam corda inconsulta catenam ,

Mosque tenebrosus nostra hæc in tempora fluxit . (a)

XXXI. Apud Italos tamen , ex testimonio Clarissimi Batavi Foresti (b) qui Bononiæ studuerat (scribebat iste decimo sexto sæculo adulto , & declinante) hæc Praxis minus invaluit . Agens iste de Synocho putrida hæc habet : *Cibus huic in principio panatella simplex , & hordeacea cum vino granatorum . Postea ne deficerent (nam nostris tenuis victus non adeo ita confert ut Italis) etiam jus pulli cum spinacchia , & lactuca concessimus , poma cocta , panatellam , ex cerevisia pane intrito , & saccharo consperso .* Quod si ex præsentibus præterita conjici possunt ; minus etiam valuisse dicendum est apud Anglos , quoniam hodiernis quoque temporibus , ut videbimus , avenaceis solummodo , aut hor-
dea-

(a) Prudent. in Symach. l. i.

(b) T. i. observ. l. i. 14.

deaceis Præclari illius Doctissimæ Nationis Medici febrientes alere solent . Valuit tamen , & plurimum quidem apud Gallos , Valleriola teste (*a*) qui victus rationem , qua ad acutos morbos Medici in Galliis utebantur , carnes , juscula , vinum , variosque cibos , Proceribus præsertim Aulicis offerentes , monstrosam vocat . Iste quoque Auctor diætæ Italorum ibi meminit , quæ longissime ab ea , qua plerique e nostratibus hodie utuntur , distat .

XXXII. Eadem est origo stillatitiorum e pullis , jurium consumptorum , contusorum , expressorumque e carnibus , ac restaurantium , quæ prisca Medicina omnino ignoravit . Ex eruditissimo Mercuriali (*b*) Avicennas in libro de viribus Cordis , meminit distillati e carnibus , quod aquam carnis vocat , eamque utiliore putat , si ei in distillatione addatur succus Citri , folia Boraginis , acetosæ , melissæ , acetumque ipsum rosaceum . Rhazes autem , & Alzahravius ex Zacuto Lusitano (*c*) decocta restaurantia e pullis , superioribus minime nota , habent , quibus uniones quoque , atque aurum , præter alia putata Cardiacæ , & aliquid optimi vini , aut aceti (id autem minus inutiles consilio) miscebant .

XXXIII. Ex hisce , vobis , Optimi Juvenes , colligere facillimum est ; non ut consuleretur sanorum consuetudini victum plenior apud acute ægrotantes invaluisse ; sed , quem ignorantia primum invexerat ; ob indulgentiam nimiam ; ob adulationem ; atque ob rem minus examinatam , sanioris quoque Scholæ Medicos

(*a*) l. 3. locor. commun. c. 15.

(*b*) de Pestilent. c. 24.

(*c*) l. 3. Hist. Med. Princ. Quæst. 20.

dicos retinuisse, atque ad nos usque misisse; quamvis a bonis Clinicis, & voce, & scripto, & Praxi ipsa haud raro castigatam, & reprobata.

XXXIV. Nolim tamen putetis, me consuetudini, cui Empirici quoque ex Galeni testimonio (*a*) tribuebant, nihil dare. Illud ei tribuo, quod tribuendum docuit Hippocrates (*b*) *aliquid*, nempe, non *plurimum*. At, quæ quæso, vis hæc consuetudinis, quæ altera prope Natura ab Philosopho vocata fuit? Qui de ea ex professo tractarit, præter Galenum, & Santorium, neminem adhucdum legi. Medici, ac Philosophi de ea ita loqui mihi videntur, quemadmodum olim de stellarum influxibus loquebantur. Dicebant hoc, aut alio modo res cadere, vi cælorum in hæc inferiora vehementer potentium. At in quo vis ista consisteret, quomodo ageret, quid subjectis corporibus immitteret, nequaquam dicebant. Ad eundem modum de consuetudine loquuntur: vim consuetudinis magnam esse deprædicant: vi consuetudinis talia potius, quam alia contingere in homine dicunt: vi consuetudinis hæc potius, quam illa perfici; sed verbis hisce contenti, quid Physici ea tegant revelare neque satagunt, neque satagerunt. Si vos me audire non pigeat, quid hac super consuetudine, illiusque vi meditatus aliquando ipse sim, vobis exponere nequaquam gravabor.

XXXV. Consuetudo in aliquo laborioso opere peragendo præstat, ut opus illud facile conficiamus; atque opus facile conficere, est, illud minus laboriose peragere. Minus autem laboriose opus ali-

H quod

(*a*) 3. Method. c. 3.(*b*) 17. aphor. 1.

quod quispiam exequitur, quo plus virium ad opus exequendum ei est. Cum igitur relate ad datum opus, idem ac virium abundantia præstet consuetudo; haberi ea poterit, respectu ad illud ipsum opus habito, pro quantitate virium; & lege contrariorum, insuetudo in eodem casu, pro viribus imminutis. Hinc quotidie videmus, quod ab ipsomet Hippocrate adnotatum fuit (a) facilius ferri labores, sed consuetos a debilibus, senibusque; quam a juvenibus, atque robustis eos, quibus minime consueverunt.

XXXVI. Quoniam igitur consuetudo pro viribus auctis haberi potest, ac debet, modo huiusce rei ratio inquirenda est, videndumque, ut vires consuetudo addat. Consuetudo ad aliquod peragendum opus per nos acquiritur, opus illud frequenter præstando, seu frequenter machinas illas & instrumenta exercendo, quæ operi faciundo inserviunt. Quid porro organis quæ exercentur novi tribuit frequens illorum exercitium? Observe cursorum furas: adspicite remigantium brachia: considerate quid manui operosiori contingat: perpendite quid brachio illius accidat, qui folle lusorio ludit. Videbitis organa hæc frequentius exercita, reliquis, quæ minus exercentur, & torosiora, & firmiora evadere. Eccur autem hoc? Ab Hippocrate accipite observationem alteram, unaque observatorum rationem: observationem, inquam, quæ, si non modo bene valentes, sed boni quoque, ut putandum est, esse vultis, eximio vobis usui futura erit: *Vir si multum coeat, venæ ampliores redditæ Venerem magis inducunt* (b). Ut frequens Veneris usus genita-

(a) 49. aphor. 2.

(b) de natur. puer. tex. 22.

nitalia vasa ampliora reddit ; sic iterati actus , reliquis partibus frequenter exercitis vasa capaciora faciunt . Hinc iis & copia sanguinis , & nutrimenti major . Ob majorem nutrimenti copiam firmiores redduntur : ob sanguinis copiosorem affluxum , vis superaddita , quæ ab fluidi influxu venit , major , intensiorque est : sic utroque de nomine fortiores , opera peragenda facilius , promptiusque exequuntur .

XXXVII. Quod autem externis partibus , oculisque , ac voluntati subiectis consuetudo præstat , id ipsum internis , atque ab oculorum acie remotis , nec voluntati inservientibus largitur . Rem explicemus exemplo . Helluo , atque abdomini natus , irritatione , quam frequentius ventriculi fibræ cibi copia induxit , sanguinis copiosorem vim in ventriculi vasa sæpissime determinavit . Hinc vasorum ventriculi tunicis intertextorum capacitas major reddita : copiosior inde sanguinis affluxus : nutrimentum fibræ copiosius propterea appositum : ideo tunicæ illius visceris validiores factæ : succi gastrici secretio quantitati sanguinis eo appellentis respondens , nempe major : ab hisce omnibus digestio expeditior , ac sensus famis , ciborumque desiderium fere præsens . Ita consuetudo , quemadmodum externis organis , internis quoque , neque a voluntate pendentibus vim addit , & relate ad datam operationem pro viribus auctis haberi debet .

XXXVIII. Consuetudo tamen internorum neque a voluntate pendentium , quoad effectus ab ea exorientes , plurimum differt a consuetudine voluntariis instrumentis inducta . Nullam molestiam partes voluntati subiectæ sentiunt , si a consueto opere cessent ,

neque animo vim ullam inferunt. At quæ sine voluntatis imperio operantur machinæ, ubi a consuetudine validiores redditæ fuerint, non exiguam molestiam homini pariunt si eis apta objecta in quæ operentur defint, & præterea animum quoque non leviter afficiunt. Cum ventriculus acquisita per consuetudinem vi fortius latrat, neque habet quod mordeat, se se, ut ita dicam, mordet, excruciatque. Cum vero per animalis Œconomix leges constitutum sit, ut ei dolenti omnia compatiantur, quemadmodum per validum illius tenorem omnia firmantur; sequitur hominem aut voraciorem, aut statim horis comedere fuetum, si sine cibo detineatur, toto corpore male habere. Addite quoque, bilem in duodenum deciduam, neque cibum ibi nascam, quo super operetur, atque in quem suam vim exerat, nudas intestini membranas fortius vellicare, novamque molestiam jejuno homini creare. Hinc qui fame laborant morosi, iracundique sunt. Hinc, ex lepidissimo Plauto, vetus adagium: *fames, & mora bilem in nasum conciunt*. At pejus est, ubi organorum a voluntate nequaquam pendientium actiones, per vim a consuetudine additam vividiores, illiusmodi fuerint, quæ non molestas, sed voluptuosas, jucundasque ideas excitent. Alte adeo in cerebro ideæ istæ exculptæ, ut ita dicam, tunc remanent, ut fere præsentibus homini fiant, neque actus, a quo pendent, opera, ut excitentur, indigeant, sed ipsæ, organa actui illi inservientia, ad actum sollicitent. Nisi tunc rationis, animique vis vincat; homo per se in voluptatem pronus, voluptatis mancipium fit; neque a consuetis voluptuosis actibus sine labore

&

& nifu se se continere valet . Ita de gula , ut reliqua mittam , ille naris emunctæ vir Lucianus : *Gula , ea quibus assuevit , flagitat , quæ , cum negantur , indignatur* (a) . Sed nos fabri fabrilia tractemus , atque Ethicis omissis , quæ nostra sunt , Physica nempe , & Medica prosequamur .

XXXIX. Diximus de physica consuetudinis vi relate ad actionem : nunc de eadem relate ad passionem dicendum est . Tritum Philosophis axioma est : *ab assuetis non fit passio , & si fit , non tanta* . Rei rationem reddunt , idem aliis verbis dicentes ; minorem , scilicet , impressionem nobis facere quibus assuevimus . Effectus causam physicam non aliunde duci posse censeo , quam ex supra posito principio ; scilicet , consuetudinem , relate quoque ad passionem , patientibus partibus vires addere , habendamque esse pro viribus auctis . Ubi enim corporis sentientis vis aucta fuerit , potentiæ in illud agenti magis resistit , eoque ab ea , aut minus patitur , aut prorsus non . Passionis sensus , ex certissimis observationibus , non in organo , quod a sensibili afficitur , sed in sensorio communi fit ; ac major , aut minor in communi sensorio excitatur (posito , neque organum , neque sensorium vitiatum fore) quo major , aut minor est mutatio in organo a sensibili objecto inducta : necessario hinc sequitur , sensorium commune minus affici , ubi in organo mutatio , seu impressio minor facta est . Quoniam ergo in assuetorum ad organa applicatione passionis sensus in sensorio minor est ; necessario inferendum assuetorum applicationem minorem mutationem , præ insuetis , in organis , quibus

(a) de iis , qui merced.

bus applicantur, inducere; seu organa iis magis resistere; seu organa, relate ad consuetorum applicationem, firmitiora evasisse. Rem exemplo illustremus. Prope aliquem tormentorum bellicorum explosioni minime assuetum, tormentum aliquod explodatur: tremit iste, & toto concutitur corpore. Insueta, vehementiorque vis, quæ aer tympani membranam, quæ ad finem meatus auditorii est, percutit, maximam mutationem in ea inducit, quæ, mediis ossiculis, organo auditus in Labyrintho latitanti communicata, ac mediis organi nervis ad commune sensorium delata, eam speciem homini excitat, quæ cum tremore, & corporis universi concussione conjungitur. Cum vero (ut quæ apud omnes Physiologos certa sunt assumamus) ossiculorum auris muscoli sentiant, irritabilesque sint; a vi illorum fibras insigniter afficiente divelluntur, extimulanturque, ac majorem solito fluidi quantitatem, qui stimuli solitus effectus est, recipiunt. Iterum, iterumque vim explosionis sentiant: vehementer iterum iterumque concutientur: liquidum copiosius iterato in eos influet: hinc illorum vascula capaciora evadent: vim sanguinis majorem, quam antea recipient, continebuntque: largius illorum fibrillæ nutrimentum capient: torosiores, firmioresque fient, atque a membranæ tympani concussionibus minus patientur: scilicet, iis plus resistent: leniores tremores auditus nervis communicabunt; istique lenius trementes, minoris momenti species in cerebrum, & in commune sensorium deferent. Ita qui quondam unius tormenti explosionem sine totius corporis concussione ferre non poterat; organo per consuetudinem paulatim firmiore reddito, absque mole-

molestia immanem inter illorum fragorem versatur. Litteris proditum est, obsidionales milites aliquando post noctes plures evigilatas, prope tormenta assidue explosa somnum placide captasse. Id non a sola consuetudine, sed etiam a vi somni sensorium afficientis, ac ne fragoris species per nervos ad illud allatas sentiat, impredientis, contigit.

XL. Unum hic animadvertere opportunum duco; magis, scilicet, lædi, quicumque contra consuetudinem (sive internis, sive externis; sive voluntariis, sive spontaneis machinis inducta ea fuerit) operatur, atque laborat; quam qui præter consuetudinem ab opere cessat. De voluntariorum organorum consuetudine res satis in aperto est. Quis enim ajat, Bajulum magis lædi, si a solitis laboribus cesset, quam Sellularium artificem, si Bajuli labores subeat? At attente consideranti haud minus patet idem evenire, ubi de consuetudine internorum, & involuntariorum agatur. Cibo plurimo assuetus minus sibi malum, immo fortasse nullum, creabit, si ab ingluvie temperet, quam si frugi & temperans plurimo se se oneret cibo.

XLI. Cæterum de vi consuetudinis plura, & admiranda traduntur. Inter alia litteris proditum est, homines venenis quoque ita paulatim assuevisse, ut cum se tandem veneno conficere voluerint, id frustra ab iis tentatum sit. Animum ipse induco, venenorum Doctrinam, Praximque, Medicos latere, neque iis, præter soporifera & rodentia venena (de illis loquendo, quæ execranda maleficorum hominum opera adhiberi possunt) alia nota esse. Quod soporiferis homines paulatim ita assuescere possint, ut impune tandem

dem eam quantitatem veneni hauriant , quæ sine consuetudine prævia, illis necandis fatis foret ; præter ea , quæ habemus de usu Opii apud Turcas , atque illa , quæ in historiis medicis prostant ; ex mea Praxi ipse didici . Verum rodenti veneno animalium fibras ita assuescere posse , ut tandem vim , rosionemque non sentiant ; tunc ipse credam , cum mihi constiterit consuetudine posse præstari , ne ignis admotus comburat , destruatque , neve cultelli acies adacta fecet . Quæ , dum adhibentur , ea quibus adhibentur , destruunt ; profecto adhibentibus consueta fieri neutiquam possunt . Sed ad argumentum nostrum revertamur , illudque tandem aliquando claudamus .

XLII. Peracuto morbo quispiam ægrotet , eo , nempe , qui circa septimum judicandus est . Ratione morbi , ex veterum sententia , in solo Ptisanæ cremore continendus ille est . Vires morbo sustinendo necessariae in eo satis firmæ , cibum pleniorē nequaquam desiderant . Assuetus tamen sanitatis tempore cibo plurimo , plurimumque alimentitio illius ventriculus saturari , tam tenuiter cibatus aliquid molesti patitur . Ventriculi porro passiones in acutis morbis officere ægrotanti solent , utpote quæ , ex Practica observatione , & humoris morborum coctionem , & motus ad cutem salubres impediunt , & turbant . Huic igitur incommodo occurrendum est , & consuetudini dandum . Sed quantum ? Ex naturali Hippocratis (a) dialectica id inveniamus . Aiebat ille : *Ex duobus magnis , magna & quæ oriuntur existunt* . In nostro casu , stant hinc morbus & vires , quæ simul cibi parcitatem necessa-

(a) 6. Epid. sect. 4.

cessariam demonstrant: hinc sola consuetudo tam tenui cibo nequaquam contenta. Morbus & vires magna ambo sunt: magna ergo indicatio, quæ ab iis exoritur. Duobus hisce magnis sola opponitur consuetudo, atque illiusmodi, cujus vis minor est. Neque enim, quod gravius foret, contra consuetudinem aliquid ægro præstandum est; sed præter consuetudinem ab assueto opere cessandum ei est. Unum igitur consuetudo est, neque, magnum quid est. Minoris momenti, igitur, est indicatio, quæ ab hac exurgit, quam quæ nascitur a duobus, & magnis. Ubi ergo ex hisce indicationibus aliqua insuper habenda foret, minus profecto malum esset parvæ, quam magnæ non satisfacere. Sed utrique satisfaciendum, atque ita res temperanda, ut dum majorem adimplemus, minorem non omittamus; neque, dum minori satisfacimus, multum ab eo, quod major postulat, digrediamur. *Aliquid*, igitur, tantum, non *multum* consuetudini dandum; ne si multum ei demus, alteri majori indicationi officiamus; morbo scilicet, qui permittentibus viribus paucissima postulat, opitulemur. Revera Magnus magister nequaquam docuit consuetudini *plurimum* dandum esse, sed *aliquid* tantum; cum tamen morbo, morbi causæ, & viribus plurimum sempertribuendum docuerit. En ejus verba: *Dandum vero etiam aliquid est tempori, regioni, ætati, consuetudini* (a). Atque hæc, ni fallor, ostendunt, quantum ab Hippocratis mente ii aberrent, qui ratione consuetudinis, cui dandum aliquid ex Hippocrate est, plenius acute ægrotantes nostris diebus alendos esse docent; quoniam si etiam verum esset, quod falsum

(a) 17. aphor. 1.

ostendimus ; frugalius , parciusque superiores nutriri consuevisse ; nihilominus cum novæ consuetudini aliquid solummodo , non multum tribuendum sit ; id nequaquam exigere potest , aut debet , ut qui , ratione morbi , extreme tenuissimo , aut simpliciter tenuissimo victu premendus esset , largiore , plenioreque nutriatur .

III.

A Brepta ab illorum manibus , qui ea abutentes , ægris adeo in victu indulgent , Hippocratica auctoritate , reliquum nobis nunc est , ut solidiora principia afferamus , atque explicemus , quibus febrientium diæta regi debeat . Agite igitur , rem aggrediamur , utilissimumque argumentum serio agitemus , atque in partes omnes illud versemus , ut undecumque considerari possit .

II. Ex curatione ipsa nos edoceri , qualis fuerit morbus , Magni Hippocratis (*a*) monitum est : quod quamvis de peculiari morbo a nimio cibo inducto prolatum ab eo sit , de morbis omnibus dici posse , & ratio , & observatio ipsa satis ostendunt . Cum igitur videamus acutas febres , morbosque , qui paulatim non decidunt , sive spontaneis tantum , sive petitis evacuationibus solvi ; necessarium dicendum est , eos a materia , quæ evacuanda erat , productos fuisse . Quidquid de morbosorum humorum vitio , tum a veteribus , tum a recentioribus dictum est , aut aperte falsum , aut dubium profecto est . Dixere veteres , ut de febribus , quæ nostrum argumentum sunt , loquamur ,

(*a*) 17. aphor. 2.

mur, eas produci a putredine sanguinis, bilis, pituitæ aut melancholiæ. Verum hoc humorum quaternarium sanguinis detecto circuitu evanuit; & humorum putredo, quam cæteroquin Hippocrates in febribus nequaquam novit, nisi aliunde iis accedat, exulavit. Calor febrium causa formalis, seu, ut loqui amabant, febrium essentia putatus, pro solo febris effectu a sanioribus habetur, idque cohærenter Hippocraticæ sententiæ in libro de Prisca Medicina exarata. Caput extulit, neque infeliciter dominium in medicina tenuit acidum, quod pro origine, & fonte febrium habitum fuit; at ab observationibus, ab experimentis, a ratione fractum, atque e folio detrusum, vix fautores, amicosque hodie nanciscitur. Venere e Batavia diversæ acrimoniarum species, Borerhaaviani ingenii hypotheses, & filiæ, quibus tamen jugulandis, quasi totidem arma, experimenta ejusdem insignis Viri in illius eximio Chemiæ opere præsto sunt. Rationi magis, atque observationi respondere videntur lentor succorum, ac densitas, varique lentoris, ac densitatis gradus. At præterquamquod gradus hosce dimetiri, & distinguere ex iis est, quæ haud fieri possunt: præterquamquod omnia febrium phænomena ab iis ducere Practici nequimus, aut nescimus; haud raro sanguinis extracti observatio rem dubiam plurimum facit. Indubium vero, constans, perpetuumque ab usque medicinæ primordiis est, neque arte, neque sponte febres, morbosque paulo acutiores curari, nisi per evacuationes; eoque, si verum est, curationem ostendere, qualis fuerit morbus; in eo medicos omnes, vel ingratis, consentire

debere, morbos per evacuationes sanatos, a materia, quæ evacuata est, cujuscumque indolis, aut Naturæ ipsa fuerit, ortum traxisse. Neque obstat, obviæ adeo observationi tam parum nos medicos attendere, ut de causa interna acutæ febris disputantes, vix ad quantitatem, sæpius ad qualitatem morbosæ materiæ respiciamus; quin, ubi evacuationes molimur, idipsum respectu solius qualitatis frequentius præstemus; sive, ut impedimenta tollantur, quæ illius correctionem impediunt; sive, ut per evacuationem, novo inducto motu, per eum qualitas vitiosa emendetur. Fieri enim facile potest, ut Apologi Astrologum imitemur, qui dum remotissima Cœli summa cura lustrabat, scrobem, quæ ante pedes ei erat, minime videbat. Propositam veritatem, & novit, & scriptam reliquit Galenus (*a*) *Magni siquidem morbi judicantur omnino, quicumque autem parvi, solvuntur solum*. Scilicet: magnæ ægritudines per evacuationes solummodo sanantur; parvæ autem, sine evacuatione, quæ oculis appareat, finiuntur. Ideo a meritissimo Martiano sic animadversum fuit: *morbis magnis simul, & acutis, absque multitudine (morbosæ scilicet materiei) fieri non potest*. (*b*) Quod breviter, atque succose a celebri quoque Heurnio (*c*) traditum est: *acuti morbi a materia auferenda sunt*.

III. Proposito principio objici potest ex Anglo Hippocrate Sydenhamio (*d*) *dari quasdam febrium species, quas Natura methodo sibi peculiari sine visibili aliqua evacuatione ablegat, reducendo, scilicet, in sanguinis massam,*
ei-

(*a*) 3. de crisib. c. 4.
 (*c*) ad 5. aphor. 2.

(*b*) sup. 36. acut.
 (*d*) sect. 5. c. 2.

eique assimilando materiam illam morbificam, quæ cum eodem minus quadrabat. Sed quicumque totum Sydenhamii locum perleget, næ videbit, febres, de quibus loquitur, ex iis ad amissim esse, quæ ex Galeno, & rei veritate, non judicantur, sed solvuntur, parvas nempe. Cum enim eximius vir præter Cerevisiæ tenuissimæ potum, & a cibo abstinentiam, nil aliud febribus iis præstaret, permissio interim, & consueti exercitii, & auræ liberioris usu; ecquis non videt febres hæcæ pusillas admodum, tenuesque esse debuisse? Hujusmodi febres igitur non judicantur, ex Galeno, neque ex iis sunt, de quibus loquimur, sed solvuntur. Num vero solvantur, ut ait laudatus Auctor, eique cohærenter Boerhaavius doctissimus, (a) dubium cuiquam suboriri potest. Quispiam etenim forte putaverit, tunc potius insensilem transpirationem adauctam, vel sensibiles evacuationes paulo copiosiores factas, cui evacuationum augmento vix est qui attendat, febrienti salutem attulisse; non autem, quia materies morbosa sanguini assimilata fuerit, ideo ægros evasisse. Mihi perplacere haud negavero, quæ, licet Enthusiasta, habet Helmontius: (b) ait iste: *non enim Natura pila ludit, ut excrementa e vitæ commercio avulsa iterum in gratiam recipiat.* Quidquid in humano corpore a vitæ commercio avulsum est, ipse pro excremento habeo. Adeo autem febrilis materies a vitæ commercio avulsa est, ut vitæ & bellum, & mortem inferat.

IV. Objici quoque posset, febres acutas a causis, quæ evacuant, exhauriuntque aliquando fieri, in quibus

(a) 595. de cognosc.

(b) Pleura furens.

bis adeo materies auferenda pro causa morbi habenda non est, ut dicendum sit potius, ideo tunc morbum exortum fuisse, quia necessaria sanitati conservandæ materia defecit. Res hæc longiorem disquisitionem desideraret; facile enim contingere potest, ut in existimatione causæ externæ febris decipiamur. Consideramus enim, quæ evacuantur solummodo; sed neque ad statum egri, qui evacuatur; neque ad excretionem, quæ, una aucta, supprimuntur, mentis oculos convertimus. Verum, quidquid hac de re sit, certissimum est, rarius ab exhaustu, atque inanitione morbos acutos contingere; ipseque toto tempore, quo Praxim assidue exercui, unicam acutam febrem, quam causæ exhaurientes induxerant, observavi. Ubi hoc acciderit, neque principio a me proposito, neque illationi ab eo principio ducendæ locus est. Ut in morbi curatione, victusque institutione tunc eundem sit, exemplo curationis a Galeno præstitæ vobis demonstrabo. Interim, quod frequentissimum est, ante corporis, mentisque oculos habentes, pro firmo, ratoque habere debemus, acutos morbos, febresque, ut plurimum a materia auferenda procedere, quia frequentius, & quotidie, pene dixerim, videmus, ægrotudines hæc per evacuationes solummodo, aut per artem, aut a natura molitas sanari.

V. Hæc evacuationes, siue spontaneæ, siue petitiæ fuerint, vitæ vires superstites, quæ vera natura sunt, movent. Ac de spontaneis loquendo, res per se adeo clara est, ut oculis pateat. Ad eas vero, quæ artis ope fiunt: cum medicamenta in cada-

ver

ver non agant, ad illorum actionem vita requiritur, quæ sine viribus esse non potest. Sunt igitur vitæ vires, quæ a medico medicaminibus, quasi totidem adjumentis adjunctæ, morbose humoris expulsionem moluntur. Sed ne putetis, id a vitæ viribus eo facilius præstari, quo validiores eæ sunt. Cum morbus acutus nil aliud sit, nisi materies auferenda cum impetu, & magna motus quantitate acta; quo magis vires valent, eo magis materies cum impetu movetur: quo autem majore impetu materies morbosa agitur, eo magis vitæ functiones a naturali recedunt: in magno autem a statu naturali functionum recessu, evacuationes symptomaticæ, utique; criticæ autem, & salubres fieri non queunt. Vires igitur in morbo acuto nequaquam augendæ, nisi ubi symptomata eas nimium pessumdederint, quia viribus auctis magis motum intendimus; quo magis autem motus intenduntur, morbus acutior fit. Sed neque, quales in ægro invenimus, sunt sustinendæ. Si enim eadem sustineantur, in gradu eodem morbosus motus sustinetur: sustentato autem in gradu eodem morbofo motu, morbus quoque acutiei gradum eundem servat. Convellendæ igitur vires sunt, ne vehementer morbosa materies agatur, non augendæ, neque intendendæ; cumque quantum satis est convulsæ fuerint, in eo statu detinendæ, ut salubriter movere possint. At quousque convellendæ sint, illud est, quod diligentiores considerationem desiderat, quam nos suo loco præstare conabimur. En igitur tria præcipua principia, quibus totus rei cardo innititur. Primum est, *febrem acutam a materia auferenda fieri*: alterum. *febrem acutam esse*

materiam auferendam cum magno impetu actam : Tertium tandem , ut materies auferenda salubriter auferatur , vires quidem esse aliquousque minuendas , sed non prosternendas .

VI. Ex positis principiis fluit , neque plurimos cibos , neque qui plurimum substantiæ alimentitiæ sanguini infundunt , neque qui plurimum actuosæ materiæ illi inferunt , acute febrienti conducibiles fore . Non plurimos , quia morbus detractionem , non additionem poscit . Non plurimum alentes , quia magnam resistantiam , ac laborem viribus objiciunt , & parant , eoque eas magis lædunt , quam juvant . Tandem , non qui plurimum actuosæ substantiæ sanguini addunt , quia tunc motus ex leges , qui in febre acuta sedari debent , concitantur , intendunturque .

VII. Dixi cibos plurimum alentes , resistantiam , ac laborem vitæ viribus objicere . Id cum primis docemur a Celso : (*a*) *quo valentior quæque materia est , eo difficilius coquitur* . Sed parum foret id a Celso scriptum fuisse , nisi magni Sanctorii statera , & quidem clariss. Gorter , qui eum satis acriter excutere solet , minime dissentiente , idem nobis confirmasset . *Cibus multi nutrimenti* (ait Sanctorius) *stringit alvum , nisi corrumpatur , difficile coquitur , & parum perspirat* (*b*) . Ex Hippocrate (*c*) autem , *alimentum , quod ægre commutatur , ægre consumitur* . Porro quod ægre consumitur , ægre quoque subigitur ; quod vero subactioni , & assimilationi resistit , viribus quoque subigentibus , & assimulantibus resistit . Sed quo major est resistantia viribus objecta , eo major est virium labor ; ac quo major illarum labor , eo major earundem consumptio . Nos
autem

(*a*) l. 2. c. 18. (*b*) de cibo & pot. aphor. 18. (*c*) de aliment, tex. 10.

autem in morbo acuto imminutas quidem vires volumus ; consumptas , prostratasque nolumus . Cibi ergo plurimum alentes , quia vires non juvant , sed iis officiunt , alieniores acutę egritudini sunt . Nunc nobis inquirendum est , num jura consummata , succi e carnibus expressi , ac restaurantia , sic dicta , hujusmodi sint , quęque proinde a principiis propositis respuantur . Quod dum præstamus , colligere poteritis , veteres sola observatione duce ; ut ut sibi viderentur rationem quoque sequi ; victum animale ab acutis febribus , morbisque excludendo eo pervenisse , quo ratio solidior a Chemicis adjuncta experimentis nos perducit , quamvis temporum vitio , ibi , quo perducti sumus , minime consistamus .

VIII. Animalem victum alimentitia substantia præ vegetabili abundare , & medicorum auctoritas , & hominum Praxis satis significant . Tum a veteribus , tum a recentioribus Medicis unanimiter creditum est , id , quod e cibis alit , esse succum , seu substantiam glutinosam , gelatinosamque ; adeo ut ille cibus magis alat , qui hoc gelatinoso succo magis abundat . Hac gelatina igitur , si vegetantia carent , abundant autem animalia ; non modo , auctoritas , atque usus ; sed ratio quoque certiores nos reddet , uberiores ex animalibus , quam e plantis alimoniam nobis suppetere . Clariss. Gallus Geoffroy , ut est in monumentis R. S. A. quæ Parisiis est (*a*) inquirere voluit , quę e carnibus in humanum victum cedentibus , hoc alimentoso glutine magis abundarent . Nos ex iis , quas ille Chemice examinavit , sumemus solummodo Bubulam ;

K

Vitu-

Vitulinam, Vervecinam, & carnem pulli, quoniam hisce frequentius in ægrotantium victu utimur. Quatuor igitur unciaë Bovinæ carnis, dedere extracti, substantiæ nempe gelatinosæ, quam quærimus, drachmam plus granis quinquaginta sex. Unciæ quatuor Vitulinæ, dedere extracti drachmas binas plus granis triginta. Vervecina ad idem pondus, drachmas duas plus granis quinquaginta octo extracti exhibuit. Quod ad pullum autem, adhibuit hujus carnem, & ossa simul pendentia uncias novem cum semisse, plus granis quadraginta octo, atque ex hisce habuit extracti drachmas septem, plus granis triginta sex. Ut comparatio horum extractorum facilius fieri possit, pulli carnem reducamus ad medietatem ponderis ab Geofroy adhibiti, scilicet ad uncias quatuor, plus drachmis sex, & granis viginti quatuor. Dabit hæc extracti drachmas tres cum semisse, plus granis duodeviginti. Ex hisce apparet, omnibus hisce carnibus, quibus ad ægrotantes utimur, succum gelatinosum plurimum alentem inesse: plus pullo, quam Verveci: plus Verveci, quam Vitulo: plus Vitulo, quam Bovi. Cerealia femina iste nequaquam examinavit: laus hæc nostrum Italum Bononiensem manet.

IX. Clariss. Jacobus Bartholomæus Beccarius Publ. Bonon. Profess., quo in viro nescias, num morum suavitas, quæ in eo summa est, an medicarum, physicarumque rerum scientia major; varias seminum Cerealium farinas examinavit, atque in sola Triticea gelatinosam, glutinosamque partem invenit. Hæc autem Triticea Glutinosa pars, periculo facto; digestionem scilicet; cum acidis miscella, ac distillatione ipsa;

psa ; tantam animalis substantiæ speciem præsetulit, ut (rem verbis doctissimi, elegantissimique Scriptoris Commentariorum Instituti Bononiensis (*a*) dicam) qui illam nesciat e frumento esse educatam, animale esse sine ulla dubitatione facile asseveret. Sed hic obiter adnotetis velim., ut huic experimento respondeant, quæ docuit Hippocrates de vi Tritici plurimum alimentitia. Secundo de diætâ, textu septimo scripsit: *Triticum fortius est bordeo, & magis nutrit*. Textu quadragésimo secundo libri *de affectionibus*, vocat alicam, & Ptisanam triticeam, sorbitiones fortiores. Textu quinquagesimo secundo ejusdem libri, panem inter alimenta primo loco recenset, quæ ad augmentum, & robur faciunt. Ac sexto Epidem. sectione tertia, ad Eufarciam minuendam præcepta tradens, inter alia docet, pane modico utendum esse. Inter diversa vero Tritici genera similam, quam esse nostrum Patavinum Triticum ex ore celeberrimi nostri Pontederæ, nimis cito nobis erepti, habui, fortiolem reliquis & magis alentem scripsit (*b*). Nonne mirari subit, aut eum, aut illius superiores Medicos, rem cognitu difficillimam (observatio enim in sanis instituenda est, qui solo pane haudquaquam vescuntur) solius Practicæ observationis ope, quæ in casu oppido æquivoca non esse non potest, acu, ut dicitur, tangere potuisse? Id sane confirmat, quod a Plinio animadversum, traditumque est (*c*). *Rudis fuit Priscorum vita, atque sine litteris*. Non minus tamen ingeniosam fuisse in illis observationem apparebit, quam nunc esse rationem. Sed e diverticulo in viam.

X. Beccarius itaque, si Triticum dematis, reliquis in frugibus substantiam hanc gelatinosam, quæ plurimum alimentitia putatur, nequaquam invenit. Ergo si quo plus alimentitiæ substantiæ alicui cibo inest, eo magis, ex iis quæ supra diximus, viribus vitæ substantiam eam subacturis resistit: quo autem plus resistit, eo alienior acute egrotanti est; necessario consequitur, victum animale, quique animale indolem, naturamque sapit, acute ægrotanti minus conducibilem fore. Ergo omni jure ab Hippocrate, atque ab Hippocraticis viris a victu acutorum animales cibi, atque e Tritico parati exclusi fuere.

XI. Quod si, quia valentioris substantiæ sunt cibi animales, acutis febribus alieni sunt; multo alieniores erunt, quo plus substantia hæc valentior, meraca, impermixta, atque a reliquis, quæ illam contemperent, discreta fuerit. Præter non paucas activiores moleculas, de quibus mox, plurimum aquæ examinatis a Geoffroy carnibus inest, ac non parum fibrarum exsuccarum, quæ ignis vi violentiore agitata alia decomposita dant, ac tandem caput mortuum relinquunt. Hæc omnia in carnis composito mixta, & confusa, invicem se se corrigunt, hebetantque; discreta vero, facultates, quibus pollent, vehementer exerunt. Ita vini spiritus, qui etiam reliquis vini partibus mixtus, iisque invalidior factus hominem inebriat; multo magis idem præstabit, & præstat, ubi per distillationem ab aliis diditus, atque secretus bibatur. Porro, quod distillatio vini spiritui dat, idem longior decoctio, aut expressio carnibus tribuit. Solus etenim succus expressione prolicitur: longa autem
tem

tem coctione, totum quantum est, illius gelatinosum extractum habetur. Substantia itaque alens, quæ reliquis etiam immista acutæ feбри non convenit, hisce operationibus meracior facta, atque, ex dictis, quo meracior, eo noxior, minus conveniet.

XII. Diximus, nequaquam cibum illum acuto morbo convenire, qui motum in humoribus, quo feruntur, auget. Si igitur vis ista sanguinem fortius agendi consumptis juribus, atque extractis restaurantibus insit, nemo sane, qui ratione uti velit, asserere poterit, ea acuto morbo conducere. Quid enim ineptius, ne dicam stultius, fieri posset, quam si dum Medicus Pharmaceuticis, Chirurgicisque auxiliis, manibus, pedibusque, ut ita dicam, facit, ut impetus, quo fertur morbus, retundatur; Diæteticiis interim impetum eundem exuscitaret, concitaretque? At valentior, de qua loquimur, alimonia id præstat; iis etenim principiis scatet, quæ urgent, quæ irritant, quæ calefaciunt, quæ agitant.

XIII. Laudatus Geoffroy ex drachma plus granis quadraginta sex extracti, quod e quatuor unciiis Bovinæ carnis habuit, prolicuit drachmam, & grana duo salis volatilis, insuperque grana triginta octo spiritus, atque olei. Caput mortuum sex solummodo grana pondere æquavit, ac grana decem, quæ evolavere, activioribus, volatilibusque partibus addenda sunt. Ex proposita igitur quantitate extracti, præter grana sex, totum volatile, activissimumque fuit. Ex drachmis duabus extracti Vitulini plus grani triginta, drachmam, & duodecim grana eduxit salis volatilis, olei, & spiritus. Pars iners, inutilis-
que

que drachmam ponderavit : grana duodeviginti evolvere subtilioribus, & ista addenda. Binæ drachmæ plus granis quinquaginta octo extracti Vervecini, drachmam unam falis volatilis, atque alteram spiritus, oleique dedere. Capitis mortui pondus fuit granorum quinquaginta quatuor: amissum, ideoque volatile, grana quatuor. Drachmæ tandem tres cum semisse, insuperque grana vigintiquatuor extracti e pullo, proportionem servata ad pondus, quod Geoffroy examini subjecit; exhibere debuerunt spiritus, oleique cum phlegmate drachmas duas, ac grana septem cum dimidio; nec non falis volatilis, atque olei (binis enim distillationibus analysin hanc exegit) grana viginti novem. Carbo, seu caput mortuum drachmas duas, & grana viginti; amissum autem volatilibus adjiciendum, grana septem plus dimidio æquare debuit. Ex hisce facile perspicere est, ut major horum extractorum pars in activioribus moleculis, impetumque facientibus consistat. Salia volatilia ad grana solummodo a Medicis præscribuntur: dum restaurantia ægris præscribunt, inscii, aliudque omnino se præstare putantes, eadem ad drachmas plures dant. Animadvertite, studiosi Juvenes, ex relatis Clar. Galli analysibus constare, substantiæ volatilis copiosior vim in Bubula, quam in Vitulina, contineri; quod congruit iis quoque, quæ alter Gallus Clar. Lemery (*a*) tradidit. Scitote quoque ab Geoffroy observatum firmiter, consistentiusque extractum e Vitulina, quam e Bubula haberi; quod observationi nostrorum Italorum Beccarii, & Montii respondet

(*a*) Trait. des alim. T. 2. cap. 3.

det (a). Id adnotasse, ex usu vobis aliquando in Praxi esse poterit.

XIV. Sed, ut quæ sentio ingenue fatear, videmus utique ægros a restaurantibus, a consumptis juribus, a carniū succis assumptis, & aliquanto intensius calere, & coloratiores fieri; eas tamen turbas, tumultusque, qui tantam volatiliū, spirituosorumque vim sumptam consequi deberent, nequaquam videmus. Scitis unde hoc? In memoriam revocate, quæ ex Celso, & Sanctorio supra diximus: valentioris, scilicet, substantiæ cibos haud facile coqui, digeri, atque in chylum converti. Cogitate insuper, vehementiore ignis Chemici vi opus esse, ut volatilia isthæc ab invicem extricentur, atque evolent. Activiora igitur ex iis, quæ facili nexu reliquis coherent, atque implicantur, a solo stomachi calore exaltata, sanguinem ingrediuntur, ingressaque illius quidem motum concitant, sed non ad eum gradum, ad quem illum concitarent, si universa, quæ restaurant, seu extractum sumptum continet, venas subirent. Quæ igitur venas ingressa sunt, quod suæ facultatis est, exerunt: vires noxie augent, utque sanguis in motum aliquanto citatiorem rapiatur, efficiunt. Atque hinc & calor, & color. Quæ vero in stomacho immota resident (neque enim stomachi calor is est, qui gradum Chemici ignis, ad illa extricanda, sursumque rapienda necessarii æquet) ei oneri, & incommodo sunt. Ex Helmontio, qui amplissimum sibi arrogavit privilegium, tum in medicina, tum in latino sermone nova cudendi nomina, *Cadaverantur*; ex laudato autem meritissimo

fimo Sanctorio , aut alvum duriores faciunt , aut corrupta , plus æquo teneriorem reddunt . Quantum autem utrumque acute febricitantibus obsit , tunc planissime perspicietis , cum iis medebimini .

XV. Non negandum , eos in acutis morbis casus Clinicis aliquando offerri , qui promptissima virium excitatione , aut instauratione egent ; quapropter illis , activioribus , & volatilibus , quæ cito per vascula inhalantia , aut si vultis , per membranarum poros in venas eant , succurrendum est . At isti infrequentiores sunt , quam putatur , neque auxilia ea , quæ non solum tempore , sed ventriculi quoque viribus egent , ut operentur , iis apta sunt . Præterea vires eæ , quas tunc , ut tempori , & necessitati obediamus , sufficimus , tumultuosæ , ac prope dixerim , seditiosæ , brevioris temporis , fugacesque sunt . Quas tamquam curationis basim , fundamentumque sustinere debemus , hujusmodi non sunt , sed moderatiores , consistentioresque ; de quibus abs re haud erit , ut pauca dicamus . Ita ciborum , quæ reprobamus , inutilitas , & nocumentum magis semper , magisque apparebit .

XVI. Tria cibus sumptus animali præcipua præstat . Cum primis , fluidorum consumptorum , deperditorumque quantitatem refarcit : secundo , vires imminutas restaurat : tertio tandem in locum molecularum , quæ per vitæ functiones a solidis partibus detritæ , ac veluti abraſæ , ablatæque sunt , novas solidas particulas apponit , sicque necessariam solidorum robori , & resistentiæ substantiam restituit . Si forte nova , & scitu jucunda scire avetis circa nutritionis materiam , & rationem , qua fit , adite oculatissimi Buffon observationes *micro-*
scopi-

scopicas, superque iis extructum sistema. Primum ciborum opus aliquando est, non jam fluida restituere, sed vires instaurare, & augere. Id ea alimonia præstat, quæ spiritu, & sale volatili turgida est. Tunc a solo oris & ventriculi calore activissimæ volatiles moleculæ exaltatæ, atque a reliquis crassioribus explicitæ; non per Regiam Chyli longiorem viam; sed volatu citissimo per membranarum intermediarum poros, & inhalantia vascula, animalis intima penetralia subeunt, & virium materia fiunt. Aliquando forte particulæ istæ vires non augent, sed acuunt, ratione stimuli modo agentes; per quem vires, quæ jam animali insunt, majorem in motum cientur, sicque majore momento organa operantia, & operatura afficiunt. At vires istæ, atque ista virium intensio fluxa, & brevioris durationis esse solet. Ut cito venit, sic cito abit. Hujusce rei certissimum nobis præbet argumentum vis a vinoso potu acquisita. Ubi etenim quis mero parumper incaluit, ac

. *Vini vis penetravit*

Acris, & in venas discessit diditus ardor.

se solito lætiores, loquaciores, robustioresque sentit. At commoda isthæc fugacia sunt, tamdiuque durant, quamdiu vinum nobiscum stat. Si enim e-brii non sumus; quo in casu ob vasorum tumentium in cerebrum auctas, aut inæquales pressiones contraria eveniunt; sed non ultra lætitiæ poculum ebibimus; vinum digestum cito consumitur, & cum allatis commodis cito abit. Vires consistentiores stabiliioresque eæ sunt, quas sanguis a cibo restitutus, tum elaboratus, animali suppetit: quas, scilicet, vitæ vim diu-

L

tius

tius perpeffus : a fupervacuis , brutifque , quæ vitalem characterem minime affumpferunt , liber , cum pluribus vitalibus liquoribus intime miftus : per vifcerum mæandros fæpius trajectus ; ac tandem per exillimos tubulos fluens in cerebro deponit , per nervos ad irradiandas partes lapfuras , & defcenfuras .

XVII. Ea igitur alimenta , eæque alimentorum partes vires hæcè fufficiunt , quæ cum primis manifefta qualibet acrimonia carent ; quæ nimium exaltatæ non funt ; quæque dulci , blandaque fubftantia , neque immodica , donatæ , facile fubigi poffunt , atque in bonum fanguinem converti . Cibaria ifthæc ideo vires conftantiores fubminiftrant , quia confumptis liquidis fuppetias veniunt , qui primus illorum effectus eft . Effectus autem ifte quantitati fumptæ alimonix refpondet ; adeo ut fi plurima haufta fit , fanguis copiofior , fi pauca , minus copiofus gignatur . Porro acute ægrotanti eam fanguinis quantitatem fufficiendam efle , quam fanus habebat , nemo fui compos docebit ; quoniam eam , quilibet ex hodiernis Medicis , data opera , & per artem minuendam cenfet . Liquorum igitur quantitas acute ægrotanti aliquoufque minuenda eft , & ex ea vires , quæ firmiores , confiftentioresque fint , quamvis non multæ , ægrotanti parandæ , quod neque copiofam , neque valentio rem , neque volatiliorem , activioremque alimoniam defiderat .

XVIII. Poftremus cibi affumpti effectus ex recensitis , eft , folidorum deperditorum reftauratio . Id in acuto morbo curandum nequaquam eft ; quique acute ægrotanti medicinam faciens folidæ illius eo in ftatu , quo , dum fanus homo erat , potiebantur , fufstinere in-

ten-

tenderet; eum, non modo doctrinis medicis; sed communi sensu carere dicendum foret. Cum igitur solidorum nutritioni studere Medicus tunc minime debeat; neque eo cibo ægrum alere debet, qui solidorum nutritioni ex una parte plurimum favet; ex altera vero, ob alias allatas rationes minime convenit. Talis est cibus ex animalium carnibus. Præterquam enim quod horum substantia nostræ persimilis, fibris nostris reparandis aptissima videtur; inter ea, quæ ad augmentum, & ad robur faciunt (augmentum autem copiosorem nutritionem supponit) ex Hippocratis monito (*a*) maxime valet: quod de aliis negando, de istis affirmavit: *Cibaria, & potus, & obsonia, excepto pane, & maza, & carnibus, & piscibus, & vino, & aqua, reliqua omnia tenues, ac debiles utilitates exhibent ad augmentum, & ad robur, & ad sanitatem.* Quod si animalium carnes non conveniunt acute febricitanti, quia nimium opimæ substantiæ sunt; multo minus opimiora ex eodem genere, & alimentosiora conducent. Hujusmodi autem sunt jura consumpta, expressi carnium succi, restaurantia sic dicta, quorum paucis unciis ea alimenti vis, & potentia continetur, quam ejusdem carnis, unde extracta sunt, libræ continebant.

XIX. Quod si postremo huic ciborum effectui in acutorum curatione nequaquam attendendum est; eximia alia utilitas, quæ a cibo apto in febre acuta venit, medico ante oculos habenda, Egregii Juvenes, est. Motus vehementior, quo in acuta febre rapitur cruor: calor motus hujusce comès, mobiliores,

(LXXXIV.)

res, solutu, exhalatuque faciliores particulas ab eo pellit. Siccescit hinc sanguis, illiusque particulæ, & densiores, & duriores fiunt. Sola jugis motus mechanica vis, ab illis viscidulam, blandulam, gelatinosam substantiam, quæ Balsamica vulgo dicitur, abradit: oleosa ita dissolvuntur: horum cum terreis, durisque unitas fit; atque ex hisce in unum coactis concrementa exurgunt vix solubilia, crassiora, duriora, irritantia, quæ universam corporis œconomiam magis usque, magisque depravant. Ubi sanguini partes istæ gelatinosæ suffectæ non fuerint, tantam acrimoniam acquirit; ut ab asperiore suarum molecularum in solida attritu, hæc omnia vehementer rubescant, inflammenturque; & animal, si etiam febre careat, & commoda valetudine gaudeat, in rabiem agatur. Quorum primum in brutis fame, consulto, enectis; alterum autem in hominibus jejunio, plures dies, maceratis observatum est. Quanto facilius id, motu acutæ febris urgente, & omnia depascente contingeret? Occurrendum igitur est huic maximo malo, atque operi necessario aqua plurimum epota utilissima est; quæ etsi gelatinosas, quæ depereunt, substantias, minime restitueret; nihilominus quia calorem compescit; & suæ substantiæ mistione aqueum quod perit, reparat; & oleosorum extenuationem, dissolutionemque coercet; & terrea, ac salina, quæ ab ea liquari possunt, liquat; ac liquata suo sinu, ut ita dicam, comprehendit, & secum vehit. At sola aqua omnes acute ægrotantes sustineri non possunt, & cibus dandus illis est. Cibus autem non alius esse potest nisi blandus, & mollis, qui motus non concitet, quique facillime subigatur, ut

pere-

pereuntia, & quæ perierunt cito restituat. Cum autem, ex supra positis, jura consummata, succi carniū expressi, restaurantia talia non sint; utilissimo operi in acutis præstando, nequaquam conducent.

XX. Post hæc generatim de cibis acutis febribus tam incongruis dicta, singillatim de iisdem pauca dicamus. Jura igitur consummata, ut ab iis incipiamus, quæ ex majore volumine, calore foci, in arctius contrahuntur, subtiliora, volatilia, ac mobilia, quæ iis insunt, deperdunt; remanet vero ex iis, quod lentius, crassiusque est. Sed, acute febricitans male fert, quæ difficulter coquuntur, & subiguntur; neque, vel ex eorum sententia, qui plenioris victus fautores sunt, valentiore materia, quæque plurimum digesta nutriat, opus habet. Vel iis eget, quæ vires prostratas erigant; vel quæ facile, & cito fluida consumpta restaurent. Neutrum porro ab hisce juribus præstari potest. Non postremum; quia quo valentior quæque materia est, minus facile coquitur ex iis, quæ supra posita sunt; ac quo difficilius coquitur, eo tardius in chylum, sanguinemque convertitur. Non primum; quia mobilia, & volatilia, quorum est illud præstare, longiore decoctione jam evolaverunt. Adeo autem apertum est hujusmodi particulas per ignis vim evolare, ut id sensibus ipsis pateat in eo odore, qui dum carnes coquuntur, neque vasa quibus incoquuntur exacte clausa sunt, exhalat. Jura igitur hæc consummata sunt totidem (liceat mihi sic loqui) damnata, & mortua capita, quæ solummodo ventriculo onus, liquidis vero circumeuntibus, si ea ingrediantur, viscositatem, atque lentorem afferre possunt.

possunt. Quid, quod jura isthæc, quamvis minime falita, sapida ebulliendo fiunt, & quandoque; nisi aquæ superaffusione id præveniatur; falsiora evadunt? Quod noto, non quia falis usum in ægrotantibus ipse damnum; sed ut significem vim ignis in illa tantum egisse, ut quæ salem in illis delitescentem obtundebant, ac ne manifestaretur efficiebant, in fumum & auras abire coegerit. Sed ne putetis me sine auctore asseruisse, eos etiam, qui victum pleniorē magis tutum acute ægrotantibus putant, validioris nutrimenti materiam reprobare. Fernelius, vir jure magni nominis, & sui temporis Medicus nobilissimus, felicissimusque, deceptus tamen a quinti aphorismi, quem explicavimus, apparente sensu; ubi de ratione agit nutriendi febricitantes, ait: *omnis autem febricitantium victus humidus, frigidusque habendus est ex materia levi* (*a*).

XXI. Viderint nunc moniales, apud quas mos obtinet (ita saltem apud eas comperi, quibus medicinam facere mihi datum fuit) statim a prandio panatellas parare, ignique admoveere, quas post multas ebullitionis horas in seram noctem suis ægris porrigere debent: viderint, inquam, ut infirmarum rem agant. Non modo e jure, sed e pane quoque juri addito, diutino adeo calore, tantaque, licet leni, ebullitione, quidquid utilius est exhalat. Quod si juri ab assidua ebullitione superstiti jus novum, idque iterato; addant, ut solet; nil aliud proficiunt, nisi ut ex crassa, crassiorē alimoniam infirmis parent. Sin aquam superaffundunt; eo tandem progrediuntur
(quod

(quod tamen in morbis acutis non inutile est), ut imbecillioris substantiæ cibum constituent.

XXII. Sed subdet quispiam : incommodo evolationis subtiliorum , mobiliorumque e restrictis juribus partium , occurri posse machina , seu digestore Papi-
niano , de quo in Actis Lipsiensibus (*a*). De decoctis eo opificio paratis , non habeo quid dicam ; nondum etenim illiusmodi decocta vidi , aut gustavi . At Præclarus Van-Svieten (*b*) ait , decocta carniū ad eum modum parata , saponaceum , satisque nauseosum odorem habere , dum pingue carnibus semper adhærens , ignis , & aquæ validissima actione in vase exactissime clauso sic attenuatur , ut aquæ intime misceatur . Addit præterea , hæc juscula nimis meraca esse , & dilutione indigere .

XXIII. Supra posuimus carniū extracta , seu restaurantia , non modo acute febrientibus non convenire , quia valentioris substantiæ sunt ; sed etiam , quia ex Geoffroy , cum mere volatilibus constent ; impetum , motumque sanguinis , si ad eum perveniant , intendunt . Aliis quoque de causis aliena illis ægrotantibus sunt . Laudatus Fernelius , ut ut victus plenioris amantior , hanc de hisce eduliis sententiam tulit :
Quæcumque autem crassiusculæ sunt materiæ , ut ea ipsa assa (loquutus fuerat de hædinis , vitulinisque carnibus) & *perdices , aviculæ montanæ , lepusculi assi ; & assorum quorumvis expressus succus , aut qui elicitur e carne in diplomate sine aqua elixa* (qui rem Pharmaceuticam tractant , diploma , seu vas duplex dicunt , cum , quod materiam coquendam continet , in altero vase
aqua

(*a*) ad annum 1682.(*b*) ad Boerh. §. 28. aphor.

aqua fervente pleno, ebullit) *quod nimium alant, ægre coquantur, æstumque in præcordiis excitent, non in acriter febricitantium, sed in sanorum cibis numerantur (a).*

XXIV. Præter igitur ea, quæ, ut hujusmodi cibaria reprobaremus, adduximus, alia quoque de causa ex Fernelio reprobanda sunt; quia, scilicet, æstum in Præcordiis inducunt. Verum enim vero, quoniam verba Fernelii illud mihi suggerunt, alterum argumentum accipite, quo alieniora febrientibus esse isthæc cibaria noscatis. Dixit Fernelius ea in sanorum cibis numerari. Huic asserto ipse subdam: quod si non alia argumenta ad ea damnanda suppeterent, ideo præcipue febrientibus noxia censenda forent, quia sanis conveniunt. Propositio est Hippocratis (b): *Quæcumque sanis commoda sunt, ea etiam ægrotis exhibita fortiora sunt, & oportet, detractò ipsorum vigore, dare ea; alioquin non feret ipsa corpus, sed magis lædunt, quam prosunt.* Videte ut Hippocratica observatio & sententia iis ad amussim quadret, quæ nos de facultate nimium alimentitia viribus inimica tradidimus. Cum sanorum cibi fortiores sint, alimento nempe plurimo sca-teant; hoc, quia plurimum, plurimam resistantiam viribus, & extra, & intra animal, uti ajebat Pitcarnius; in viis, scilicet, & extra circulationis vias, illud elaboraturis, & subacturis objicit: potentiæ autem istæ in ægro invalidiores sunt: ergo objectæ resistantiæ pares nequaquam erunt. Imperfectior itaque & Chylificatio, & assimilatio fiet: ex chylo non bene assimilato, necessario sanguis crassior, vitiosiorque gignetur; qui propterea tantum aberit, ut virium, & boni cruo-
ris

(a) loc. cit.

(b) de affect. text. 12.

ris materia fiat , ut potius nova morbosa materies futurus sit , quæ ægritudini suppetias ferat , eamque foveat , & geminet , quemadmodum adnotatum fuit ab Hippocrate : *sed magis lædunt , quam profunt* . Atque ob id potissimum alibi (a) ajebat magnus magister : *impura corpora , quanto magis nutries , tanto magis lædes* . Itemque : *cibus sicuti sano robur , ita febricitanti morbus* (b) . Non igitur ea cibaria , quæ sanis commoda sunt , ægris conveniunt ; quin ideo præcipue ægris nequaquam conveniunt , quia sanis commoda sunt . Cujusmodi cum sint jura restricta , restaurantia , expressa , carnes contusæ : isthæc acute febrientibus omnino aliena esse dicendum est .

XXV. Carnes sanis apta alimonia sunt : non ergo , quia fortior , febrientibus , ex Hippocrate , danda , nisi illius vigore detracto . Dum carniū expressos succos ægris exhibemus , illarum vigorem non minuimus , sed augemus : eo magis itaque contra Hippocratis observata , & præcepta peccamus . De conscissis autem carnibus , quid dicendum ? Res profecto admiratione , ne risu dicam , mihi semper digna visa est . Fatentur , carnes acute febrienti minime convenire , neque eas dant ; eas tamen conscissas præbent . Num cultellus , quo minutim tunduntur , ab iis demit , quod egro alienum erat , vel iis addit , quod egrotanti commodum ? Num ideo tantum ægris non conducunt , quia integræ , & non conscissæ aliquid laboris dentibus , maxillisque pariunt ? Num quia putant , conscissas facilius , quam commanfas , a ventriculo digeri ? Ad eum modum agere mihi videntur , atque illi , qui

M

ver-

(a) 10. aphor. 2.

(b) 67. aphor. 1.

verborum perquisitis subtilioribus interpretationibus, atque effugiis, leges, earumque vim deludere tentant. Carnes non dant, quia cibus actu humidus, nempe fluidus, febricitantibus, ex Hippocrate (*a*) præcipue, convenit. Juribus, aut panatellis minutim confectissas miscendo, ad Hippocratis mentem se conducibilem cibum parasse rentur.

XXVI. Neque minorem admirationem meretur usus, qui adhuc apud quosdam obtinet, dandi ægris in potum stillatitia analeptica e pullis, aut capponibus, quod Arabum inventum fuit, ut audiistis. Admirationem, inquam, meretur, in hodierna rerum Chemicarum luce, crassas adeo inter tenebras quosdam velle versari. Sciatis, hujusmodi stillatitia, nullius omnino utilitatis, aut commodi esse. Celeberrimus Boerhaavius, harum rerum, si quis alius, optimus judex ait (*b*) vires analepticas, per distillationem aquæ nequaquam communicari, deridetque nauseosam aquam Capponis stillatitiam. Meritissimus quoque Nuperus Charteufer in sua Pharmacologia rem eandem non unica vice monet.

XXVII. Quoniam autem in acutis morbis, ovis quoque pullorum quidam facile abutuntur, cum tamen iis non uterentur veteres, nisi in acutis ex decidentia, quibus plenus convenit victus; abs re haud fore arbitror de iis pauca dicere. Celsus docuit (*c*) mollia, & forbilia imbecillissimæ materiæ esse (intelligite in eo genere victus, ad quem spectant, in victu nempe animali). At Hippocrates ait (*d*) ea habere-

(*a*) 16. aphor. 1.(*b*) Chem. T. 2. Proceff. 16. 4.(*c*) l. 2. c. 18.(*d*) 2. de diæt. tex. 12.

habere robustum quid, atque alere, & inflare. Quæ quidem de ovorum inflante facultate sententia, a pluribus e populo, qui se id expertos asserunt, teneri scio; altera vero de vi plurimum alimentitia, ab omnibus. Neque enim noviter nuptis mane sequenti ea dari solent, nisi, ut labore non improbo consumpta recuperent (Clar. Lemery (*a*) ovis facultatem tribuit augendi semen, eaque oleo plurimo, faleque volatili cum mediocri phlegmate scatere docet), iisque potissimum Tabellarii, qui citatis equis Principum Epistolas ferunt, vescuntur, quia valentiore alimonia egentes, ad vires labori pares sustinendas, ea commodissima putant; festinatio etenim, qua urgentur, non finit, ut largius edendo, tempus infumant. Avicennas (*b*) tradidit, ova esse paucæ quantitatis, & plurimi nutrimenti. De recentibus loquendo, paucamque ignis vim passis, rem ita se habere in animum facile mihi induco.

XXVIII. Ex eximio Bellino (*c*) ovorum albumina (terna siquidem tunicis suis comprehensa quodlibet ovum habet) ita respondent subtilioribus nostris liquidis; ut crassius ex iis, ejusdem naturæ, ac sanguinis serum; alterum, ac lymphæ ex Thoracico, lymphaticisque ductibus; tertium tandem ovi cicatricula contentum, indolis ejusdem, ac cerebri, medullæque spinalis subtilissimus humor esse videantur. Adeo igitur albumina isthæc nutritioni apta sunt, ut jam elaborata nutritionis materia, & succus ipse nutritivus sint; satisque iis sit sanguinis vasa intrasse, ut

(*a*) Trait. des alim. T. 2. chap. 45.(*b*) l. 1. Fen. 4. Doctr. 5. c. 1.(*c*) Prop. 8. de mot. Cord.

characterem statim animale affumant. Vitellus autem adeo nutriendo est, ut ex eo corpus pulli conficiatur, atque increseat. Præterea ita facile in fucum alentem, & ipse mutabilis est, ut per imbecillimas exilissimi embryonis in cicatricula contenti vires, in pullum excreseat. Summe igitur nutrientia ova, quæ ægris porriguntur, sunt; atque iisdem hoc peculiare cibos inter copiosioris nutrimenti est, ut minimis vitæ viribus ad subactionem opus habeant. Ac quoniam blandissimi saporis sunt, nihilque habent, quod linguam feriat: quodque in iis volatile est, quod oppido plurimum est, adeo lymphæ animalis volatilibus moleculis nobis tam amicissimis, ut necessariæ sint, respondet; sequitur, ova recentia, & optimi succi esse, & coctionis ita facilis, ut ea vix indigeant, & celeris distributionis. Iis ergo ægris, qui viribus validioribus opus habent, quam qui morbis acutioribus, aut simpliciter acutis laborant; ova recentia, forbilia, paucamque ignis vim passâ, alimentum numeris omnibus absolutum præbent. Sed quia, & utilissime, & multum nutriunt, ideo morbis acutis aliena sunt; majores etenim sufficiunt vires, quam quibus eget acute laborans. Fertur apud hodiernos Græcos religiosissime ab ovis caveri in febribus acutis. Byzantii, ita mihi referente Mercatore ibi nato, atque educato; & ab ovis, & a juribus animalium in victu acutorum cavetur. Oryza ex aqua cocta, hordeo, aut subtilioribus e pasta cibis aquæ incoctis, acute febrientes alunt. Num ex more Gentis id fiat: num, de ovis loquendo, cælum ibi nostro calidius, febris calori additum illorum vim efficacior

rem

rem reddat, aut ovorum substantiam vitiet, ut inde mali, qui ab illorum usu contigisse narrantur effectus, exorti sint; asserere ipse non ausim. Sed ad nostra principia redeamus.

XXIX. Eadem, itaque, principia, quæ a salubri victu acute ægrotantium jura ex animalibus consummata, succos e carnibus expressos, restaurantia, atque ova excludunt; cibos e Cerealibus, Triticum si dematis, apprime conducibiles, & utilissimos esse ostendunt. Id de Ptisana solummodo demonstramus, quia eam potissimum veterum observationes probarunt. Cum primis, ne in morbis acutis quia materia auferenda fiunt, viribus in expulsionem supervacuæ, & morbosæ materiæ nitentibus, demissa in venas copiosa alimentitia substantia, nova materies opponatur, & resistentia augeatur necesse est. Huic intentioni commodissima Ptisana est, quæ glutinosa substantia caret, quæque, respectu ad victum animale habito, minus valentis alimonix est. Cum vero morbi acuti nil aliud sint, nisi materies morbosa cum impetu acta; omnino desiderant, ne cibus illiusmodi sit, qui turbas, tumultusque moveat, motumque concitet. At talis Ptisana est: illius enim qualitates ex Galeni c. 5. de Ptisana prope finem, ubi Ptisanæ vires, quas fusius supra descripserat, quadam veluti anacephaleosi complectitur; imbecillimæ sunt. Requiritur præterea acuti morbi, ne facultas, quæ morbo sustinendo, & vincendo est, deficiat. Id vero in morbis acutis a Ptisana præstari adeo certum est; ut quia acutioribus, atque acutissimis nimiam sufficeret; ab observatione edocti veteres, eam solis acutis simpliciter

ter assignarent . Atque hæc , si proposita principia solummodo respiciamus , atque ad ea tantum relate , Ptisanam consideremus . Quod si præterea alias ex Hippocrate , & Galeno Ptisanæ dotes pendere velimus ; propter illas etiam videbimus , eam acutis summo opere convenire . Sitim enim sedat , & magis , quam sola aqua : facile coquitur , & in universum corpus cito distribuitur : ad alvum non imprompte descendit : lubrica est , & abstergente virtute pollet . Quantum vero abstergentia acutorum densitati solvendæ apta sint , inde facile colligi potest , quod hæc densioris sanguinis crassamenta sine motu , calorisque intensione dissolvant .

XXX. Quamquam frequentissimæ veterum observationes , & quotidiana experimenta de hordeo ab iis in Praxi capta , satis esse possent ad veras illius vires determinandas (neque enim ad facultates remediorum , ciborumque detegendas , quicquam plus valet , quam effectuum ab iis proditorum diligens , sæpiusque repetita observatio) nihilominus ne putetis , facultatibus de Ptisana ab Hippocrate , Galeno , aliisque veteribus traditis , recentis sanioris Chemiæ approbationes deesse . Meritissimus Charteuser , cujus industria scientiæ , & diligentia par , quique medicinalem materiam Chemica quidem opera , sed summo cum judicio examinavit ; in Fundamentis materiæ Medicæ (*a*) docuit , hordeo vulgari , avenæque albæ inesse subtile , ac subdulce principium mucilagineum , tenerrimo cuiusdam , ac refrigeranti sali nitroso *embryonato* plerumque permixtum . In mucilagine , videtis delicatissimam nutri-

(*a*) Sect. 15. c. 6. §. 1.

nutrientem substantiam, quæ in virium materiam elaborari potest, & sanguini, ne febrili motu sua mucilagine spolietur, suppetias ferre. In subtilitate mucilaginosi principii, clare perspicere potestis, ut illud a paucis vitæ viribus subigi, & assimilari queat. Ex sapore subdulci, noscitur acrimoniæ carentia. In sale autem tenerrimo nitrosæ naturæ nondum perfectæ, neque ad duritiem, rigiditatemque, qua salinæ moleculæ maturæ instruuntur, adhucdum perducto; ineptitudo ad irritandum cernitur; aptitudo ad blandæ solvendum visitur; facultasque ad sitim tollendam, ad alvum aperiendam, & vis blande abstergendi, manifestatur.

XXXI. Hic ternas mihi quæstiones a vobis proponi sentio. Prima est: cur hordei usus apud nos in acute ægrotantium victu ferme obsoleverit. Altera: quid, eduliis ex Ptisana rationabiliter substitui possit. Tertia tandem, qui fiat, ut cum cibi a me reprobati acute ægrotantibus alieni adeo sint; nihilominus mali, quos edere deberent, effectus, neque a medicis, neque ab aliis, qui ægris assident, observentur. Uni, atque alteri ex propositis quæstionibus mox faciam satis; tertiam commodiorem in locum reservabo.

XXXII. Manardus (a) pluribus de causis ait a medicis Ptisanæ usum jam suo tempore intermissum fuisse. Primum, quia, cum in ægris alendis consuetudini respectus habendus sit, suis autem temporibus, Ptisana, quæ apud superiores in cibum quoque sanorum veniebat, in desuetudinem abiisset; insueto cibo ægri nequaquam alendi erant. Secundo, quia morbi

con-

(a) l. 5. Epistol. 2.

contingunt , quibus nec Hippocratis iudicio ea esset danda . Tertio , quia , eo sic referente , suo tempore , non ad hominum , sed ad brutorum potius escam hordeum feminaretur ; propterea , neque grana ad semen-tem seligerentur ; & incuriosius ager præpararetur ; neque a pravis herbis mundaretur ; neque collectum hordeum diligenter in arca , aut horreo custodiretur : factum hinc , ut sui ævi hordeum a perfecti hordei qualitatibus longius abesset . Quarto , quia coqui eam parare nescirent . Tandem vero , quia si probum quoque hordeum affuisset , & coqui Ptisanam ex arte parare scivissent ; tempus pro ea acute febricitanti coquenda , & paranda defuturum plerumque fuisset .

XXXIII. Nullus dubito , quin quicumque hæc legat , aut audiat , statim horum infirmitatem non sentiat , utque minimum succi , sanguinisque habeant . Si tempus Ptisanam acute ægrotanti coquendi , & parandi (ut ab hoc incipiam) Manardi tempore deerat ; iisdem temporum angustiis premi quoque debuerant veteres medici , cujusce tamen difficultatis non meminere , neque de ea conquesti sunt . Quid vero dicendum de jactura subtilissimi , difficillimique artificii Ptisanam præparandi ? Nonne id ridiculum , ei præsertim , videri debet , qui sciat , Manardum Latinum fecisse Galeni librum de Ptisana , quo tam mirificum , ac singulare artificium edocetur ? At adeo felix Manardus esse non potuit , ut quamvis id docendo laborasset , rite , recteque paratam eam videre potuerit . Porro de boni hordei penuria , qua suo tempore laborabatur , deque illius frumenti apud sanos insuetudine , non habeo quid dicam . Nostreis certe

tem-

temporibus, neque proba hordea defunt, neque in cibum jumentorum tantum feruntur; sed non modo populo, verum nobilibus quoque hordeum, ac præcipue, quod Germanicum dicitur, in pulmentum haud raro coquitur. Sed satis fuerit occasionem laudatæ Manardi Epistolæ referre, ut quanti illius ratiunculæ æstimandæ sint plane noscatur. Manardo, Budæ tunc commoranti, Gillinus Comaclensis Episcopus scripserat, post illius e Ferraria discessum, apud clariores illius Regionis medicos consuetudinem invaluisse, ut omnes ferme ægrotantes hordeo, & hordentis nutrent. Mirabatur itaque doctus Episcopus, cur Praxim diversam in alendis ægris servare suevisset Manardus (hinc conjicere oportet, hanc victus rationem felicius præ ea, qua utebatur Manardus, cessasse; neque enim si aliter res contigisset, de diversitate methodi Manardum, sed alios medicos compellasset) atque ab eo causam sciscitabatur, cur una cum illis medicis nequaquam sentiret. Cui respondens Manardus, non alias rationes consilii sui, quam supra positas affert. Videtis, itaque, factis ipsis, omnes, præter unam, adductas a Manardo argutatiunculas convelli. Sive enim tunc suevissent illarum Regionum incolæ hordeo uti, sive non; parata ex hordeo alimonia tunc recte in cibum ægrotantium cedebat. Dicendum ergo est, neque tunc tempus parandæ Ptisanæ defuisse; neque summam artem eam coquendi ignoratam fuisse; neque tunc Ferrarienses, ac Comaclenses bono hordeo caruisse.

XXXIV. Firmius nequaquam argumentum est, quod in causæ suæ patrociniū ab Hippocratis, & Gale-

ni quoque auctoritate sumit Manardus. Verissimum est docuisse Hippocratem, acutioribus morbis, ubi ficciores fuerint, Ptisanam alienam fore. Sed cur? Quia solus Ptisanæ cremor, non vero Ptisana integra iis conveniret. Nimiam alimoniam, ex Hippocrate, tota Ptisana iis morbis sufficit, ideoque iis nequaquam commoda est. Eam igitur non adhibendam tunc censuit; non quia cibi ex hordeo inutiles iis morbis forent; sed quia, si hordeo integro alerentur ægri, vis alimonix major erat, quam quæ illis conveniret. Num id Manardi sententiæ faveat, cuicumque judicandum relinquo. Sed propositæ quæstioni respondeo. Ptisana non utimur, quia ægri scientes medicos indulgentiores redditos, gratiores, sapidioreque cibos facile concedere; ab ea tamquam ab ingrato, & nauseoso edulio abhorrere jam diu cæperunt. Unde vero nimia medicorum indulgentia originem traxerit, jam supra a nobis positum est. Inde mos alia cibaria, Ptisanæ loco, dandi fluxit, ac mori, quem omnium regem jure Pindarus dixit, hodie quoque paremus.

XXXV. Venio nunc ad alteram quæstionem, quæ erat: qui cibi Ptisanæ, aliisque ex hordeo paratis, aliqua cum ratione substitui possint. Clariss. Hippocratis Interpres Vallesius (a) putat, Ptisanæ integræ, illiusque Cremori substitui ad acute febrientes posse coctam Lactucam, Betam, Cremorem amygdalarum, recentium pullorum carnes, & Gallinæ jura. Deinde ubi Hippocrates in l. acut. (b) Ptisanæ virtutes extollit, ait, eam utique ab illo præferri reliquis frumentaceis eduliis, non tamen omnibus cibis; ideoque

(a) ad 4. aphor. 1.

(b) tex. 5.

que illius loco æque bene dari posse Gallinæ, aut pulli jura, ova forbilia, piscesque saxatiles. Neque Victum febricitantium una aliqua materia definiri, sed, quod *tenuis sit, & humidus, concoctu facilis, & boni succi*. Concludit tandem, antiquissimos, qui a primis hominibus victu vegetabili utentibus non longe aberant, leguminibus, fructibus, oleribusque magis, quam carnibus vesci suevisse; proinde quoque medicos Ptfanis magis, quam carnibus acute ægrotantes alere instituisse. Sed subsequutis temporibus homines carnivoros adeo factos, ut non immerito hujusce consuetudinis ratione ad carnes tenues, frumentaceis dimissis, medici in acutorum victu deflexerint.

Et veterem in limo ranæ cecinere querelam.

XXXVI. Plura hic sunt, quæ aliquam animadversionem desiderant. Mitto cum primis, doctrinam sine necessariis discriminibus traditam: mitto victum antiquissimorum, quo de animus loqui refugit: at ex eo deduci haud posse, quod Vallesius deducit, contendo. Si carniū frequentior usus in causa fuit, ut medici in acutis ad animale[m] victum deflecterent; jam ab usque Hippocraticis temporibus oportuerat, victum hunc ad acute ægrotantes in usum receptum fuisse. Hippocratis enim temporibus adeo carnibus utebantur homines (utebantur etenim, & equinis, & asininis, & caninis (a) ac de copiosiore carniū esu noxio verba fecit l. de victu acut. (b) ut non solum ex iis simplices, simpliciterque paratos cibos fumerent, sed iis quoque delectarentur, quos sum-

N 2

ptuo-

(a) 3. de Diæ.

(b) tex. 18.

ptuosa coquorum industria nostris temporibus invenisse putatur. Textu enim 19. l. 2. de diæta, obsoniorum meminit ex variis intritis præparatorum. In hisce videre mihi videor compositissima illa cibaria, quæ *Pasticci* vocamus. Si ergo consuetudini animalis cibi parentes medici, victum ex animalibus acute ægrotantibus concessere; ecurr idem non præstitit Hippocrates, qui de vi consuetudinis plura disputat in libro de victu in acutis? Ecurr id a Medicis præstitum non fuit temporibus Celsi, & Galeni, qui pluribus sæculis, quam Hippocrates, ab iis distabant, qui sub Rege Saturno, ut ait Satyricus, glandem eructabant? Sed, quid Celsi, aut Galeni tempora dico? Oribasius quarto sæculo Æræ Christianæ floruit: Trallianus, quinto: Ægineta autem septimo. Quis, quæso, asserat, carniū esum tunc nondum invaluisse? Nihilo tamen minus Oribasius ardenti febre laborantes sola mulsa, & quidem diluta, nutrit, & in sola potione (a) continendos docet. Ægineta (b) ad eandem ardentes febres, ex sola potione victum instituit, atque Peripneumonicos (c) solo Cremore Ptisanæ, aut alicæ, aut amygdalarum amararum nutriendos docet. Trallianus (d) aliquanto liberalior, in causone, scilicet in ardenti febre, dat Cremorem Ptisanæ, oleraue præterea refrigerantia, & ova. Ad Pleuritidem autem, libro sexto, quem unicum caput implet, victum instituit ex Ptisanæ succo. Si vires imbecillæ fuerint, panis micas ex liquore mellito dat: si imbecilliores, jusculum ex sola Gallina sine oleo para-

(a) l. 7. synopsis. c. 19.

(c) l. 3. c. 30.

(b) l. 2. c. 3.

(d) l. 12. c. 3.

paratum (jusculis tunc , in illorum confectio-
 leum addi suevisse dicendum est) & paucas panis
 micas . Piscem quoque turdum , *vivium ratione habita* ,
 quem Ptisanam marinam dici posse sine errore autumat.
 Saxatilis iste piscis est , eumque ex pluribus auctori-
 bus laudat Salvianus *de aquatilibus* (*a*) ubi miror ,
 eum Tralliani non meminisse . Non igitur consuetu-
 dine ducti medici prisca , in morbis acutis , ad anima-
 lem victum deflexerunt . Quo ductu id fecerint , nunc
 non disquiro , cum præsertim hac de re a me su-
 pra disputatum sit . Satis est mihi demonstrasse , ra-
 tionem a Vallesio adductam , esse falsitate ipsa fal-
 siorem .

XXXVII. Ait Vallesius , præ ceteris quidem fru-
 mentaceis Ptisanam ad acutos morbos ab Hippocrate
 laudatam fuisse ; non alia tamen a victu acutorum ci-
 baria exclusisse . Quod sic ab eo profertur , ut innue-
 re velle videatur , cibos ex animalibus in acutis mor-
 bis Cum admisisse ; putatque carniū decocta ex iis
 esse , quæ victum tenuem constituere possunt . At id
 falsissimum esse , ac carniū juscula , non modo a
 tenui , sed a pleno , quoque , ægtotantium victu per
 veteres exclusa fuisse ; ex iis , quæ ex Galeno , atque
 aliis , super hoc victu tradita sunt , satis intelligere
 potuistis . Porro Hippocratem , non modo reliquis fru-
 mentaceis , sed quibuscumque cibis , in acutis , hordeum
 prætulisse , ut ut illud textu quinto reliquis solum-
 modo frumentaceis præferat ; adeo aperta res est , ut
 ad eam ostendendam non alio teste , auctoreve uti ve-
 lim , quam ipsomet Vallesio . Narrans Hippocrates ,
 textu

textu septimo de victu acutorum, eorum commoda, qui integra Ptisana utuntur, ait: & *purgationes multo perfectiores sunt, & suppurati minus fiunt, quam si aliter quis victum instituat*. Hic apertissime reliquis omnibus aliis cibis Ptisanam anteposit. Ad hæc autem, quid Vallesius? Cumque dicit, qui utuntur totis Ptisanis; non id dicit totas ptisanas opponens Cremori; sed Ptisanam omnino reliquis cibis. Hic sponte fatetur, quæ alibi, per vim a se sibi factam, negaverat.

XXXVIII. Sed ut alteri petitioni vestræ ad satisfaciendum accedam, vestrum interesse puto noscere, num quæ indiscriminatim Vallesius cibaria supra recensuit, indiscriminatim tum Ptisanæ, tum illius Cremori substitui possint; numve forte alia cibaria eduliis ex Ptisana substitui queant. Rem medicinalem præcisionem nunquam recipere posse, ut dolendum, ita ingenue fatendum est. Propterea medicinalis ars conjecturas inter perpetuo natabit; ac propterea difficillimum erit, non jam ut plures, sed ut bini solummodo medici, quamvis finem eundem respiciant, iisdem, omnino, mediis, illud assequi tentent. Conjecturales facultates, quæ actione perficiuntur, quamdam latitudinem non habere non possunt, qua artifices varia utantur in agendo necesse est. Nihilominus curandum summopere medico est, ut, si conjectando punctum attingere nequaquam possit, nitatur tamen, ut ab eo, quam minimum queat, longe abeat. Nobis igitur ad propositum argumentum debitam diligentiam præstituris, præ oculis cum primis habenda sunt principia, quæ ad victum acutorum regendum proposuimus: tum veterum observationes
perpe-

perpetua, longissimaque experimentorum serie confirmata, principiisque positis ad amissim respondentes: deinde, quæ ex institutis recentiorum experimentis circa vim, & qualitates ciborum, nobis nota esse putantur: postremo autem, hisce deficientibus, quæ de cibis iisdem, Principes e veteribus tradidere. Hisce præpositis regulis, quid sentiam vobis aperio.

XXXIX. Loco Melicrati, Oxicrati, aut Cremoris Ptisanæ, quæ dabantur morbis non exquisitè acutissimis, aut etiam acutissimis exquisitè, ubi æger abstinentia premi non posset; si olera excipiat, de quibus mox, nulla e cibariis a Vallesio recensitis dari debent. Non ova: quia quamvis optimi omnino succi sint, nimias vires, quibus æger non eget, sufficiunt; impetus enim, quo auferenda morbosa materies movetur, est infringendus, non concitandus. Non Gallinæ jura, ob gelatinosam substantiam, quam continent, quæ alimentitia vis ex Celso (a) ut in reliquis animalibus, quo magis abortu distant, ita & in pullis coortalibus major est, quo minus teneri sunt. Non pullorum carnes; & ob eandem rationem; & quia cibus fluidus non sunt, eoque viribus stomachi eget, ut e solido fluidus fiat. Non amygdalarum cremor, quia ex Hippocrate (b) amygdalæ æstuosæ sunt, & plurimum nutriunt. Non tandem pisces saxatiles, quia horum vis Ptisanæ integræ vim æquat, non modo ex Tralliano, qui, ut audistis, Turdum saxatilem, Ptisanam marinam vocari posse docuit; sed ex Galeno (c) etiam, qui loco Ptisanæ ægro eam fastidienti, pisces saxatiles dandos

(a) l. 2. c. 18.

(b) 2. de diæt. rex. 15.

(c) Com. 1. de vi&et. acut. 27.

dos docet. Dari autem poterit, ut quæ mea sententia substitui possint, vobis dicam; loco oxicrati, & mellicrati, aqua succo limonum, & saccharo acidodulcis reddita: loco Cremoris Ptisanæ, emulsio ex feminibus frigidis, plus, minus diluta, additis, aut non additis, prout videbitur, paucis amygdalis dulcibus. Ratione parcitatis alimoniosæ substantiæ, innocua erunt fraga, mora, cerasa, ribesia. Innocua mala & pyra; sed cocta. Ex experimentis nobiliss. Boylæi (a) fructus cocti, minorem quantitatem aeris, quam crudi producant, eoque minus flatuosi sunt. Quantum autem horum ægrotorum intersit, iis imum ventrem *metheorismis* non exerceri, ex artis exercitio vobis palam fiet. Videbitis enim, ventriculum, & intestina flatibus distenta, aut quoquo modo male in acutis se habentia; & salubres motus a cute avertere; & morbose humoris coctionem impedire; adeo ut aliquando qualitati morbi malignæ supervenientia Symptomata tribuantur, quæ ventriculo, atque intestinis male affectis solummodo debentur. Ne flatibus vexarentur acute ægrotantes, adeo Hippocratis observationem, meruit; ut inter alias Ptisanæ dotes, eam commendaret, qua malam turbationem non excitat, neque in ventre intumescit, quia in coctura, quam maxime fieri poterat (b) jam intumuit: scilicet, totum, quem dimittere poterat, aerem dimisit.

XL. Ubi Ptisanæ Cremor, ex veterum sententia, convenit, in morbis, nempe, peracutis, qui circa septimum judicantur; si experimentis standum est, dari

(a) T. 1. Experim. Phys. mechanic. Contin. 2. artic. 1. Exper. 8.
 (b) l. acut, tex. 5.

ri possent, quamvis apud nos in usu non sint, quod saltem sciam; dari, inquam, possent jura Cammarorum, aut Cancrorum fluviatilium. Ista, ex experimentis Clar. Virorum, Beccarii, & Montii (a) & gelatinosa substantia omnino carent; & præterea si ventriculo, & duodeno insint acidi sales egro nocituri, eos corrigere valent. Dari poterit Cremor Oryzæ: dari poterunt olera. Advertendum tamen ex Galeno (b) postrema isthæc ad victum medicamentosum referri. Ideo fieri aliquando poterit, ut licet ratione exiguitatis alimenti a victu non extreme tenuissimo excludi non debeant; ratione tamen aliarum qualitatuum, dato ægro, cui victus ille conveniat, conducibilia nequaquam sint. De horum qualitatibus quantum satis egit Hippocrates (c). Horum usum iis in casibus utilem apprime ipse duco, in quibus alimenti moles melior, quam vis, & potentia, ut ajebat dictator noster. De hisce nos alio loco pauca.

XLI. A tenui porro ægrotantium victu, cui totam Ptisanam dicavere veteres, quique simpliciter acutis convenit, Ptisana Avenæ, aut Oryzæ, Byzantinorum more, substitui potest. Panatellæ quoque ex aqua dari queunt. Quæ si parum ægro sint, levia pullorum jura, nequaquam plus cocta, quam pro sanis solent; aut jus vervecis, cujus caro concoctu, & perspiratu ex Sanctorio (d) facillima adeo est; præsertim si jure hisce olera mollia, & refrigerantia incoxerint, quæ passim nomine alterantium veniunt; dari utiliter posse puto. Cum enim hujusmodi morbi ad decimum-

O

quar-

(a) T. 2. Instit. Bonon. P. 1.
facult. c. 40.

(c) 2. de diæt. text. 14.

(b) 8. method. c. 2. & 2. de alim.
(d) de cibo & pot. 5. 7.

quartum, vigesimumque trahant, copiosioribus viribus ægris opus est, quam ubi morbus circa septimum judicatur. Præterea febris, motus nempe sanguinis rapidior, in hisce diutius perdurans, facilius Balsamico glutine spoliare sanguinem potest, quamobrem huic quoque periculo obviam eundum est.

XLII. Ubi vero morbi ex Classe simpliciter acutorum deciderint, ac vigesima, & vigesima prima die transactis, quadragesimum versus progrediuntur, ut acuti ex decidentia vocari mereantur; tunc victu, relate ad ægrotantes pleno, ægri alendi sunt. Panatellæ valentiores: panis ejusdem subtiliores offulæ e jure: subtiliora e pasta fermentata cibaria: ova recentia forbilia: eadem jure soluta, vulgo *brodettini*: teneriorum animalium teneriores sine pinguedine carnes: cerebra: jecinora: Thymus Vitulorum dari tunc queunt. Galenus cerebra animalium improbat; improbat & jecinora: vereor ne ex hypothese, & sine experimentorum fide. Cerebrum pituitosius vocat (a) & ita nauseosum, ut ab eo ventriculus facile invertatur, & evomat. Inde procul dubio pituitosioris notam cerebro inussit, quia putavit illud esse pituitæ nidulamentum. Jecinora (b) crassi, malique succi esse asseruit. Hepar illi erat officina sanguinis: hujus Parenchyma concreto sanguini haud absimile putatum est. Sanguis autem pro malo nutrimento habitus, nec forte injuria. Hinc hepar, quod de eo tantum participat, crassi, malique succi esse debet. Ita facile puto, eum ratiocinatum fuisse. Verum neque cerebri, neque jeci-

(a) l. 1. de aliment. facult. c. 8.

(b) c. 12. lib. ejusd.

cinorum commanforum scelera ipse adhucdum in artis exercitio observavi.

XLIII. Scitote tamen, etiam post vigesimum diem, nisi febris imminuta plurimum fuerit, & graviora cessarint symptomata, me haud ægris mandenda dare suevisse, sed eos paulo validioribus forbitionibus, ovisque tantum alere. Quis enim in febribus v. g. malignis *per essentiam*, ut dicimus, ac petechialibus non inflammatoriis, quæ haud raro cum soporibus, ac deliramentis etiam post tempus non exacte acutis assignatum trahunt, dari posse sine discrimine putarit solida cibaria, & mediocriter nutrientia, dum materia auferenda, unde morbus, plus nimio adhuc ægrotantem premit?

XLIV. Atque hæc de cibis quadruplici acutorum generi convenientibus generatim dicta sunt. Rem majore cum præcisione, subtiliusque determinare oppido difficillimum mihi videtur. Ne putetis tamen hæc me sic rata velle, ut, vel latum unguem ab iis discedere piaculum ducam. Habito respectu ad ætates, ad Regiones, ad anni tempora, ad consuetudinem, ad peculiare ægrorum idiosyncrasias, ad eorundem desideria quoque, aliquid addi, aut mutari tempestive potest, non tamen multum. Non autem multum solummodo, sed plurimum addit, mutatque, qui consumpta jura, qui contusas carnes, harum expressos succos, qui tandem restaurantia ægris ingerit. Itaque, ut vobis persuasum sit, velim, me hac Dissertatione contendere, ut potius demonstrem quid non agendum, quam quid agendum sit. Sacram lineam prætendo, citra quam expatiari possitis, & eo usque

progredi : eam tamen ne prætergrediamini . Veterum observata , & Dogmata : proposita principia ab ipsa tantum observatione petita : experimenta recentiorum laudanda industria instituta , errorem satis detegunt , ejiciunt , explodunt . Quæ cancellis veluti quibusdam clausimus , aliquam latitudinem habere possunt , immo debent , ut supra dixi ; mensuris tamen exactioribus eam determinare , ob infinitas prope dixerim varietates , quæ in ægris offenduntur , ob varios quibus diversarum Regionum incolæ utuntur , cibos , ob diversa adjuncta , quæ medicis in acutorum curationibus persæpe eveniunt , statuere profecto non possum , neque ausim .

I V.

PRincipia , quibus acute febrientium diæta regenda est exposui : cibos ad triplex victus genus determinavi ; quique famigeratissimæ Ptisanæ , illiusque Cremori , mea quidem sententia , substitui possunt , tradidi . Majoris momenti res agitanda mihi restat , cui nisi lucem dare curemus , quæ huc usque diximus omnia , sua utilitate carebunt . Tertium e principiis positum erat , viribus quidem opus esse , ut auferenda materies acuti morbi causa a corpore salubriter expellatur ; sed viribus non magnis ; eoque non solum acuta febre laborantibus vires non esse augendas , intendendasque ; sed minuendas , & convellendas . Id captu difficillimum pluribus videbitur , ac procul dubio , qui verba solummodo spectant , res autem haudquaquam , ut par esset , examinant , propositum assertum ,

tum, non ut principium, sed ut Paradoxon suscipient. Vos tamen, ut spero, videbitis, rem totam ab observatione pendere, eamque facillime a quolibet intelligi posse, qui oculis fidem nequaquam deroget, & communi sensu non careat.

II. Non minus e vulgo homines, quam medici de ægrotantium viribus loquuntur. At primi, ut de reliquis paulo obscurioribus solent: Medici vero obiter, contracte, atque involute, neque satis pro rei magnitudine. Mihi saltem nondum videre contigit, qui argumentum apprise necessarium ex professo agitarit. De eo ipse dicturus, nequaquam mihi tribuo, ut doctrinam de viribus acute febrientium ex suis principiis deducere, atque explicare me posse confidam. Eam igitur haud *a priori*, ut scholæ loquuntur, investigabo, cum, post etiam doctiss. virorum tentamina, eaque ad splendidissimum Geometriæ lumen habita: post meritiss. Hales experimenta, nondum eo pervenerimus (ex iudicio quoque clariss. Senac (*a*) ut vires Cordis in homine sano determinare possimus: quanto autem minus in febricitante, & ægroto id nobis determinare datum erit? Ea itaque solummodo persequar, quæ observata, observatorumque consideratio subjicere videntur; idque exemplo ipsius Galeni, qui (*b*) minime negans virium magnitudinem mensurari non posse, ait: quod si non possimus earum quantitatem exquisite invenire; artificiosa tamen conjectura quadam, proxime ad veritatem pervenire queamus.

III. Aliud itaque est vires relate ad sanos, & belle valentes, aliud relate ad acute ægrotantes considera-

(*a*) du Coeur. T. 1. l. 2. chap. 9.

(*b*) Com. 1. ad 12. aphor. 1.

derare. Sani, iis non solum egent viribus, quæ ad vitam necessariæ sunt, sed iis insuper quæ ad mentis, corporisque actiones sufficiant. Acute ægrotantibus e contra, satis eæ sunt, quæ ad vitam, donec morbus vincatur, necessariæ sunt; eoque quo acutior, breviorque morbus est, paucioribus indigent. Cum vero vita sine jugi sanguinis circuitu esse non possit, atque ad hunc circuitum in ægrotante, qui vel solo potu utatur, sustinendum, non solum cor sanguinem ita pellere debeat, ut ad cor ipsum redire possit; sed etiam, ut aliqua ex eodem sanguine secretio fiat: ad ægri, de quo sermo instituitur, vitam, necesse est, cor sanguinem ita propellere, ut ad cor, unde discessit, redeat; utque ab sanguine in jugi, neque interrupto hoc motu constituto, aliqua ex iis, præsertim copiosioribus, quæ ab eo fieri solent, secretionibus perficiatur.

IV. Prima propositionis pars per se clara est: altera autem explicatione aliqua eget. Si data sanguinis quantitas in ægrotante, qui solo potu utatur, sit, quæ in gyrum lata, quantum quidem ad eam spectat, vitam sustinere possit, ajo, vitam diutius minime superfuturam, datam, scilicet, sanguinis quantitatem nequaquam in Orbem diutine ituram, si omnes fluidorum secretiones suppressæ fuerint. Posuimus ægrum nostrum saltem bibere. A potu igitur venas ingresso fluidi pellendi quantitas adaugetur, quæ si per renes, aut alia colatoria non exeat, maiorem resistantiam cordis impellentibus viribus objicit. Porro resistantia adaucta, quoad effectum, idem est, ac vis imminuta. Quoad effectum igitur tunc imminutæ cordis impel-

impellentes vires, vel sanguinem, ut par est, in gyrum propellere possunt, aut non. Si prorsus non: circulatio rupta est, & cum circulatione vita ipsa: fin possunt, non possunt sine nisu, cum vires, ut tantum, non plus pellere possint, determinatum sit. Pellent igitur cum ipsarum virium dispendio; agens enim, quod agendo & ipsum patitur, proportionem habita ad actionem, patitur. Sed virium dispendium, quoad effectum, idem est, ac resistentia adaucta: hac autem usque crescente, quia singulis Cordis contractionibus vires imminuendæ sunt; circulatio ut interrumpatur, & cum circulatione vita ipsa necesse est. Ad vitam igitur acute ægrotantis, qui solo potu utatur, non modo eæ vires necessariae sunt, quæ in orbem sanguinem ferre possint; verum etiam non omnis e sanguine secretio ablata ei esse debet.

V. Nunc ab ipsa Praxi lumen capiamus, istaque nos edoceat, quibus virium copiis in acute ægrotantibus ad morbum usque devictum vita sustineatur: scilicet, qua virtute necessarius ille jugis circuitus, una cum secretionibus, sine quibus diu perdurare non potest, perennetur ad usque morbi finem. Observatio, ut ut ei parum, aut nihil attendatur, obvia, quotidiana, & facillima est. Nemo ab acuto morbo exurgit, nisi viribus plurimum dejectis. Plures, primis a morbo devicto diebus, pedibus stare non possunt: quidam, neque extra lectum federe: non pauci decumbentes adhuc, ventrem exonerare coguntur. Omnes, plus, minus, elumbes, imbecilles, pallentes sunt. Quid porro dicendum de iis, qui malignas *essentiales* longiores febres effugerunt? Adeo isti ob vires

res, succosque exhaustos fracti sunt; ut non jam e lecto surgere, aut se se attollere; sed neque ex uno in alterum latus, sine adfidentium ope, & auxilio, convertere se possint. Iis igitur in tanto virium collapsu eæ supererant, atque supersunt, quæ ad vitam satis sunt: quæ scilicet, & sanguinis in orbem progressionem, & secretiones sustinere possunt. Meditemini, quæso, Egregii Juvenes, super hisce quotidianis observationibus, easque ad usum traducite. Duo ex hac meditatione plane colligetis. Primum: quam vanus sit illorum timor, qui, vel primis morbi diebus de virium collapsu solliciti, populari diligentia ad cardiaca, & valentioris substantiæ cibos confugiunt. Alterum: ut vera sit supra allata Galeni animadversio: scilicet, nos quidem haud posse virium quantitatem exacte dimetiri; sed conjectura, quæ ab observatis immediate fluit, determinare nobis datum esse, ad morbos acutos, vehementioresque vincendos, paucioribus, quam vulgo putatur, viribus opus fore.

VI. Veritas hæc ab obviis, frequentioribusque observationibus deducta est: eandem a singulari aliqua, & minus obvia deducamus. Virgo septennis (historiam ex Hyacintho Cestoni suo narrat Eques Vallifnerius (a) senior, nostræ scholæ, non ita pridem, Clarissimum Ornamentum) Virgo, inquam, septuennis, a duplici, ut dicimus, tertiana continua febre, die morbi septima auditu, loquela, mente, ac motu omnium corporis partium, capitis motu excepto, carebat. A prima Martii die ad trigesimam imbecillima, mortique proxima traxit, non alio omnino cibo

(a) T. 2. Oper. in fol. p. 501.

bo ufa , quàm aqua . Atque adeo traxit , ut die ejusdem mensis vigesima septima meliuscule habere cœperit ; licetque utrique natium gangræna infedisset , evaserit . Vos sane nequaquam arbitratos reor , virginem hanc plurimarum virium auxilio & vitam sustinuisse , vehementemque adeo morbum effugisse . Huc aliquo modo facere quoque possunt febrium acutarum , malique moris curationes , quæ ope solius aquæ , illiusque gelidæ , & Neapoli , & Melitæ Aphricæ peraguntur . Binas hujusmodi felicissimas curationes , Bononiæ , quoque , in mortis Nosocomio , ab Clariss. illius Universitatis Profes. , eodemque Primi Subsellii Practico Azzo-Guidi peractas , se vidisse mihi narrat Filius meus Antonius-Cajetanus , Florentia , & Bononia redux . Ad quatuor , sexve dies , & quidem dum morbus in statu est , gravioresque labores affert ; dum , scilicet , plerique e nostratibus , & ad cardiaca confugerent , & restaurantibus uterentur ; omni vitato religiose cibo , sola aqua ægrotantes vivunt : vivunt , inquam , & non pauci convalescunt . Neque hosce , mea quidem sententia , putandum est , validioribus instructos viribus , contra morbum pugnare . Sed præstat quoque vobis enarrare casum a me obiter observatum . Anno 1751. Vico satis culto , cui in Feltrienfi districtu Fonzafo nomen est , aliisque locis conterminis , Petecchialis Epidemica febris incubuit , quæ plurimos , catervatimque corripuit , nec sane paucos letho dedit ; quæque ob famam , atque formidinem omnia de more augentes , non levem metum propinquis locis , & Feltriæ ipsi incussit . Jussu Supremi Magistratus Salutis Venetiarum , mihi tunc apud Feltrienfes medici-

P

nam

nam facienti , eo aliquoties adeundum fuit , ut ægros illos inviferem , & de Epidemiæ statu referrem . Postrema vice , qua illuc accessi , Ruri , Arten dicto , ducebar ad rusticum , quem aliis vicibus minime inviferam , quique jam morbum evaserat , & in lecto sedebat , sed potius mortuo reviviscenti , quam e morbo surgenti similis . Ab eo inter alia quæsi , cujus consilio & ope sibi succurrisset . Languida voce respondit , se nullius medici consilio usum : proximum vero Fontem sibi unice , & pro Culina , & pro Pharmacis inserviisse , profusisque sudoribus morbum evasisse . Tunc erat dies vigesima a decubitu , ajebatque Presbyter , qui me ad convalescentem duxerat , eum decima sexta die a febre liberum fuisse . Si etiam macies , pallor , vocis languor , pulsus imbecilliter micantes satis non ostendissent , quam fractæ fuerint illi homini vires ; quicumque consideraverit , eum per sexdecim dies in solo aquæ potu stetisse , cum gravissima febre pugnasse , & sudoribus profusis evasisse ; conjicere facile poterit , sanguinis circuitum ad vitam trahendam necessarium , ab exili virium manu in eo sustentatum , perennatumque fuisse .

VII. Jamque observationes Practicæ nos docuerunt , paucis viribus acute ægrotantibus opus esse , ut vivant , & morbum evadant . Nunc ad earundem observationum lumen videbimus , necesse iis fore , si morbum effugere velint , ut viribus plurimum mulctentur . Hac de re cum primis nos certiores reddet curationum consideratio , quas sponte Natura peragit : sponte , inquam , sibi que soli relicta , nullisque artificis auxiliis , stimulisque , sive illecta , sive perculsa ; tum confide-
ratio

ratio aliarum, quas medici molimur. Morbi gravissimi, acutioresque in rusticana plebe, haud infrequenter, absque ullo artis auxilio in salutem terminantur. Putandum forte, qui morbum evaserunt, viribus satis instructos e lecto surgere? Non, per Jovem. Non minus ac ii, qui ope artis evadunt, decolores, excarnes, elumbes, imbecilli sunt; atque ad reparandas vires, quas Natura in morbi curatione ipsa non conservavit, sed exhaustit, & tempore, & decubitu, & paulatina cibi adjectione opus habent. Num credendum, interim, ac Natura Medicatrix vires illis convellit, eos sibi consulere restaurantibus, contusis carnibus, ferculis, quæ plurimum alimonix contineant? Nugæ. Tunc e macello Vitulum comparant, aut e Cohorte pullum sumunt, cum res tota ad Parochum redacta jam est. Arbitrandum forsan iis succurrere naturam mitioribus evacuationibus, quæ neque humores exhauriant, neque vires dissipent? Quicumque in hac sententia foret, in magna rerum medicarum ignorance versaretur. Sanguinem rarius ex ano, sæpius ex naribus, ad libras fundunt. Ut ut palea, & pluma Grabati humori ficcando, & retinendo sint; copiosi, quibus disfluunt sudores, omnia non humectant modo, sed madefaciunt, largissimisque diarrhæis exercentur. Ex hujusmodi spontaneis salubribus judicationibus invaluit verissimum illud apud Medicos axioma: *nil paucum criticum*. At natura hujusmodi curationes forte suscipit, dum adhuc ægri viribus valent, firmioresque artus illis sunt. Toto cælo errat quicumque sic secum reputat. Sanguinis spontanea profusio, quocumque morbi tempore, nec minus in-

choante, quam crescente morbo, ex verissima Martiani observatione (*a*) quidquid aliter alii scripserint, morbum tollere potest; at reliquæ crises salubriter non fiunt, nisi, aut apparentibus, aut prægræf-
 sis coctionis signis; neque hæc in acutis, qui post septimum judicantur, apparent, nisi postquam æger cum morbo luctatus aliquandiu fuerit; postquam, scilicet, virium non levem partem consumpserit. Tunc crises fiunt, morbusque vincitur, neque alio modo spontaneis naturæ motibus acuti morbi domantur. Neque ars igitur Naturæ imitatrix, eos domabit, nisi plusquam mediocriter vires ægrotanti succisæ fuerint. Rem meditemur.

VIII. Copiosior morbosa materies intra vasa accumulata, Machinas omnes cruori pellendo datas excitat, vellicat, inæqualiter premit, irritat. Præcipiti cursu labi incipit sanguinis flumen; validiore momento omnia premit, ac percutit; eo vi adigitur, qua subtilioribus solummodo humoribus transitus datur: vasa minora nimis repleta, ut phrasi Hippocratica (*b*) utar, nihil remittunt, scilicet in alia se se exonerare non possunt: stagnationes inde humorum, doloresque fiunt: circuitus æquabilitas tollitur: febris nunc apertius, nunc occultius incenditur: assidue hominem febris excitata tenet; jamque morbo acuto iste correptus est, & in vitæ discrimine non levi versatur. Quid, quæso, ars sibi præstandum proponit, ut tantas turbas placet? Humorū impetum compescere satagit. Qui autem? Cum primis evacuando, & omnia vasa
 deplen-

(*a*) sup. tex. 16. 4. Epid. & sup. vers. 29. sect. 1. conc.

(*b*) 4. de morb. tex. 25.

deplendo . Quomodo vero evacuatio , vasorumque depletio motos , ut ita dicam , fluctus componit ? ut aliquod corpus celeriter versus aliquam plagam fluens tardius moveatur , neque obice aliquo , impetum , quo fertur , tardare velimus , aut possimus ; necesse est , ut , quæ illi imprimitur vis , imminuatur , & retundatur . Si igitur quantitatem motus sanguinis , magno ruentis impetu , frænare velimus , velocitatisque jacturam inducere ; vires , quæ illum projiciunt , minuendæ nobis sunt . At id solis evacuationibus præstare nobis datum est . Licet enim quibusdam non careamus auxiliis , quæ solidorum irritabilitatem minuunt , & tollunt , eoque superaddita morbosa vis , quæ ab irritatione pendet , tolli possit ; horum facultas (mitto cautiones ex Practicorum sententia in horum remedium usu adhibendas , quibus quidam illorum Praxim suspectam , modo jure , modo inepte reddunt) brevioris durationis , utque medici loqui solent , palliativa est ; quapropter remedii facultate evanescente , turbæ iterum moventur , excitanturque , eodemque in loco , post eorum usum , res sita invenitur , in quo antea consistebat . In sola igitur quantitatis detractio-
ne spes certior , solidiorque effrænes motus compescendi versatur . Evacuandum igitur est , sed non utcumque ; verum quousque impellentes sanguinem vires fractæ aliquanto fuerint ; fieri enim potest , & fit , ut nisi hujusmodi vires succisæ sint , a præstitis evacuationibus motus , aut validiores insurgant , aut saltem non compescantur . Rem , & vidit , & adnotavit , & illius rationem reddidit Galenus (a) quam tamen
nos

(a) Com. I. aphor. 4.

nos planius, latiusque explicabimus. Ita ille: *in agris raro fit, ut vires, quas invenerimus, majores reddamus, sed fere semper operam damus, ut in longis quidem morbis easdem retineamus, ac tueamur; in acutis vero modice imminutas conservemus. Nam si quis in iis semper, vel quales accepimus servare, vel etiam augere voluerimus, morbum procul dubio auxerimus.* Exemplo autem res clarior evadet. Ipse, vi quadraginta graduum pilam plumbeam duodecim librarum, ad datum terminum, dato impetu, & momento projicio: ut impetus, & momentum projectæ pilæ minuatur, nequaquam satis est, si eam mediam, & sex libris minorem faciam. Namque cum in meo brachio quadraginta gradus virium post dimidiatam pilam remaneant; eam tanto fortius tunc projiciam; quantum pilæ pondus imminutum deficit a pilæ integræ pondere: omnibus enim & singulis sex libris plumbi, tota ea vis applicatur, quæ applicabatur antea totis, & singulis libris duodecim; quapropter resistentia imminuta, quoad effectum, pro viribus auctis, ut æstimetur, necesse est. Ut igitur impetum, momentumque pilæ projiciendæ tollam, idque præstem ocius, quam fieri potest; subtilioribus mechanices legibus inconsultis, & pilam extenuo, & vires projicientes minuo. Ad eundem modum in sanguine violenter actio res cedit. Ut sanguinis impetum, momentumque, quo resistentias percutit, compescam; non solum oportet, ut illius quantitatem minuam; sed ut vires quoque impellentes infringam. Si enim imminuero pondus sanguinis, non autem vires, istæ, quod e pondere reliquum est, violentius projicient.

IX. Huic ratiocinio quotidiana Praxis in morbis inflammatoriis, in iis scilicet, in quibus sanguis violentius per liberos canales fluit, ad amussim respondet. Isti enim, ubi vehementiores fuerint, vehementiam nequaquam remittunt, nisi post iteratas venæ sectiones, & humorum quantitatem plurimum imminutam. Me haud latet, plerosque Practicorum tunc sanguinem mittere, ut illius aucto motu, quæ vascula obstruunt, lenta, & crassa extenuentur, & abripiantur. At si, ut par est, diligentius observabunt, tunc solummodo remissiorem factam ægritudinem videbunt; quæ obstruebant scilicet, extenuari percipient; postquam sanguinis motus mitior evaserit. Præterea animadvertant velim, non solum Sydenhamio, Boerhaavioque, Viris Præstantissimis; sed ipsimet Hippocrati, deductisque ab eo Medicis, nil antiquius in acutorum cura fuisse, ut ut aliis Theoriis uterentur; quam humorum motum, impetumque frænare. Igitur ex examine, & æstimatione curationum, quas tam natura, quam ars in acutis ægritudinibus præstant, apertissime colligitur, ad illarum sanationem necesse fore, ut ægrotorum vires convellantur.

X. Verum quispiam subdet: quousque tandem vires istæ demendæ sunt? Utinam demonstratione aliqua mediante ad certam mensuram pervenire possemus! Verum in hoc negotio calculatori locus non est: opus tantum est conjectore, sed medico: eo scilicet, qui haudquaquam ab universalibus probabilibus conjecturas ducat; sed eas ab observatis, & *a posteriori*, ut scholæ loquuntur,umat. Ab universalibus probabilibus tantum conjectatur, qui ad rem hanc ægrotantis tempera-

peramentum, habitudinem, ætatem, sexum sibi consideranda proponit. Temperamentorum doctrina, ut ut a quibusdam dedolata, perpolita, vel si mavultis, recusa; neque stat, neque firmo unquam talo stare poterit. Ab iis autem, quæ ad habitudines, sexus, ætates spectant, conjecturas ducere, unde cum fiducia operemur; idem est, ac, quam non habent, rebus, constantiam dare. Pulsus, in iis præsertim, quæ ad virium mensuram spectant, signum egregie fallax non raro sunt. Intueri utique etiam ista oportet; sed postquam necessarium ab observationibus lumen acceperimus.

XI. Ex observatione Hippocratica 28. aphorism. 3. comprehensa, sæpe nimium experimur, non satis feliciter cum iis ex acute ægrotantibus agi, quorum corpora, licet morbo, & medicamentis exercita, non minuuntur, sed, ut sanitatis tempore, turgidula adhuc, & bene colorata apparent. Ut igitur de iis bene speremus, inter alia, ut minuantur oportet, & vasa in iis concidant. En signum minus fallax necessariæ virium imminutionis. Ad incipientem vasorum collapsum convellendæ eæ sunt. Etenim si etiam quantitas humorumeducta ea foret, a qua vasorum concidentia expectanda esset; si impellentes adhuc vigeant vires, vasa non collabentur. Ab illis etenim, quod reliquum est humorum, ut vehementius circumagatur necesse est; ab hoc vehementiore motu, calor; a calore autem humoris rarefactio necessario consequitur, quæ humoris volumen augendo vice quantitatis fungitur, & humoribus quoque detractis, vasorum turgescientiam sustentat, neque ea collabi finit.

Neque

Neque obstat Clariss. de Sanvages observasse (a) sanguinem ad aquæ ebullientis calorem, ducentesima tantum parte, volumine adauctum, eoque in calidissima febre, in qua calor tertiam solummodo partem caloris aquæ ebullientis æquat, sanguinis rarefactionem, sexcentesimam partem sui voluminis, quod perceptibile non est, tantum augere posse. Contra enim stat Autopsia, qua videmus, nobis incalescentibus, venas, quæ per dorsum manus excurrunt, excitari, & tumescere. Id autem in causa est, ut nobis sæpe mirantibus ægri in morbis acutis, & colorem, & faciei plenitudinem retineant, quamvis ex peractis evacuationibus, ut nobis quidem videtur, facie collapsa esse deberent. Igitur, ad hunc usque terminum vires demendas esse puto. Sagacitas autem medici, hoc statuto termino, considerata habitudine, ætate, sexu, atque ægrotantis vivendi modo, conjectari non inepte poterit, num plurima, num mediocris, num pauca evacuatio ægrum suum ad hunc vasorum collapsum perductura sit. Sed certum est, observatione id docente, huc in morbis acutis perveniendum esse; neque huc perveniri posse sine non pauca virium læsione. Et non pauca quidem *absolute*, licet evacuationum quantitas, quæ vasorum collapsum inducit, *relative* tantum, neque *absolute* magna esse debeat.

XII. Cum, igitur, non solum paucioribus virium copiis egeant acute ægrotantes, ut morbum effugiant, sed omnino necesse sit iis vires non parum convelli; consuetudinem est, eos non pleniore, sed tenuiore cibo alendos esse; proindeque valentioris substantiæ ali-

Q

men-

(a) Dissert. 2. su i diversi effetti dell'aria sul corpo umano n. 107.

menta, quæ reprobavimus, ab iis esse arcenda. Quam illationem ex præmissis fluere non dubito, quemadmodum pro certo teneo, præmissas a vero non aberrare. Quod si contingeret; cum eæ meræ observationes sint, observationes autem sint naturæ nos edocentis sermo; vocem quoque, & sermonem naturæ a vero aberrare dicendum foret; eoque eam minus fallacem Medicinam, quæ ab ore, ut ita dicam, Naturæ edocetur, neque ullam esse, neque fuisse unquam; aut uspiam. At fuit hujusmodi medicina apud eos, qui ab ore edocentis naturæ eam ediscere voluerunt. Fuit apud Empiricos vetustissimos medicorum: fuit apud Hippocratem artis Principem, immo Dictatorem: fuit apud reliquos Dogmaticos Proceres: fuit apud Methodicos, qui magno in pretio habiti sunt. Ut ut isti in diversa ab Hippocrate abirent, eundem tamen servabant scopum in acute ægrotantibus alendis: eos nempe, & levissima materia, & parcius quoque, quam Hippocrates, & Hippocratici, alebant. Fuit tandem apud Italos non pluribus seculis a nobis remotos; qui quamvis suorum temporum vitio in iis essent opinionibus, quæ, non sine ratione; hodie minus probantur; in ea tamen Praxeos parte, quæ victu ægros curat, eminuerunt. Jure merito igitur propter Græci Hippocratis vestigia incedens alter Angliæ Hippocrates, Sydenhamius, acute ægrotantes, non ovis, non carnibus, non restaurantibus, non triticeo cibo nutriebat, sed avenaceis solummodo, aut hordeaceis. Eandem Praxim, ut ut in multis a Sydenhamio diversi, Angli Celebres Medici servavere, Willis, atque Morthon. Primus hæc habet, ubi de cura-

ratio-

ratione continuarum (a). Quare a carnibus convalescentes diu temperent (si id convalescentibus jussum, quid putandum de actu febrientibus?) iisque demum utantur, non nisi postquam urina fuerit sanorum similis, neque amplius a frigore turbetur. Et quidem tunc satis erit a diluto carniū jussulo incipere (hinc videte, ut vir non modo de Anatome egregie meritus, sed suo ævo Praxi medica clarus, victum suis ægrotantibus administraret) atque dein pedetentim ad alimenta fortiora ascendere. Ubi vero de tertiana intermittente (b). Secunda intentio (erat hæc succi nutritii emendatio) diæta, & exacta victus ratione optime perficitur, quæ in hoc morbo sit tenuis & parca oportet : quare vulgo dicitur : fames optimum hujusce ægritudinis remedium. Neque putetis, hæc dictata, & Præcepta solummodo esse. Præstant, laudatis locis, observationes febrium feliciter curatarum, contra quas prædicta victus ratione celebris auctor usus est. Alter clari nominis practicus Morthon, de indicationibus curativis febrium intermittentium agens ita loquitur (c) diæta sit admodum tenuis, uti Avenacea, Panatella, Hordeacea. De febribus vero continuis (d) Victus, licet ad spiritus refocillandos sæpius ministrari oporteat : unoquoque tamen pastu sit parvus admodum, isque tenuissimus . . . veluti Avenacea, Panatellæ, Hordeacea, liquor passeticus salvia alteratus, Cerevisia tenuis pane tosto calefacta, ala maciata, Ptisana. Freind tandem hisce recentior, agens de secunda febre variolis confluentibus superveniente in epistola ad Clariss. Mead ; haud, quidem, præcipit, quo victus genere, acuto,

Q 2

(a) c. II.

(b) c. 4.

(c) c. 6. Exercit. I. de febr.

(d) Exercit. 2. c. 7.

cuto , vehementissimoque morbo laborantes alendi sint, sed, casu, in prima historia narrat, quo victu æger ille uteretur : unde conjicere facile possumus, quam in nutriendis acute ægrotantibus methodum doctiss. vir fervaret. Ait ille : *Victus tenuis, sorbitionesque vel Ptisanæ, vel oryzæ, quæ diluerent, pro libitu indultæ.* Verum hisce, licet vetustiores, accedunt quoque Gallorum præstantissimi, Hollerius (*a*), atque Fernelius (*b*). Agens primus de febre continua putrida, in ea convenire ait juscula e junioribus pullis Gallinarum, aut carne vitulina molliuscula (meraca forte?) minime gentium ; sed alterata acetosa, lactuca, portulaca. Deinde de ardenti febre agens : *victus, potus sit magis, quam cibus. Mulsæ coctæ, sed diluta nostro more, aqua coctæ, modico saccharo condita.* Fernelius vero, quamvis ex iis, ut alias vobis dixi, qui tutiorem putant in acutis victum paulo pleniorē, ait : *omnis autem, febricitantium victus humidus, frigidusque habendus est ex materia levi.* Quæ autem apud eum materia levis? *Mediæ vero materiæ (ex hac de levi conjicite) sunt ipsa olera, deinde hordeum integrum . . . ab his panis medulla elota, & aqua coctæ.* Quid porro recentiores Nobilissimi e Gallia Medici? Illustris Fagon (mitto celebrem Hecquetum, qui volebat sanos quoque, Eremicolarum in morem vivere) illustris, inquam, Fagon, carniū jura febricitantibus aliena putabat. Sententiam eandem tenuit Meritissimus Dodartius; ac tandem, quod pro omnibus satis esse puto, Celeberrima Monspelliensium schola eandem doctrinam tuetur, eam-

(*a*) l. 2. de morb. intern.(*b*) c. II. method. Gener. cur. febr.

eamdemque ad Praxim traducit (*a*) : Sed jam tempus , locusque omnino desiderant , ut de re summi momenti ad acute ægrotantium vires spectante, vobis verba faciam .

V.

Qui acute ægrotant & febriunt, facillime, & sæpissime de imbecillitate conqueruntur : verum non unica in iis causa imbecillitatis est . Plurimi, & sæpius, ob vim morbi virium exercitium impediens imbecilles sunt : quidam, & rarius, ob vires exhaustas, & materiæ, quæcumque ea sit, iis instaurandis congruæ defectum . Qui vero virium defectu laborant ; aut ante morbum a causis viribus inimicis vexati fuere ; aut in morbo copiosiores evacuationes passi sunt ; aut vis ipsa, & indoles morbi ea est, quæ modo, nobis profecto incomprehensibili, facultatem consumit, atque prosternit . Hujusmodi sunt eæ mali moris febres (de pestilentia, quam me nunquam visurum spero, non loquor) quæ pulsus, & urinas sanorum similes habent : hujusmodi illæ, quibus reconditi in visceribus, & putrescentes abscessus comites sunt : hujusmodi tandem ; quamvis in iis fortius micare pulsus videantur ; in quibus, symptomatice ictero suborto, reflua e jecore bilis sanguinem, urinamque inficit, atque oculos, cutemque foëdat . Reliquis in acutis febribus, in quibus, primis præsertim morbi diebus, de imbecillitate lamentatur ægrotans, non ab exhaustu, sed ab impedimento debilitas est . Exemplis rem illustremus .

II. Qui-

(*a*) Vid. Tom. 2. Edit. 3. Traité des alimens chap. 1.

II. Quidam hoc fero fanus & valens, lectum petit: cras a Rheumate, quod in brachii musculos decubuit, sinistrum brachium movere nequaquam potest. Vel, ne id ob dolorem fieri dicamus, non jam Rheumate, sed imperfecta Paralyfi, quæ motum modo sustulerit, corripiatur: cras brachium nequaquam movere potis est. Quid? Num vires ei consumptæ sunt, deficiuntque? Minime gentium. Organa male affecta, ut vis movens, iis mediantibus operetur, minime finunt. Quod de externis, visuique expositis instrumentis, idem de internis, atque ab oculorum acie remotis, quoque, dicite. Febre tertiana intermittente laborans, die, quo peior est, vires sibi adeo succisas queritur, ut neque e pulvinari caput tollere possit. Cras, die integro, & sine labore in lecto sedet, & satis commode e lecto sæpius & repetito, ut assumpto laxanti & cortici obediat, surgit. Vires exhaustæ, qua, quæso, via rediere? Quispiam, & sanguine, & viribus nimium potens, in ætatis flore a forti Apoplexia necatur. Num vires, & virium materia ei defecere? Haud sane. Verum ob confestim a morbo impeditam virium omnium actionem, insperato, & citissime ad plures abiit. Ac non solum ægrotantes, & assidentes, sed nosmetipsi medici quoque hac super re aliquando fallimur, actionem virium a morbo, aut symptomate aliquo impeditam, virium defectui tribuentes. Et tamen in artis exercitio frequentius videmus, vires ægrotanti erigi, non ab iis, quæ addunt, sed ab illis, quæ materiam facultati demunt. Non infrequenter in febribus, morbisque acutis contingit, ut ægri, primis morbi diebus, ad-

adeo ponderoso , & gravi corpore sint , ut difficillime se se attollere , & per lectum movere possint . Si etiam medici Cardiaci non præscribant ; quod tamen a quibusdam , vel sub morbi exortu fieri consuevit ; præsto sunt officiosissimæ mulieres , quæ virium imbecillitatem , defectumque causantes , frequentioribus iusculis , æquivocæ imbecillitati occurrere non desistunt . Verum bis , terve emissio sanguine , æger ad motus eos , quos vix ante præstare poterat , promptior , expeditiorque est . Quæ , si Diis placet , imbecillitas ista , quæ virium materiam , & quidem non parce demendo , tollitur ? Ecquis , qui ratione utatur , copiosiore , aut valentiore alimonia huic imbecillitati succurrat ? Pleuritico excreatio difficilior est . Heu ! clamant adfidentes , amabilioris præcipue sexus : imbecillior est : iusculis tantummodo tenuioribus vivit : valentiora ea aliquanto esse debent . Interim medicus iterato sanguinem mittit , & excreatio procedit . Quid ! num *positive* adjiciuntur vires vasa evacuando , & sanguinem mittendo ? Haud per Herculem ; sed evacuatio , quæ vires neque addidit , neque addere *positive* potest , impedimenta , & resistentias actioni virium a morbo oppositas sustulit . Clarissime itaque patet , apparentem imbecillitatem non a virtutis defectu venire , sed a morbosa causa , quæ virium exercitium impedit .

III. Quamvis hæc per se adeo luceant , ut uberiore lumine non indigeant ; nihilominus argumento ab auctoritate desumpto , eadem magis illustremus : auctoritas autem ea sit , qua major in rebus Practicis esse non potest . Magnus Hippocrates de hac equivo-

ca in morbis acutis imbecillitate, expresse tractavit: de difficultate positivam a negativa discriminandi verba fecit; ac de erroribus, qui circa eas committi a medicis possunt, differuit. Quamvis prolixior, nimis, non modo ad meum argumentum, sed cum ad vestram, tum ad egrotantium utilitatem facit Hippocraticus textus, ut illum huc totum non afferam: neque enim talium rerum (a) peritos Medicos esse video, quomodo debilitates in morbis dignoscere oporteat, & quæ ex vasorum evacuatione efficiantur, & quæ propter aliam aliquam irritationem, & quæ propter dolorem, & præ acumine morbi. Itemque quot affectiones, & omnigenas species natura nostra, & habitus singulis pariat; & quidem quum talium cognitio, aut ignorantia salutem, aut mortem afferant. Majus enim malum est, si ob dolorem & morbi acumen debilitato exhibet quis potum copiosorem, aut sorbitionem, aut cibum (vos probe meministis quid nomine potus, sorbitionis, cibi que intelligendum sit) ob vasorum evacuationem debilem esse existimans. Indecorum etiam est ob vasorum evacuationem debilitatum non cognoscere, & victu premere. Afferit enim periculum aliquod & hoc peccatum, verum multo minus, quam alterum. Multo autem magis risu dignum hoc peccatum est, quam illud alterum. Si enim alius medicus, aut etiam idiota ingressus cognoverit ea, quæ contigerunt, & edenda ac bibenda dederit ea, quæ alter prohibuit, palam auxilium tulisse putabitur. Talia vero faciunt, ut artifices maxime ab hominibus vituperentur. Videtur enim ipsis ille, qui ingressus est medicus, aut idiota, velut mortuum suscitasse. Scribentur autem de his quoque signa, ex quibus singula dignoscere oportet. Sed
signa

(a) tex. 22. de vic. acut.

signa hæc de quibus scribere spondiderat, in iis, quæ habemus, sive Hippocratis, sive Hippocratis nomine inscriptis libris, minime inveniuntur.

IV. Amatus Lusitanus (*a*) rem hanc, post Galenum, quem laudat, curavit. A pulsum micatione distingui posse ait, num vires ob dissolutionem, num vero ob oppressionem, scilicet, ob symptomatum vim, & morbi vehementiam, defecerint. Pulsus frequentes, parvi, ac languidi, dissolutas: confusi autem, qui aliquando funditus pereunt, aliquando intercidunt, aliquando sublevantur, attollunturque, oppressas, impeditasque significant. Quæ doctrina, quamvis vera esset; quod tamen ipse, neque negare, neque asserere ausim; ad rem nostram minime facit. Cum enim nos loquamur de dubiis casibus, raro, dum pulsus frequens, parvusque, languide quoque micat, res inter dubias versatur.

V. Si præscindamus a morbis, quos supra tetigimus, quorum natura, atque indoles viribus inimicissima, eas non modo impedire, sed consumere, & prosternere videtur; nullum certius signum de imbecillitate positiva haberi posse puto, quam si, aut causæ exhaustientes morbum præcesserint; aut in morbo ipso copiosiores, sive spontaneæ, sive petitæ evacuationes factæ fuerint. Signa a solo pulsu desumpta, omnino equivoca esse credo. Quicumque scit, quos lusus in acutis nobis ludant nervi male affecti, eum mecum facile in sententiam iturum in animum induco. Reor propterea Galenum, & qui hunc sequitur, Amatum, non jam ex iis, quæ apud egrotantes vide-

Runt,

(*a*) Centur. 2. in Schol. c. 8.

runt, positivę, & negativę imbecillitatis signa exscripsisse; sed ea potius in musęo, & ad pluteum, ex ratione adornasse. Aut ipse nunquam vidi egrotantes acute debiliores redditos a vi, & acumine morbi; aut, qui ob vim & morbi vehementiam debiliores apparent, eos non habent pulsus, quos, post Galenum, Recutitus Lusitanus nobis descripsit. Atque hæc de difficultate prima ab Hippocrate in textu recensita: nunc alteri, haud minoris momenti, animum advertite.

VI. Audivimus Hippocratem edocentem, majus malum fore non egentem copiosius cibare, quam egentem tenuius: quin in dubio casu, cibum potius minuendum, quam augendum; cum error ille minor sit, quo exhaustum parcius, rigidiusque alimus, quam, quo non exhaustum plenius, molliusque tractamus. Quid ex hisce vobis videtur, Lectissimi Adolescentes? Num Hippocrates, qui minus malum putat exhaustum viribus victu premere, tenuius, scilicet nutrire, quam plenius eum cibare, qui non ob vasorum evacuationem, sed ob vim morbi debilis est, plenioris victus amantior esse potuit, quemadmodum a plerisque contenditur scitis? Medicus in victu indulgentior, dummodo sibi constet, nunquam asserere poterit, minorem committi errorem, dum eger, qui cibo eget, eo defraudatur, quam dum copiosius aliquando alitur, qui cibi minus indigens est. Si namque universim, generatimque, præ tenuiore, cibis plenior commodior, utiliorque est; tunc præcipue commodior, utiliorque erit, cum cibo indigentior eger est. Dialectici etenim eam illationem valere docent, quę a dicto simpliciter ad dictum secundum quid deducitur.

VII. Sed super binis hisce erroribus , de quibus Hippocrates , nolim putetis , me in illius sola auctoritate conquiescere . Ratio quoque , & quidem satis obvia , cum dictatoris nostri auctoritate convenit . Error ille levior censendus est , qui facilius corrigi potest , quique minoris momenti damnum infert : porro error , quem committit medicus debilem ab exhaustu tenuius alendo , & facilioris correctionis , & levioris damni est , quam si peccet copiosius nutriendo , qui copiosiore alimonia non indiget : ergo primus error , præ secundo , minus gravis censendus est . Dicamus primum de damno , tum de correctione dicemus .

VIII. Si quis æger , aut in eo morbo , aut eo morbi tempore debilis ab exhaustu sit , quibus v. g. tota Ptisana convenit , Ptisanæ succo solummodo alatur ; damnum quod recipit in eo stat , ut vires non sustineantur , quemadmodum ei opus foret , non vero ut illi detrahantur , quas habet , quod in hoc casu , fane , mortiferum esset . Ponamus enim eum ad circuitum sanguinis commode perennandum , & ad morbum ferendum , octo gradibus virium opus habere ; illi autem quatuor tantum adesse . Si ipse parcitate cibi duos solummodo virium gradus adiicio ; haud quidem tantum addo , quantum necesse est ; sed ex eo , quod habet , non demo , neque eum materia supervacua onero . Hoc damnum leve profecto nequaquam est : quia vires vitæ minus , quam par esset , validæ , longiore solummodo spatio morbum , si poterunt , illiusque causam , subigere poterunt . Neque negandum morbum productionem factum , in virium defectione , graviori discrimini ægotantem subicere . At multo gravius ,

multoque celerius damnum est , quod consequitur a copiosiore , quam vires desiderant , morbusque permittit , cibo . Additur enim , ubi non addendum , aut forte demendum adhuc est : quo omnino facit illud Hippocraticum (*a*) *cibus sicuti sano robur , ita febricitanti morbus* . Supervacua igitur materia ingeritur . Ideo scitissime Galenus (*b*) . *Qui ob dolorem , vel morbi acumen parum valentem habent facultatem , vacuatione interdum magis , quam repletionem indigent . Immo qui cibum his exhibet , magnum affert detrimentum* . De evacuatione absolute non loquitur : ait , eam interdum necessariam esse : cibum autem absolute damnat : *qui cibum his exhibet magnum affert detrimentum* . Præterea , vel cibus datus bonas subjicit vires , vel tumultuosas solummodo , & irritamenta excitat . Si postremum : vel , me tacente , aperte videtis , id malum absolute esse . Si primum : vires nimias sufficit : motuum impetus , & momenta auget : materiem auferendam vehementius agit , & morbum acutiorem reddit . Si enim humor densior , crassiorque in morbi curationem extenuandus , fluxiliorque reddendus est ; & solidorum resistentia ; & nimia tensio laxari debent . Porro id obtineri non potest , nisi impetus , quo materies auferenda fertur , retundatur . Sed copiosior alimonia , aut valentior , si etiam in bonas convertatur vires , omnino contraria præstat : magnum ergo detrimentum affert . Magnum ratione morbi ea respicientis : maximum vero ratione morbi temporis , si copiosior alimonia ingeratur , dum coctio , aut crisis morboſi humoris expectari potest . Quæ enim in pericula ægros conjiciat , aut

(*a*) 7. aphor. 67.(*b*) Com. 2. de vict. acut. 48.

aut causæ morbi subactio , aut evacuatio impedita , notius est , quam ut dici mereatur . Præterea , nonne probabile est in tanta animalis œconomix perturbatione , ventriculum quoque male suo officio fungi ? Porro , si male coquit , mali succi gignuntur , qui sanguinis fluentum ingressi , tantum abest , ut bona virium materia fiant , ut morbum potius , & morbi causam geminaturi sint . Hæc de damno : nunc de correctione .

IX. Ut primus error corrigi facillime possit , video : ut alter , me prorsus latet . Si enim animadvertat medicus , ægrum suum uberiore alimonia indigere ; quid , quæso , facilius , quam ei tunc subvenire ? Et augere potest cibi quantitatem ; & sæpius ægrum alere ; & valentiolem quoque , si id ei opportunum videatur , nutrimenti materiam præstare . At , ubi nimium ingestum est , atque a cibo abundantiore morbi status pejor evasit , quid , rogo , in acuto morbo agendum ? Num abstinentia pugnandum est ? Id profecto optimum , tutissimumque foret , si morbus inducias daret . Ast , ubi res redacta sit ad Triarios , agendum , non cunctandum est . Vis igitur est adhibenda , atque vel per alvum , vel per cutem , vel per vomitum , vel per urinæ vias , quod copiosius ingestum est , educendum . Id autem , fusdeque habitis artis Regulis , atque ob eam solum rationem , qua in præcipiti periculo nihil interesse debet , an satis tutum præsidium sit , quod unicum est . Ex hisce quilibet noscere , & quidem facile , poterit , num facilius emendatu sit error , quem committimus parcius , quam æquum fuerat , debilem ab exhaustu nutrien-

triendo; an alter, quem patramus, iusto uberiores cibum ei, qui ob solam vim morbi debilis est, largiendo.

X. Post hæc videre potestis, quid sentiendum sit de usu jurium consumptorum, carniū contusarum, succorum e carne expressorum, & restaurantium, sine quibus, vix, quidam acute ægrotantibus medicinam faciunt. Quodque gravius est, iis utuntur, cum æger non positiva, sed negativa virium imbecillitate laborat; nempe, cum ob vim, acutiemque morbi debilis est. Quin, neque ab iis abstinent circa morbi vigorem; immo diebus iisdem, ab illis Criticis putatis, dum nempe salutes judicationes expectant, cibos eos ingerunt; cum tamen ex Hippocrate, deductisque ab eo viris, tunc cibus subtrahendus sit, quemadmodum audiistis; ne ingestus, naturam a coctione morborum humoris, & cocti expulsionem avertat. Hac de re si pauca subdidero, me haud temporis iacturam facturum puto.

XI. Perpetua observatio ab Hippocrate ad nos usque ducta (neque enim vetustiores Scriptores habemus, qui eam litteris consignaverint) nos docet, hac methodo naturam uti ad acutos morbos persanandos. Eos vincit morbosam materiem, quæ ægritudinis causa est, ab ægro corpore pellendo: eam vero minime pellit, nisi prius expulsionem dispositam, aptamque reddiderit. Hanc materiæ auferendæ dispositionem, coctionem, cum Hippocrate, dixerunt veteres; quemadmodum morbum crudum adhuc esse dicebant, priusquam per sua signa coctio de se significationem præberet. Quæ super hac coctione veteres disputarint, & dictum longum, & inutile foret. Sat vobis scire in præsentia

tia fuerit , eam aptitudinem in extrudenda materia , & elaborari , & elaborandam esse , eamdemque per sua signa Medico observanti significari . Hoc posito , quod alias jam diximus ; reliquas inter rationes , quas adducebant vetustiores Medici , ut , quantum fieri posset , acute ægrotantes tenuiter alerentur , ea erat , ne natura materiei morbosæ subigendæ , coquendæque intenta , alio , a cibo avocaretur , & ab incæpto opere distraheretur . Profecto modus iste loquendi , hodiernis plurimorum Physicorum auribus nequaquam bene sonat ; nihilominus res , quam verba illa tegunt , & vera , & Physica est . Ut id pateat , eam matronali , sed vetusta nimium stola , spoliemus . Audite , itaque , me eadem , ac veteres , sed alio fermone , ut illa facilius intelligatis , dicentem .

XII. Vires vitæ , motus scilicet , tum solidorum , tum fluidorum corporis viventis , dum a materia aliqua corpori inexistente pervertuntur , ad normam non rediguntur iterum , nisi ab iisdem motibus materia eos turbans pellatur . Pelli autem non potest , nisi per eorundem motuum vim eo redigatur , ut per loca , ante impervia , transire queat , quæ ei transmittendæ , atque extra corpus ferendæ sunt . (En decantata humorum coctio , & in quo consistat) . Mechanicum igitur est hoc virium vitæ opus , & , quoquomodo peragatur , mechanice peragitur . Quoniam igitur mechanicum est , & tempore opus habet , & data vi , ut dato tempore perficiatur ; prætereaque necesse est , ut ne vis illud perfectura , ab agendo in materiam elaborandam impediatur ; neve materies elaboranda , potentiæ eam elaboraturæ subtrahatur . Corpus

pus aliquod in pulverem conterendum ipse in , mortario tundo : tundo autem ea vi , & pistillo , ut horæ spatio illud in pulverem redigendum sit . Interim , me nequaquam animadvertente , ac ne cogitante quidem , amicus joco , & furtim , aliud consistens corpus mortario indit . Quid inde eventurum est ? Corpus , quod horæ spatio data vi , datoque pistillo conterendum erat , nonnisi , eadem vi , pistilloque eodem , spatio longiore conteretur . Eccur autem ? Quia novi corporis interjectu , actio , & vis pistilli in primum corpus imminuitur , proptereaque a vi conterente defenditur , eique subtrahitur ; ii etenim ictus , ictuumque gradus , quos novum corpus in se recipiendo consumit , alteri subtrahuntur . Vis vero percutiens , relate ad primum corpus , eo magis , minusve imminuta est , quo magis , aut minus corpus alterum furtim immissum , aut consistentia , aut mole , aut utrisque , momentum in corpus conterendum impedit , magisque , aut minus a vi percutiente illud subtrahit . Ipse inexpectatam resistantiam offendens , vi geminata in opus infurgo . Sed , quid inde ? a diuturno , & laboriosiore opere delassatus , pistillum pono , corpusque , conterendum , ruditer solummodo , & imperfecte comminutum , fecerniculoque nondum aptum , relinquo . Solidorum contractiones , fluidorum impulsus , materiem morbosam , aut alicubi in corpore stagnantem , aut sanguini fluenti confusam , data vi agunt , urgentque . Subtiliora , activiora , abstergentia , aquosiora fluida , data vi eam penetrare , diducere & solvere nituntur . Verbo : natura materiæ morbosæ coquendæ , datis viribus allaborat . Alimoniam interim , aut nimiam ,
aut

aut inopportune in venas immittit medicus. Ea tunc viribus, & actioni solidorum, fluidorumque subjicitur: partem illarum, eas in se recipiendo, consumit: sic potentiarum agentium momentum a materie morbosa avertit; atque prout alimonia crassior, aut copiosior, aut utrumque fuerit, vel prorsus non, vel vix, vetus vitiosa, & subigenda materies vires in eam agentes sentit. Verum res ultra procedit. Non modo a materie morbosa nequaquam subacta, sed ab alimonia quoque venas ingressa potentiae agentes irritantur magis, atque excitantur. Si cito iis resistentia non auferatur, illarum vires consumuntur, exhaustunturque; nisus etenim, & labor, quo operantur, eas frangit; morbusque, qui forte sanabilis erat, ægro imbecilliore reddito, cum ægri morte finitur. Observatio, & monitum est Hippocratis: *debili evadente corpore morbus invalescit. Cum autem morbus corpori prevaluerit, tale jam incurabiliter effectum est* (a). Ita cibus copiosior, aut tempore inopportuno exhibitus coctionem impedit, morbum protrahit, & quandoque vires, quas Medicus damnose sollicitus instaurare satagit, disperdit. Aliquoties mihi in Praxi observare contigit, idque in febribus continuis quidem, sed remittentibus; concessio ægris paululum copiosiore cibo, cum jam urinæ coctionis rudimenta exhibere cœperant, statim coctionis notas disparuisse, febremque prolixiorem, contra ac sperari, non sine ratione, poterat, factam fuisse. Ex huc usque dictis colligite, quod forte quibusdam Paradoxon videri poterit: si fieri posset, ut sine cibo necessariae ægrotanti vires

S

fusti-

(a) tex. 35. acut.

sustinerentur, & a sanguine nimia ficcitas, atque inde exorients acrimonia arceretur, eam, inter alias, tutiorem, celerioremq; futuram methodum acutas febres, morbosque sanandi, quæ ægrotantes in perfecta abstinencia contineret.

VI.

SEd jam ex me quæretis, ut in iis acute ægrotantibus, qui viribus exhausti ægrotant, quique non a morbo, neque ob symptomata, acumenque morbi, sed ob virium defectum imbecilliores sunt, victus ratio instituenda sit; ac quomodo ii tractandi, qui cibi parcitatem, ajunt, se ferre non posse. Opportunissime quæritis: primum etenim aliquando; sæpius alterum in Praxi occurrit. Priusquam tamen primæ quæstioni respondeam, historiam a Galeno relatam (*a*) paucis quam potero, vobis, enarrandam, excutendamque puto.

II. Juvenis viginti quinque annorum, gracilis, squalidus, ficcus, a causis exsiccantibus, atque exhaustibus continuam febrem contraxerat, quæ singulis diebus circa undecimam diei horam cum frigore recrudescibat. In febris decursu cutis arida ægrotanti erat. Diatritariis se se iste commiserat (Schola erat methodicorum, Romæ, Galeno ibi degente, florens, qui nisi tertio die, & quandoque non nisi exacto, ægris alimoniam porrigebant, ideo diatritarii, & diatriti Cultores dicti). Cum isti primis duobus diebus ægrum sine cibo reliquissent, tertii quoque diei accessio-

(*a*) 10. metho. c. 3.

cessionem sine alimonia transigendam esse censuerant. Digressis autem illis ab ægro, accessit Galenus, qui nactus hominem Hippocratica, ob debilitatem, facie turpem, timuit ne hæcticam, aut marasmm incurreret. Sorbitionem itaque illi, non ex hordeo, sed ex alica paratam dedit. Febris statuta hora accessit; atque cum pulsu admodum parvo, & raro, ita extremis artubus æger perfrixit, ut vix incalesceret. Quarta die, bis, eodem modo illum cibavit; quinta autem, non amplius sorbitione, sed alica integra ex aqua calente uti cepit. Usque ad undecimam ita ægrum aluit, clamantibus interim diatritariis, copiosius ægrum ac perverse nutriri; præsertim, quia paulo ante accessionem Galenus cibum ei dabat. Galenus, qui factio potius, quam verbis statuerat & diatritarios inscitiae errorisque arguere, & reliquis ostendere se probe egisse; cum antea actis diebus observasset ægri pulsum aliquanto firmiorem factum, licet debilis adhuc ille esset, extremisque partibus frigidus; ante accessionem undecimæ diei illi cibum minime dedit. Accessit febris, sed cum pulsus abolitione, ac totius corporis frigore; jamque æger nec loqui amplius poterat, nec impellentes sentiebat. Tunc convocatis diatritariis, cubiculoque, ne se se subducerent, ut re comperta, visoque ægro affectaverant; clave firmato; ostendit, quo in loco res ægri forent, quia eum ante accessionem, ut prægressis diebus, minime nutriverat. Eodem tempore & eos, & alios docere volens in ipsa accessione, imbecillitate urgente, ægros non modo posse, sed nutriri debere; diductis homini maxillis, ex oris angustioris vasculo ei infu-

dit cremoris Ptisanæ, non alicæ, cyathos tres, ac binos cyathos albi, tenuisque vini, calida modice diluti. Æger inde palpebras attollere, audire, loqui, & noscere adstantes cœpit. Postea ex vino eodem modo diluto, paululum panis ei comedendum dedit; sicque a mortis confinio revocatum, alica ut ante, cibare perrexit, donec decima septima die prope bene se haberet. Sed habetote etiam quantitatem Cremoris, & vini exhibiti. Cyathus, antiquis, erat mensura æquivalens quadraginta scriptulis, seu scrupulis, ut hodie dicimus; eoque ægrotanti tunc sorbendos dedit Galenus Cremoris scrupulos centum, plus viginti, nempe uncias quinque, & vini aliquanto plus, quam tres uncias.

III. Occasio hic se se offert, ut datam vobis fidem liberem, ac tandem de alica loquar, quemadmodum me facturum sub initiis dissertationis sponendi. Ex modo, quo Hippocrates, Celsusque de ea loquuntur, videtur esse non quid arte comparatum, sed quoddam frumenti genus; cum frumentaceis enim eam nominant. Ita Hippocrates secundo de diætâ textu septimo de panibus loquens: *similaginei omnium horum fortissimi sunt, & adhuc magis, qui ex alica fiunt*. Textu vero octavo: *similago, & alica cocta, fortia sunt, & alunt*. Celsus (a) grana inter frumentacea alicam ponit: *cumque panificia omnia firmissima sint, elota tamen quedam genera frumenti, ut alica, oryza, Ptisana, vel ex iisdem facta sorbitio &c.* Ita quoque Galenus: *alica est genus tritici* (b). Quid, quæso, apertius? alio tamen loco, ut mox, aliter se se explicat. Dioscorides (c) & Plinius (d) diversa docent: *alica fit ex Zea, quam*
dicoc-

(a) l. 2. c. 18. (b) l. de alim. fac. c. 3. (c) l. 2. c. 118. (d) H. N. l. 18. c. 11.

dicoccon appellavimus. Ita primus: alter vero, nedum ait alicam ex Zea fieri, sed modum quoque, quo ope cretæ fit, describit: illius diversa genera recenset: loca ubi optima conficitur laudat; ac de adulterina, ac quemadmodum adulteretur verba facit; omneque alicæ, sive genuinæ & perfectæ, sive arte vitiatæ opificium ita subtiliter prosequitur, ut de illa perfecte doctus videatur. Ait præterea, quod & supra dixerat, Zeam, unde alica, Semen simpliciter, ac si diceret, antonomastice, dici, eamque *Palnam frugum* vocat. Mirum tamen, Galenum Plinio recentiore, atque rerum naturalium æque avidum indagatorem, Romæque non paucis temporibus commoratum, cap. decimo secundo laudati libri satis longo, quod ferme totum tractatio de Zea occupat, de confectioe hac alicæ ex Zea, ne verbum quidem; quamvis inde clare colligatur, alicæ nomen, nequaquam peculiaris alicujus frugis esse; sed ita vocari granum esculentum, quod ex alio Cereali semine non ita vocato elaboratur, & fit. En ejus verba: *Sunt autem & alia permulta semina prædictis quidem adsimilia, non tamen eadem penitus specie, quæ partim in bordei, ac typhæ; partim in typhæ olyræque, aut^u olyræ & tritici medio sunt loco. Quædam vero ad olyræ; alia ad bordei, aut typhæ; alia ad tritici, ceu alia ad panici, alia milii naturam proxime accedunt, quæ nomina habent; alia simplicia, ut in Italia, ex quo alicam faciunt; alia composita, ut in Cappadocia, quod vocatur *Gymnocrithon*, idest, bordeum mundum. Si revera ex Zea alica fieret, nonne mirandum esset, Galenum ferme toto hoc capite de Zea agere: alicam ibi nominare: asserere eam ex semine quodam confi-*

confici, neque subdere, e Zea alicam fieri? Hæc per transennam dicere volui; non quia nostra plurimum scire interfit, quid fuerit famigeratum hoc antiquorum alimentum; sed ut obiter observetis, cum de naturali historia agitur, non pauca in veterum libris inveniri, quæ conjecturas nostras exercere utique possunt, certo autem determinari, & cognosci non possunt. Sat nobis sit scire, alicam fuisse Cerealem cibum, valentioris, præ hordeo, substantiæ: ex ea, succum, seu cremorem, ut ex hordeo, antiquos parare suevisse; ac methodicis, contra, ac dogmaticis, illam magis, quam hordeum in usu fuisse, quia putabant, falso tamen, Ptisanæ vim adstringendi esse; eoque acutis ægritudinibus, quas a solidorum stricture deducebant, Ptisanam alieniorem fore. Unum addam, putasse Plinium (a) Alicam Græcis vix in usu fuisse, eamque a Romanis inventam: *Alica res Romana est, & non pridem excogitata, alioquin, non Ptisanæ potius laudes scripsissent Græci.* Si vera sunt quæ Plinius habet, dicendum est, librum 2. de diætâ Hippocrati adscriptum, quem Hippocrate dignum putat Galenus (b) vel Plinii tempore nondum extitisse, eoque junioris alicujus opus fore; vel a Plinio lectum minime fuisse. Idem de libro *affectionum* dicite. Nunc ad Galeni historiam.

IV. Juvenis squalidus, exuccusque a causis exhaurentibus continua febre laboravit, quæ intra vigesimum finiebatur. Laboravit ergo morbo simpliciter acuto, cui, ex Hippocratis doctrina, saltem in principiis, & declinatione, tota Ptisana commodior erat.

Dixi

(a) H. N. l. 22. c. 25.

(b) l. 1. de aliment. c. 1.

(CXLIII.)

Dixi *in principiis*, & *declinatione*; quia, ut nostis, ex eodem magistro, in incremento, & vigore morbi, victus acute ægrotanti demendus est. At cum causæ exhaurientes febrem præcessissent, cumque æger omnimoda abstinentia per duos, cum dimidio, dies afflictus fuisset, atque Hippocratica facie imbecillitatem positivam præferret, quam non morbus, ejusque vis, sed antecedentes causæ, & perversum diatritariorum regimen induxissent; Ptisanam ei victum sufficientem nequaquam futurum Galenus putavit. Ex valentiore ergo alimonia cibus ægro parandus erat: Porro ex antiquorum sententia, hordeo alica valentior est. At tertio, & quarto die, ex iis, quæ Galenus in historia habet, febre vehementiore ægrum laborasse oportuit. Alica igitur integra alimonia æquo valentior illi erat. Sed cum quinta die febris remissior esset, ægerque imbecillior foret; alicam integram conducibilem existimavit; a quo victu obtinuit, ut pulsus firmiores evaderent. Propterea, præscindendo a die undecima, de qua infra, ea ægrum nutrire perrexit diem ad usque decimum septimum, quo, ut idemet Galenus ait, convalescentium victui ægrum admisit. Videtis, Galenum victum pleniorē ob exhaustas vires, & minorem morbi acutiem concessisse, sed tamen intra terminos victus e frugibus constituisse, qui animali cibo invalentior est. Vires deficientes, pleniorē utique cibum desiderabant; sed ex materia, quæ morbo acuto alienior non esset; non autem ex ea, quæ victum sanorum, & convalescentium constitueret. Cum igitur ægris, quorum vires debiliores ab exhaustu fuerint, medicinam vobis facere
conti-

contigerit ; & viribus , quæ victum pleniorē desiderant , & morbo quoque attendite , victuque pleniorē utamini , parum , & sæpe , ut cum senibus fit , offerendo ; sed intra aptæ materiæ terminos ; quos intra , tantum abest ut coerceantur jura valentiora , carnum expressi succi , carnes contusæ , restaurantia ; ut hæc sacram extra lineam longe , lateque vagentur .

V. Sed illud , quod undecima morbi die patravit Galenus , feriam animadversionem non modo poscit , sed flagitat . Ajo cum primis , tunc nequaquam probi viri munere Galenum functum fuisse . Quid ? Procurato ægrotantis summo labore , & discrimine , suam sententiam tutari honestus medicus poterit ? Id profecto inhumanum , iniquissimumque est . Neque valet responsum , quo se præmuniit Galenus : sibi , scilicet , prænotum fuisse , ægrum etiam sine cibo superfuturum . Conjectari enim poterat ægrum accessionem superaturum , certo autem noscere non poterat . Porro tenui , ut ita dicam , conjecturæ filo ægri vitam concedere in propriæ opinionis gratiam , viri est humanum corium vili admodum in pretio habentis . Quod si etiam , non conjectari , sed id certo præcognoscere potuisset : an nihili faciendum est , ægro , quem levare debemus , laborem , data opera , & morbum augere ? Num ægri pavor , adfidentium formido , num dolor , & animi domesticorum angustia , gerras inter , nugasque censendæ sunt ? Trabali clavo cordibus vestris , ne unquam inde excidat , Humanissimi Juvenes , figite ; medico , qui vir probus & esse , & haberi cupit , nunquam tanti suas opiniones esse faciendas , quanti ægrum .

VI. Animadvertatis insuper velim, præcepto Hippocratis de cibo in febrium, morborumque acutorum accessionibus non offerendo, quod unum est ex præcipuis in Praxi, atque firmioribus, aliquando non modo posse, sed derogari debere: adeo verum est Celsi monitum, Medicinam, scilicet, vix universalia præcepta recipere. Cum igitur *positiva* imbecillitas urget; cum prægressæ accessiones ostenderint, si-ve ex temperamento, si-ve qualibet ex alia causa, quæ perduret adhuc, id contigerit; ægrum, ni paulo ante accessionem nutriatur, in Lypothimiam, aut syn- copem, Paroxismo obtinente, labi, necessitati obe- diendum est; ac non solum accessione instante, sed etiam in accessione ipsa est nutriendus. Indicatio *vi- talem* quam dicimus, dum urgeat, inter reliquas præcipua semper habenda est; ni etenim extemplo ei satisfiat, tempus medicum deficere potest, quo alias adimpleat. Non modo ridiculum, sed vesanum foret, dum domus ardet, incendiarium persequi; aquam au- tem, & alia necessaria ad extinguendum ignem ne- quaquam expedire, & afferre.

VII. Ratione itaque, ac necessitate, quæ tunc sola operandi norma est, id exigente, atque exemplo Ga- leni, in ipsa accessione ægri aliquando nutriendi sunt. Hisce autem in casibus mihi videtur alteri Hippo- cratis animadversioni locum esse debere: *potentia ali- menti melior est, quam moles* (*a*). Pro potentia autem, nequaquam validiorem alentem substantiam intelligo, quæ virium labore opus habeat, ut in animale suc- cum mutetur; verum, quæ spiritibus, viribusque a-

T

mi-

micior , iis auxilio expeditissime itura sit . Juscula cum ovis recentibus , succoque Citriorum , Limonum , aut aceto ipso condita : spiritu essentiali melissæ , aut aqua cinnamomi spirituosiora reddita : odori , succulentique fructus : oryzæ , Ptisanæque Cremor syrupo rubi Idæi gratior redditus ; ac , quod vel solo odore ægrotantium vires erigit , vinum , panisque subtilissimæ torrefactæ offulæ ex eo madidæ , commodissima huic intentioni sunt . Ajebat Hippocrates (*a*) *quicumque veloci appositione opus habent , his humidum ad reficiendas vires medicamen optimum : quicumque vero velociore adhuc indigent , per olfactum .*

VIII. Quærebatis insuper , ut ii ex acute ægrotantibus tractandi sint , qui cibi parcitatem se ferre non posse ajunt . Querimonia hæc , neque ab iis , qui acutissimis , neque ab illis , qui acutioribus morbis laborant , audiri solet : isti fere cibos , aut respuunt , aut non expetunt . Frequentior ea est acutis simpliciter non admodum vehementibus afflictis , & febribus intermittentibus exercitis . Ut igitur a medico cibum extorqueant , se plus æquo debiliores esse lamentantur . Medicus tunc consideret , num revera querulo ægrotanti vires desint , num morbus , aut symptoma aliquod eum debilem faciat : vel , num forte putet se debilem esse , & tamen non sit . Si vera debilitas , & a virium defectu est , quam vel morbi antecedentes causæ , vel evacuationes , sive spontaneæ , sive arte quæsitæ fecerint ; ad acutiei gradum , morbique qualitatem respectu habito , aut copia cibi augenda , aut valentior offerendus , aut parum , & sæpius dandum .
Sin

(*a*) *ibid. tex. II.*

Sin vis , & acumen morbi , aut symptomatis vehementia ægro imbecillitatem ferat ; querimoniis aures ne præbeat Medicus , viamque , quam ingressus est , insistat . At casus est , cum ægri sibi debiles esse videntur , nec tamen sunt . Res ita se habet . Observavit Galenus (*a*) quod a me quoque aliquoties observatum est ; eos , quibus venter parvus , & gracilior est , ubi ventriculus sine cibo fuerit , pondus , & suspensionem viscerum sentire ; viscera vero non amplius pendula ab iis percipi , sed confirmari , ubi cibo ventriculus refectus fuerit . In ventriosis autem id minime contingere ; quia venter magnus , scilicet crassius omentum , & interjecta interaneis pinguitudo , viscera firmat , & stabilia retinet , quamvis cibo vacuus ventriculus fuerit . Ballonius quoque (*b*) adnotavit , quosdam squalida habitudine , & melancolicos (hisce profecto abdomen , neque magnum , neque succulentum est) postquam tulerunt unius alteriusve diei abstinentiam , existimare sua sibi pendere naturalia viscera . Ægri itaque hujusmodi , hunc suspensionis viscerum sensum , sensum imbecillitatis esse arbitrantur . At si arteriarum micationes æstimabitis ; si carniū calorem ; si oculos , qui , prout valuerint , ita ex Hippocrate (*c*) & corpus ; si vocem ; si musculares , quos edere possunt motus ; nullam gravioris imbecillitatis notam omnia hæc præferre percipietis . Valentiore alimento isti nequaquam indigent : egent tantum , ne ventriculus exinaniatur , & collabatur . Tunc , ut agebat Hippocrates (*d*) *moles alimenti melior* ,

T 2

(*a*) Com. 2. de vict. acut. 31.(*b*) l. 2. Consil. 16.(*c*) 6. Epid. sect. 4.(*d*) de alim. tex. 10.

lior, quam potentia. Facultas igitur alimentosa tunc minuat, ac moles alimenti augeatur, ut ventriculus diu extensus maneat, & molestus suspensionis sensus a visceribus avertatur. Id commodissime, nisi aliunde prohibeatur, usu olerum præstari posse mihi videtur. Cum exigui nutrimenti hæc sint, cumque illud exiguum voluminosiore mole comprehendatur; ea mihi esse videntur, quæ volumine ventriculum extendere, eumque extendendo, reliqua interanea firmare, & illorum suspensionem imbecillitatis sensu fallentem, aut prævenire, aut tollere: neque ex altera parte, aut copia, aut valore substantiæ; & viribus subigenti bus resistantiam; & coctioni impedimentum obicere valeant.

IX. Vos nunc mecum factum quoddam examini subicere posse reor, quod in quorundam Praxi haud raro occurrit. Quidam, cum ad acute ægrotantem accedunt, si forte is opipare, lauteque vixerit, & de sanguine illi mittendo agatur, præcipiunt, & quidem jure optimo, ut copiosius mittatur, quia, qui genio indulgent, sanguine, si cætera consentiant, & quidem vividior, abundare solent. Nihilominus, sive ante, sive post sanguinis missionem: aliquando, & ante, & post, juscula ex animalibus, nec sine ovo, forbenda præbent, pleniorque victus rationem præscribunt. Attendite, quæso, quid nunc mihi veniat in mentem. E vase, cui aqua inest, viginti, aut triginta aquæ uncias educere ipse in animo habeo. Antequam hanc mihi propositam quantitatem aquæ educam, selibram vasi infundo, tum aquam ad uncias triginta educo. Qui ad hunc modum me agere videt, me nequaquam
velle

velle vasis aquam triginta unciis minorem facere profecto afferet. Vel, si mavultis, triginta unciis aquæ eductis, sex, septemve uncias novæ aquæ vasi infundo, paucoque post tempore, iterum, totidem. Quid ludis, inquiet, qui me observat? Abi, fodes, equitatum cum pueris in arundine longa. Vis, non vis, deples, imples. Ex Homero, qui scite adeo naturam pinxit, facile mutabiles sunt mentes juniorum (*a*). Ad eundem modum operantur Medici, de quibus sermo est. Quasi ludendo, datam sanguinis quantitatem ægrotanti demere volunt, tum nolunt, atque ablatae partem non exiguam restituunt. Id joco nequaquam fit, respondet aliquis, sed serio, & summa cum ratione. Ita præcipiunt, ne ægro contra consuetudinem, qua copiosiore, & uberiore alimonia vasa implere solebat, eadem, & sanguinis missione, & tenuitate, ac parcitate alimenti nimium exhauriant. Ita ne? At, an satius non erat sanguinem minus copiose demere? Sed quæro: num differt evacuatio, quæ vena pertusa fit, ab ea, quam victus tenuior, vel abstinencia infert? Differt sane. Quam vena secta facit, acervatim, & spatio brevior fit: quam abstinencia, victusque tenuior, paulatim, & spatio longiore perficitur. Distinctionem probo. At si consuetudini parendum est, magna evacuatio, & confertim facienda non est, quia consueta paulatim ex Hippocrate mutanda sunt, eoque sanguinis missio copiosior minime instituenda, cum per eam statim ad insueta transitus fiat; victus autem tenuissimus, vel ipsamet totalis abstinencia imperanda, cum hæc paulatim evacuet. Res
igi-

igitur eo deducta est , ut vel dicendum sit , eos joculari ; vel dandum , solitam uberiores , lautamque alimoniam , in acutis , copiosiores sanguinis educationem non postulare ; vel velis , nolis inferendum , pleniores victum huic ægro post emissum sanguinem alienissimum esse .

X. Nescii vos nequaquam estis , me de omnibus honorificentissime loqui suevisse : clam vos non est , ut castigate in verbis me geram , ubi aliorum sententias minus probem , ab iisque discedam . At nunc , si quod mei muneris est : si profectus vester insuper habenda nequaquam sint ; quod sentio libere dicendum mihi est . Adeo Medici hujusmodi in ratiocinandi arte excellunt , ut ex uno , eodemque principio , non modo diversas , sed contrarias conclusiones proliciant . Ab una eademque consuetudine opipare vivendi , curandique cuticulam , modo magnam vasorum evacuationem , modo parvam præstandam concludunt : magnam , acervatimque factam , per venam sectam : parvam , per victus minus tenuem quam morbus ipse , & causa morbi poscunt , obtinendam . Sic idem sanguinis in quantitate vitium oppositas indicationes eis subjicit . Vos forte scire percupietis , unde hæc inter se pugnancia veniant , & qua , monstra isthæc in artem irrepant . Quod sentio accipite . Non exigua illorum pars , qui medicinæ se addicunt , ad eam accedunt necessariis disciplinis minime instructi . Putant rationalem hanc artem per se consistere , neque aliarum disciplinarum commercio , & necessitudine egere ; cum ea contra , e pluribus aliis facultatibus confletur , atque ex illarum unitate , ut ita dicam , emergat . Ideo fat illis est

est doctoris gradum suffuratos potius , quam adeptos fuisse , ut inde ad Clinicum aliquem accedant , ægros cum eo invisuri . Bona Praxeos femina Chiron expertus spargit ; at ager , cui ea concreduntur , nequaquam excultus , lætas , copiosasque segetes ferre non potest . Tempus studendi iis , quibus studuisse oportuerat , elapsum jam est . Tunc Scriptores Practici evolvendi , qui ea , quæ lectori defunt , supponunt , non docent . Proprio Marte , aliquo post tempore , ægrotantibus manus admovent . Tunc , modo tempus , modo voluntas , modo utrumque deest , iis navandi operam , quibus carent . Pharmacopœe , antidotaria , Lexica , quibus materies Medicinalis edocetur , adeunda necessario eis sunt , si ex solis saltem remediorum , morborumque titulis , medicaturi ; aut in dosibus remediorum ; aut in formulis concinnandis , & materia medica administranda falli nolint . Ita Praxim ingrediuntur , ita progrediuntur , ita in ea consenescent . Citharam , quam juvenes male pulsare cœperunt , male pulsare ad senectutem pergunt . Vos , Juvenes optimi , qui nondum e portu solvistis , a naufragis , quos e summo littore videre potestis , edocti , ne in altum , nisi commeatu , & necessariis armamentis navi probe munita , vos provehi sinatis . Dum tempus suppetit , illud Comici verissimum cogitate :

Feliciter ille sapit , qui periculo alieno sapit .

Summa Principis munificentia , quæcumque vobis ex usu , & necessaria esse possunt , hic , non jam vendibilia exponit , sed sine pretio sumenda abunde largitur . Ea vobis solícite comparetis , ne illa neglexisse , aliquando vos & poeniteat , & pigeat , & pudeat .

Hippocratis methodus, quemadmodum sub initiis dixi, ea erat, ut ægrotantes, quorum morbus acutissimus non esset, nec statim vigorem adipisceretur, neque circa quartum judicaretur; eo incipiente, aliquanto plenius aleret, ut ita sine periculo proiciendarum virium, dum in statu foret, & paulo antequam eo pertingeret, victum extenuare, & subtrahere posset, ne naturam a crisi tunc expectanda, avocaret. Nil magis, immo id unice inculcat Galenus; præcipue primo de Crisibus, ubi hac de re agit; quam ut Medicus futurum morbi statum prænosceret, ut inde alendi ægri rationem instituat, atque ita incipiente ægritudine se gerat, ut cum opus fuerit, in tempore cibus dematur. Vos forte admirabimini, si vobis dixero, nos hac methodo uti nequaquam posse. Ita est, Studiosissimi Juvenes: rei autem rationem paulo altius repetitam accipite.

II. Hippocratem, ad morbos acutos, paucissimis omnino remediis, iisdemque rarius usum fuisse, ex aphorismorum libris, atque ex historiis, primo, præcipue, & tertio Epidemicorum relatis apertissime constat. Quamvis veritas hæc ex aliis quoque Epidemicorum elucescat; eos libros laudare volui, qui, Galeno auctore, genuinum opus Hippocratis sunt. In acutis itaque morbis, aut totam, aut ferme totam curationem naturæ imperio, atque, ut ita dicam, manibus, relinquebat, cunctandoque potissimum, medebatur; quapropter illius Praxim ab Asclepiade perludi-

ludibrium, mortis meditationem vocatam fuisse accepimus. In eo igitur totus erat, ut viribus tantum naturæ medicatricis consuleret, ne ad Criseos opus langueret, neve intempestive, alimonia ægro exhibita, ab eodem opere distraheretur. Ob id etiam, si quid circa ægrum agendum videretur, ut id inchoante morbo præstaretur, præcepit. Ob id rarius, vel sub ipsis principiis morbi, nec nisi turgente, ut ille agebat, materia, purgantia danda esse docuit. Ob id circa venæ sectionem in acutis celebrandam tot adjuncta servanda tradidit, ut inferendum sit, vel hujusmodi auxilio rarius ad acutos morbos eum usum fuisse. Neque enim, ut sanguinem mitteret sat ei erat, si morbus acutus foret: vehemens insuper esse debebat; atque eo correpto, & ætatis flore, & firmis viribus gaudendum erat. Ita ille (a) *Verum in acutis morbis sanguinem detrahes, ubi morbus vehemens fuerit, quique ipsum habuerint in flore ætatis fuerint, & robur ipsis affuerit*. Cujusce præcepti rationem inquirere hujusce loci non est. Relate ad Catharsim, & venæ sectionem in acutis ab Hippocrate celebratam, diversa tradidit Galenus, & post eum Doctiss. Freind. At vos, si vultis, videre poteritis, quæ ante plures annos Freindio ipse reposuerim in Epistola Decadi mearum Observationum annexa: *De vera Hippocratis Doctrina circa venæ sectionem, & Catharsim in febris.*

III. Cum igitur morborum, natureque motus minus turbaret, facilius (rem tamen factu semper oppido difficillimam) morborum tempora, non modo noscere, sed præcognoscere poterat, eaque victus ra-

V

tio-

(a) tex. 35. acutor.

tione , quæ dato morbi temporì conveniret , uti , at-
 que illa prædisponere , quæ morbi vigori commodio-
 ra censeret . Sed cum hac medendi methodo in ho-
 dierna Praxi minime utamur , medicemurque agendo
 potius , quam cunctando , ut , si fieri possit , morbo-
 rum futura tempora præcidantur , quod , si non sem-
 per , aliquando respondet , id Galeno (*a*) quoque ob-
 servante ; fit ut tempora morbi plurimum turbentur .
 Quorum turbatorum cum præcognitio haberi non pos-
 sit ; neque possumus rationem victus ita instituere ,
 quemadmodum tempora hæc minime turbata , seseque
 ordine invicem excipientia , ex Hippocratis mente ,
 desiderarent . Videbitis , studiosi Juvenes , cum ad æ-
 grotantium lectulos accedetis , eos , modo a venæ se-
 ctione , modo a Catharsi instituta melius degere : Vos
 putabitis , morbo vires jam succisas fuisse , eumque ad
 declinationem vergere . Sed dubio procul (idque non
 ex libris , sed ex Praxi ipsa vobis assero) plurimum
 sæpius in iudicando fallimini . Continget enim , ut
 postridie , caput quemadmodum dicitur , iterum attol-
 lat ; quemque vos fractum ad inclinationem progredi
 putabatis , augeri adhuc , viresque acquirere mira-
 bimini . Quamvis ad hunc locum proprie non perti-
 neat , non possum , quin data occasione , huc vobis
 asseram utilissimum Clariss. Tozzi (*b*) monitum : *Cum*
nulla sit evacuatio tam mala , quæ saltem ipso eodem die
ægro contulisse non videatur , monendi sunt , qui statim ab
egestionibus quodammodo relevantibus certam infirmis salu-
tem pollicentur (nos dicemus : morbi remissionem sibi
 pollicentur) *ne tam faciles sint in ferendis huiusmodi*
 præ-

(*a*) De optim. sect. c. 47.(*b*) ad 2. aphor. 1.

præfagiis (hic nos : ne de morbi impetu fracto facile spem concipiant) *nisi de firmitate constiterit* . Evacuationes relevantes , quoquo modo eæ prolicitæ fuerint , tantum significant , jure , & loco factas fuisse ; cum quæ inopportune , & absque ratione fiunt , & ex Praxi , & ex Hippocratis documento , quod vobis notum ex aphorismis puto , neque conferant , neque ab ægris facile tolerentur . Tantum vero abest , ut spes de tota morbi summa , & læta judicia subjicere possint ; ut paucissimi sint , qui moriantur , absque eo quod mollitæ evacuationes aliquod , brevi tamen durans , levamentum minime tulerint . Sed ad institutum redeamus . Nos diversis morbi acuti temporibus Hippocraticum in morem cibum aptare minime possumus , quia turbata morbi tempora præcognoscere nequimus . Consilium igitur in arena capiemus ; pro utque morbus se se nobis manifestarit , speciei morbi convenientem victum administrare etiam , atque etiam studebimus . De Hippocratica , enim , victum in acutis constituendi methodo , eadem omnino dicere possumus , quæ Clariss. sui ævi Practicus Fernelius (a) de Asclepiadis methodo tradidit : *Sed hæc fuit olim eorum doctrina , qui purgantia , aliaque medicamina ex arte sustulerunt , omnem prorsus curationem uno victu moliti .*

IV. Verum enim vero hic nos , quasi per transennam , Quæstionem proponere , atque excutere possumus . Num , scilicet , Medicus omnino Hippocraticus , & cunctationi unice insistens , eoque neque morbum , neque naturam remediis turbans , quique hac de causa morbi tempora præcognoscere , quamvis , ut alias dixi ,

dixi, id semper difficillimum sit, possit, ex ratione agat in morbo non acutissimo, si ægrum, morbo incipiente, plenius alat, ut deinde circa morbi vigorem ei cibum detrahare possit, ne natura ab elaboranda, promovendaque Crisi revocetur. Videtis, me nunc contra Hippocratem quæstionem movere, sine quo, ut in iis, quæ ad Praxim, ipse ferme loqui erubescam, nemo vobis melius scire potest, qui ad me audiendum benigne adeo accedere consuevistis. Nihilominus cum tanti auctores nunquam ipse fecerim, quam veritatem, aut quæ veritas mihi videtur; hanc, etiam contra Magni Magistri auctoritatem, indagare audebo. Præterea, si Hippocraticam methodum Praxi, & factis non comprobamus; ea etenim nequaquam utimur; ecurr vetitum erit eandem verbis modeste, & debita cum reverentia excutere, & examinare? Rem autem conficiam non aliis principiis, neque rationibus, quam iis, quæ ab ipsomet Hippocrate deducuntur. Ut igitur facilior, breviorque Quæstionis resolutio sit, eam simplicioribus, brevioribusque terminis comprehendamus. Quæstio est: num Hippocratica principia nobis subjiciant, ut inchoantem non acutissimam ægritudinem pleniore victu; num vero tenuiore, ipsaque abstinentia tractemus.

V. Hippocraticum principium est (a) *incipientibus morbis, si quid tibi videtur movendum, move*. Ridiculum fane, quod a quibusdam e recentioribus ad hunc locum reponi video: scilicet, præcipere Hippocratem, motum augendum in principio, si forte lenior videatur. De quo enim motu loqueretur? Num de progressivo sangu-

(a) 29. aphor. 2.

guinis . ? At iste ei notus nequaquam erat , ut ut quidam , ex illius quibusdam verbis ab aliis sejunctis , contra sentiant . Num de fermentativo ? At Chemico sermone nondum suo tempore loqui coeperat . Forte de putrefactivo ? At ex Martiani (*a*) animadversione , nunquam docuit humores in febribus putrescere , quod fuit posteriorum Commentum ; sed fervere , incallescere , & exuri . An de motu , unde unde veniat , quo morbus movetur , & symptomata increfcunt ? At hoc profecto fuisset morbum fovere , immo augere , ac de acuto , acutiorem , & acutissimum facere . Præterea , hoc principio damnatam illorum Praxim probaremus , ac firmaremus , qua inchoantes morbos valentioribus alexipharmacis , ac sudoriferis volatilioribus , atque turbantibus urgent . Ibi cum primis de quolibet remedio loquitur , quod in morbi auxilium expediri possit , quæ fuit Clariss. Vallesii sententia : tum speciatim de evacuantibus , quod , & a Vallesio , & a reliquis interpretibus jure tenetur . Jure , inquam (*b*) cum alibi de purgatione acutis morbis administranda ajat , quod , si purgandum in iis sit , diligenti semper habita consideratione , id sub initiis solum moliendum sit . Igitur , si evacuandum , ex Hippocrate , inchoantibus solummodo acutis ægritudinibus , evacuandum est . At perpetuitas , quæ medicum rationalem deceat , in hoc sermone nequaquam est , deple purgando , eodemque tempore imple alendo . E contra autem in hisce debitus erit consensus : purgando depleas , neque alendo impleas . Ergo si inchoantibus acutis morbis vult evacuationem , velle

ple-

(*a*) sup. sect. 6. l. 6. Epid.(*b*) 24. aphor. 1. .)

pleniorē victum nequaquam debet. Tenuior victus, & abstinentia cum proposita evacuatione conspirat; quia licet abstinentia per se non evacuet; attamen dum ea adhibetur, naturaliter, quod corpori inest digeritur, & evacuatur. Abstinentiam ergo, generatim loquendo, inchoantibus morbis convenire exposito principio sequitur; eoque sub morbi initiis, nisi morbus ab evacuatione fuerit, ægro victum pleniorē alienissimum esse.

VI. Sed eadem de re pergamus adhuc ex Hippocraticis principiis philosophari. Cum corpora acute ægrotantia, quorum morbos inanitio non fecerit, auferenda materia scateant, morbosa scatent: ergo impura sunt. At ex Hippocrate (a) *impura corpora quanto magis nutries, tanto magis lædes*; corrumpitur etenim, quod non integro corpori infertur. Neque huc cum quibusdam putandum est, de ea impuritate eum loqui solummodo, qui medicis Cacochyliā est: scilicet de sola primarum viarum spurcitie. Si enim hoc verum foret, sequeretur, febrientem, cui repetita Catharsi ventriculus, atque intestina mundata sint, proptereaque non amplius Cacochyliā laboret, sine noxa, & quidem sanorum in morem nutriri posse. Loquitur ibi igitur de Cacochymia quoque, de impuritate scilicet intra venas, ob quam, quo magis impura sunt corpora, eo minus nutrienda sunt. At exordientibus morbis utraque impuritate magis impura sunt: neque enim tunc, aut per artem, aut per vim morbi neutri impuritati quicquam adhuc detractum est: ergo in principiis acutorum corpora minus nutrien-

trienda sunt, seu parciore, tenuioreque victu sunt alenda.

VII. Alterum principium Hippocraticum est (a) *Cibus sicuti sano robur, ita febricitanti morbus*. Ob id, non uero in loco Hippocrates præcipit, ne febricitans alatur, nisi ubi febris remiserit. Quoniam igitur cibus, absolute loquendo, febricitanti datus morbum auget; sequitur, eo plus morbum adaucturum, quo copiosior, pleniorve fuerit. Si igitur sub morbi initiis plenius alatur febricitans, morbus incipiens augebitur. At, vel ipsa Ambubajarum Collegia dicent, tunc nequaquam studendum morbo augendo, sed minuendo: cum non raro eveniat, ut morbi principis obsistens medicus, eum facilius domet, quam si illi occurrere tentet, postquam vires eundo acquisivit, juxta omnium ore tritum illud Sulmonensis Poetæ

Principiis obsta &c.

VIII. Ex hisce fluit, nihili omnino habendam esse rationem, quam pro pleniorre cibo, morbo incipiente, dando afferet Vir Hippocraticus. Scilicet, tunc copiosius ægrum alendum, ut, copiosioribus viribus naturæ subministratis, illa facultate satis instructa possit, dum circa morbi vigorem victus tenuandus est, contra morbum insurgere, pugnare, & crisi promota, eum vincere. Nempe, natura hæc formica est, haud ignara, neque incauta futuri, quæ, quibus opus non habet, reponit, opportuniori tempori, & necessitati reservans. Sed, misso joco, quis, amabo, putaverit, & vires salubres, & morbum mediis iisdem, cibo nempe & quidem pleniorre, augeri? Ita autem res

casu-

casura est, si cibus plenior, inchoante morbo datus vires sufficiat, quemadmodum dicitur; & cibus idem febricitanti datus, ex Hippocratico aphorismo morbum augeat. Sic vir Hippocraticus suo gladio jugulari posse mihi videtur.

IX. Ne putetis tamen, me primum fuisse, qui in hanc Hippocratis methodum animadvertere ausus sim. Et ante, & post Hippocratem alii fuere medici, qui eam non probarunt. Ex ipsomet Hippocrate (*a*) habemus, plures medicos aliter, atque aliter victum instituere acute ægrotantibus consuevisse. Ex Celso (*b*) plerique ex antiquis Asiaticis, Ægyptiisque medicis, sæpe quinto, sæpe sexto solummodo die cibum ægris exhibebant, quod cœli rationem fortasse in Asia, & Ægypto pati potuisse Celsus credidit. At de hisce nescimus, num solam diætam, num vero remedia quoque ad febres adhiberent: fuisse autem ex eodem Celso (*c*) constat, qui utrumque, & quidem in morbis non acutis, præstarent. Heraclides enim Tarentinus quartana laborantes, in septimum usque diem abstinentia macerabat, quamvis primis diebus alvum non modo solvisset, sed (utor eadem Celsi voce) duxisset. Ita & methodici, & venæ sectionem, & cucurbitulas ficas, scarificatasque, & clysmata, & frictiones, & unctiones, & cataplasmata acute ægrotantibus adhibebant, & eos, per primos ægritudinis dies, in abstinentia continere plerumque sueverant. Galeni tempore sub Thessalo duce, Romæ, Diatritarii isti vocabantur, quia, si Galeno fides habenda est, trium dierum spatio ægros omnes indiscriminatim jejunio mace-

(*a*) tex. 4. acutor.(*b*) l. 3. c. 4.(*c*) l. 3. c. 15.

macerabant . At hujusce rei idoneus testis C. Aurelianus , quia methodicus fuit , per duos solummodo dies , ait , eos a cibo dando abstinuisse ; & nomine diatriti , non solum trium dierum spatium intelligendum docet , sed ipsum tertium diem . Sed quidquid hac de re sit , certissimum est , contraria omnino ratione ab Hippocrate ægros suos acuto implicitos morbo aluisse , cum iste tunc plenior cibum , ii vero jejunium generatim præscriberent . Nihilominus , medicos hosce magna in æstimatione Romæ fuisse e Scriptoribus constat , & facillime colligi potest ex odio , & injuriis Galeni , qui quacumque oblata , immo arrepta occasione , contra eos invehitur , & debacchatur .

X. De Asclepiade autem , quid dicendum est ? Si etiam huic viro Gravissimi Scriptoris , Celsi , testimonia deforent ; quod sub persona Crassi testimonium de eo tulit magnus tum dicendi , tum intelligendi magister Cicero (*a*) satis foret , ut eum , non solum pro viro docto , sed pro nobilissimo medico haberemus . Ait ibi Crassus , se Asclepiade & Medico , & amico usum fuisse . Celso referente , iste medicamenta magna ex parte sustulit , & omnem prope medicinam ad victus rationem transtulit . Ex Scribonio autem Largo in Epistola ad Callistum , quamvis in Chronicis remedia adhiberet ; in acutis tamen ab iis fere abstinebat . Nihilominus in more habuit , contra ac Hippocrates faciendum docet , & primis morbi diebus ægros abstinentia premere , ex Celsi testimonio (*b*) & iis vires pluribus modis convellere . Et tamen Auctor iste , Ga-

X

leno

(*a*) de Orator. I.(*b*) l. 3. c. 4.

leno (*a*) referente , Hippocratis Scripta legerat , & super iis quoque commentatus fuerat .

XI. Nisi me omnia fallunt , ideo in tam diversas medendi vias Nobilissimi priscorum medicorum processere , quia Hippocrates putabat nobis inesse Facultatem quamdam , quam Naturam vocabat , cujus esset , ut omnibus nostris actionibus præsidere , ita & morbos regere , atque curare . Erat hæc Ens quodam doctum sine magistro , quod tamen ad opera sua peragenda viribus aliunde suffectis , quasi totidem instrumentis , egeret . Vires igitur illi sufficiendæ erant , & sufficiendæ alimento ; sed non eo tempore , quo plurimum laboris ei impenderet . Plurimum autem laborare putabatur in morbi vigore , quia Crisim , magnum hujusce Potentiæ opus , eo tempore solummodo moveri observatum fuerat . Oportebat igitur , tunc illi jam donatas , reservatasque vires fuisse : quoniam si tunc cum operi , plurimum , Præses Natura intenta erat , cibus virium materia illi largiretur , facile futurum fuisset , ut ab opere revocaretur . E contra vero , initium morbi , quo ex Hippocrate (*b*) omnia leniora , tempus opportunissimum erat eam viribus , plenioris alimenti ope , instruendi . Et tamen , ut mihi quidem videtur , facilius huic intelligenti Naturæ esse debuisset morbum contra inchoantem insurgere , eumque pusillum adhuc suffocare ; quam data opera finire , ut vires adolescendo adipisceretur , quasi vellet illum labore maximo , & ancipiti exitu , sed majore cum gloria vincere , & profligare . E contra vero Asclepiades minus metaphysicus , sed magis

mate-

(*a*) Com. 1. in Hippoc. Officinam .

(*b*) 30. aphor. 2.

materialista (ex iis , quæ ex Galeno , & Aureliano collegit eruditiss. Daniel Clericus (*a*) Asclepiadis sententia parum a Democritæa , & Epicuræa distabat) intelligentem Hippocratis Naturam irridebat: omnia per Physicam vim , & ex necessitate Physica fieri putabat ; atque a materia , motu , & molecularum figura contingere cuncta rebatur . Ex hisce necesse est inferre , & morbos , & morborum solutiones a vi mechanica solummodo deduxisse , atque existimasse , ut revera existimabat , tempore quidem morbos , ut solvi possent , egere ; illorum autem solutioni , & Crisi nequaquam datum tempus finitum fuisse ; sed ut citius , ferius , facilius , difficilior solverentur , & morbi indolem , & ægrotantis dispositionem , & solertiam præcipue , peritiamque medici præstare . Hinc fluit , eum nequaquam huic Naturæ circa morbi vigorem plurimum laboranti , vires in antecessum , plenius ægros sub initiis alendo , præparare debuisse ; sed potius curavisse , ne motus morbi , qui ægritudine crescente abnormes fieri solent , tales evaderent : quapropter cum id obtineatur , ægros , qui a proxime amissa valetudine viribus satis pollent , abstinencia macerando ; hac , qui ægrotare inciperent , exercebat .

XII. Quæ sane ei , qui Hippocratis Hypothesim de natura medente , & intelligente minime amplexetur , verisimilia admodum sunt . Quin vero proximiora facile illi putabuntur , qui Humani Corporis mechanifimum , quantum quidem hodie possit , intellexerit . Motus illi , quos nomine virium vitæ pulchre Boerhaavius complexus est , sunt Natura , quæ morbos cu-

a) H. M. P. 2 liv. 3. chap. 5.

rat : curat autem materiam , quæ illos exleges , inordinatosque reddiderat , expellendo . Expulsio hæc arte , & consilio a medico est adjuvanda . Nequaquam autem adjuvabitur , nisi medicus eos excitet ubi langueant , vel leniat , quod præsentis argumenti est , ubi excefferint . Ut leniantur , materia irritans potentias hosce motus edentes subducenda est , & nimius potentiarum vigor infringendus . Utrumque , præter alia auxilia , alimenti tenuitas , & abstinencia ipsa præstat . Cum autem , si quæ ratio nobis apparet , quidpiam vere dicet , facilius sit id obtinere dum motus illi nondum plurimum abnormes facti sunt , scilicet , sub morbi initiis , quam ubi excefferint , morbusque viguerit ; media , quæ id præstant , quæ inter est abstinencia , cibique tenuitas , id facilius præstabunt morbo inchoante , quam progresso , aut vigente . Ob hæc , ut fatendum est rectissime præcepisse Hippocratem ubi docuit , in principiis præcipue movendum esse , quo aphorismo quælibet evacuantia præsidia comprehenduntur ; ita (sit verbo venia) minus bene tradidisse dicendum , ubi sub initiis acute ægrotantes plenius alendos docuit . Si vos forte quæritis , unde hæc diversitas in Hippocraticis monitis , accipite . Primum præceptum est ab observatione , & ab observatione *immediate* deductum : alterum a solo ratiocinio , eoque ex Hypothesi Naturæ intelligentis , assidentis , atque curantis deducto . Si id vobis ostendere vellem , nimium fane ab instituto digrederer . Quod vobis tantum innui , si vos curiosius perpendere , & super eo aliquantulum meditari velitis , neque laboris vos poenitebit , neque falsum esse , quod vobis

bis dixi, invenietis. Vobis itaque ad acute ægrotantium lectulos accedentibus, cum Praxim vestro Marte exercere cœperitis, bina aurea Celsi monita (*a*) animo semper obversentur: Primum est: *initia morborum famem, sitimque desiderant, ipsi deinde morbi moderationem, ut neque aliud, quam expedit, neque ejus ipsius nimium sumatur*. Alterum vero est: *neque ulla res magis adjuvat laborantem, quam tempestiva abstinentia*. Eam autem inchoantibus, præcipue, acutis morbis tempestivam esse, aut demonstravi, aut certe demonstrare annisus sum.

• VIII.

UT ex instituta Dissertatione uberiores utilitatis fructum capere possitis, Lectissimi Adolescentes, quæ generatim disputavimus, prius acutis continuis febribus, tum Chronicis, atque intermittentibus aptare operæ pretium duco. Vobis repetito dixi, etiam Medico Hippocraticum in morem solummodo cunctanti, rem semper difficillimam fore futurum vigoris in morbo acuto tempus prænoscere. Præcognitioni obscurissimæ lumen dedisse videtur Hippocrates 12. aphorism. 1. ubi ait, morbos ipsos, anni tempora, circuituum successiva incrementa, tum quæ postea apparent, ægritudinum vigores, quos ibi constitutiones vocat, significare. At ipsa principiorum multiplicitas, quorum singula, si a postremo præscindatis, suas difficultates recipiunt, satis indicant, hanc Prænotationem factu difficillimam esse. Immortalis noster Sanctorius (*b*) ex eodem hoc loco, Quæstionem hanc

(*a*) l. 2. c. 16.

(*b*) ad 4. aphor. 1. Quæst. 18.

hanc agitavit: quomodo, scilicet, in principio morborum acutorum possit prævideri, qua die sit morbus terminaturus. Ait ibi, se nequaquam Auctores offendisse, qui de re tanti momenti scripserint, qua non intellecta (notate Sanctorii iudicium) omnino superflua redditur Hippocratis Doctrina de victu acutorum. Eam tamen colligi posse ait ex Historiis ægrotantium in libris Epidem. ab Hippocrate descriptis. Nobili ideo, & laudando ausu rem aggressus, eam se quoque peregisse putavit. Negandum non est, non pauca utilia ab eo ibi proferri: num vero acutorem, ut dicitur, tetigerit, medentum iudicio relinquam. Quod firmiter mihi videor asserere posse, est, eum in solutione Problematis, nequaquam animum advertisse ad methodum, qua suo tempore in cura acutorum utebantur, ab ea diversam, qua utebatur Hippocrates. Sed absque eo quod singillatim Sanctoriana examinem, satis fuerit attulisse, quæ super enuntiata difficultate Galenus protulit. Quamvis *primo libro de Crisibus* cap. 2. ajat, generosi medici esse, & Hippocratica arte digni, futurum morbi statum prævidere; nihilominus, & ex iis, quæ capite eodem supra dixerat, & ex aliis, quæ cap. 9. ejusdem libri subdit, apertissime constat, eum pro re difficillima habuisse, non jam antequam eæ adveniant, præcognoscere; sed noscere, dum actu contingunt, temporum mutationes acutorum morborum. Ita primo loco: *summi autem vigoris signum est permanentia in ipsis* (accessionibus, scilicet. Quid vero si febris accessiones non habeat, ut continuæ continentes, & homotonæ? Quid si habeat obscuras, & irregulares? Quid, si re-

peti-

petitis quotidie nequaquam Periodicis exacerbationibus, novos accessus simulet, atque mentiatur?) & *consistentia*. Tametsi frequenter in morbis nullum tale tempus sensibile reperiatur. Sed quartæ, si ita contigerit accessio, incrementi adhuc in se signa habens, quintam afferat inclinantem, summo videlicet morbi vigore velocis transitus, usque adeo factò, ut nec presentem ipsum quis dignoscere valeat, sed ad exquisitam ipsius dignotionem primo inclinationis tempore indigeat. Simile autem quid, & in ipsis morborum incrementis existat. Capite autem nono: sicut igitur non habetur exquisita principii cognitio, antequam incipiat ascensus; ita neque ascensus, antequam status invadat. Si veritatis vis hæc ab homine, cæteroquin Glorioso, & Thraſonico, extorsit: scilicet: si confitetur difficillime nosci posse morborum vices, dum actu fiunt; quanto difficilior erit easdem prænoscere, antequam fiant? Nihilominus non pauci Scriptores mutationes hæc se se invicem excipientes adeo affabre nobis pingunt, ut eas ex ipso Archetypo exscripsisse videantur. Ita (expertus autem loquor) juniorum mentes mire turbant, atque confundunt; quia cum Praxi respondere nequaquam videant, quæ adeo clara, atque ordinata ab illis describuntur; animos abjiciunt, putantque, haud quidem pluribus parasangis morborum inordinatos, obscurosque motus, ab ordine, & claritudine, quibus eos scriptores ornarunt, distare; sed se ad bene attenteque observandum ineptissimos esse. Cum hujusmodi Scriptores vobis legere contigerit; aut eos Praxi operam parum, & oscitanter dedisse colligite; vel non quæ viderint, sed, quæ commenti fuerint, adornasse, & stilo prosequutos fuisse.

II. Hisce positis, ne tempus futuri vigoris, & genus acuti morbi conjectantes forte fallamini, securissimum esse puto, ubi ad vehementem curandam febrem, ægritudine exordiente, accersiti fueritis, ut consideretis, tunc ægrotanti vires rarius exhaustas esse posse, cum adhuc ciborum nuperrimæ salutis tempore sumptorum portio, illius ventriculo, atque intestinis insit; quapropter absque ullo periculo, victu tenuissimo, vel etiam exquisite tenuissimo, jejunio nempe, premi potest. Hinc igitur victus regimen exordendum. Deinde, ubi morbi progressus de se minus obscuram significationem fecerit, cibi materiam eligite, atque ad virium statum attendentes, quæ ut profigari non debent, ita certo certius in quocumque acuti morbi genere convellendæ sunt; modo demite, modo, si vobis videbitur, addite, si etiam morbus in summo vigore fuerit. Si enim alienissimo accessio- nis tempore, vera, & positiva urgente imbecillitate, jure cibus dari potest; ecurr idem præstari non poterit in morbi vigore? Nolim igitur, ut a futurorum præcognitione, quæ vos facile decipere potest, indicationem sumatis, sed a cognitione præsentium: atque ita in arena consilium capiatis; ut, quæ futura sunt, haud quidem negligentes; quæ in præsens urgent, maxime consideretis. Celsi, viri gravissimi, monitum est (a) *Unum illud, & semper, & ubique servandum est, ut ægri vires subinde assidens medicus inspi- ciat, & quamdiu supererint, abstinentia pugnet: si imbecil- litatem vereri cœperit, cibo subveniat. Id enim ejus offi- cium est, ut ægrum neque supervacua materia oneret, ne- que imbecilliozem fame perdat. Verum audite quoque,*
quæ

quæ hisce subdat, ex iisque vos per vosmetipsos Corollaria, quæ duci possunt, deducite. *Ex his autem intelligi potest, ab uno medico non posse multos curari; eumque, si artifex est, idoneum esse, qui non multum ab ægro recedit.*

III. Quod si morbus ille fuerit, de cujus cito exitu, aut ab historia medica, aut ex consimilibus visis casibus, ut in constitutionibus Epidemicis, comonefacti jam sitis; contra eum fidentius abstinentia pugnate. Tales sunt: Apoplexia fortis: Angina, aut sine tumore suffocans, aut tumore fauces elidens: Iliaca passio: Cardialgia: Colica gravior, qui, aut morte cito finire debent, aut sanari, aut mitescere. In hisce, nequaquam de ægro nutriendo solliciti sitis, nisi morbus saltem remiserit. Risum quondam tenere vix poteram, videns medicum prope desperabundum, quia Apoplecticum jam stertentem, quique postridie obiit, nutrire non posset. Sæviere, non multis ab hinc annis, Pectoris inflammationes, quæ circa primum quaternarium ægros occidebant. Vidimus nihilominus Medicos eandem victus rationem iis administrare, quæ productioribus Pleuritidibus adhiberi solet. Forte quidam ex iis ægris servati fuissent, si citissimo morbi exitu animadverso, intra potiones tantum detenti fuissent.

IV. Sed de Chronicis quoque, atque intermittentibus febribus, positis semper inhærendo principiis, aliqua dicenda sunt. Ut reliquis, qui veteraverunt, morbis, ita Chronicis quoque febribus, victum relate ad ægrotantes plenum convenire; ipsi rigidissimi veteres tradidere. Nulla igitur hic difficultas. Reve-

ra ante corticis usum, intermittentes, jure omni, longis morbis accensendæ erant. At postquam Divinus, prope dixerim, cortex, singulari Numinis favore Europæ innotuit; & brevibus, & longis morbis addi eas posse puto. Illarum recidivi recursus aliquando longioribus spatiis ægros exercent: ideo febres longæ dici merentur. Sed quilibet recursus iterum sumpto cortice brevi fere compescitur: hinc non sine ratione breves dici possunt. Ita auxilium hoc, quod non paucos Medicinæ Canones pessumdedit, ut uno eodemque tempore variam intermittentes sortirentur naturam, effecit. Hisce itaque febribus per triginta & amplius annos, variisque in locis, aliquo ad ætatum diversitatem respectu habito, minimo autem ad anni tempus, ad regiones, ad consuetudinem, ita non infeliciter victum administrare ipse suevi. Cum cibus ex Hippocrate, morbus febricitanti sit, febris die, prout febris vis, & vehementia esset, aut in tenui, aut in tenuissimo victu ægros continui. Die integro, donec febris devicta esset, vel ad plenum inclinavi, vel tenuem exhibui. Febri autem non multis diebus, ut per corticem fieri solet, fugata, ægrum victui convalescentium sensim admisi; ex Hippocrate etenim, *quæ longo tempore extenuata sunt corpora, longo reficere oportet, quæ vero brevi, breviter* (a). Si vero febris quartana foret, biduique intervallum daret, die, qua æger pessimus erat, eodem modo victum, ac in tertianis instituere suevi; diebus autem integris, pleno victu ægros alui. Meam methodum vobis in exemplum propono, non ut eam ad amissim servare debea-

(a) 7. aphor. 2.

debeatis; sed ut colligatis modum, quo victu demere, & vires impellentes infringere, & facultatem; ne labascant sustinere, in intermittentibus soleam. Cum febres istæ, nisi perniciosarum indolem susceperint, in iis, qui senio confecti non sunt, fere sine periculo esse soleant; medici indulgentia levi tantum damno, & facile reparando esse potest.

V. Vos autem reponetis, rem ita bene habere iis in intermittentibus, quæ alternis, aut quarto quoque die invadentes, inter Paroxysmos, aut unum, aut binos dies integros relinquunt; at quæ singulo die redeunt, ut quotidianæ intermittentes: aut ferme ad apyrexiam remittentes; vel, si mavultis, duplices tertianæ intermittentes, vel remittentes: cum in hisce nulla dies integra pleno victui, ex mea sententia locum relinquat, quam victus rationem desiderant? Vel de iis absque febrifugo curandis agitur, atque ad Calendas, pene dixerim, Græcas, illarum sanatio expectanda: vel, nunquam satis laudato Peruviano cortice, illis occurritur. Si primæ tædii plena methodo & vestram, & ægri patientiam, non sine maiorum consequentium periculo, exercere velitis, dubium nequaquam est, quin febre paululum deservescente æger victu premi non debeat, sed eo, qui relate ad ægrotantes plenus est, ali. Ita enim virium custodia, non modo poscit, sed flagitat, licet inde morbus pertinacior evasurus sit. At si cortex in auxilium expeditur; cum ab eo febris cito profliganda, vel saltem domanda sit, eoque æger cito convalescentium diætæ reddendus; ecquis, cui mea principia probentur, non videat, tutissimum esse tenuem, &

tenuissimam quoque, si vehementior febris fuerit, victus rationem adhibere? Quod si in febrium recidivis, quemadmodum supra posui, ita agendum est; multo magis prima vice, qua homines adoriuntur, & cortice iis medicina fit, idem præstandum. Animadvertite, me diversas victus rationes ad rigidiorum veterum normam nequaquam exigere, sed eas, ut loco proposui, minus rigide dimetiri.

VI. Reliquum mihi modo est ad dissertationem hanc absolvendam, ut promissis stem: ut ei, nempe, difficultati occurram, quæ erat: si quæ disputasti omnia parciorum victum in acutis exposcunt, eodemque tempore, & jura consumata, & carniū succos, & contusas carnes, & restaurantia rejiciunt, reprobantque; ecurr ab horum non infrequenti usu, mali effectus frequentius non visuntur, & adnotantur? Favete auribus, quæso, Studiosi Juvenes. Superiore seculo ea Praxis obtinebat, ut Periodicis febribus exerciti siti pene conficerentur. Altera item Praxis communis erat, ut, nisi purgato corpore, vel tantillum Opii ægris daretur. Quot, quæso, non putatis malos effectus, & gravissima, difficulterque toleranda symptomata, quæ morbos graviores redderent, ab iis medendi rationibus miseris ægrotantibus non contigisse? Ex hodiernis Medentibus vix fore reor, qui id sit inficias iturus. Sed quid medentes dico? Quilibet non rudi ingenio, qui commoda ex Praxi hodierna aut expertus fuerit, aut observarit, animo concipere poterit, quam ab ariditate, & siti pati debuerint miselli febrientes; quantumque dolorum, vigiliarum, spasticorumque motuum ab ægrotantibus ferendum esset,

set, dum contra ac Hippocrates facere fuerat; quamvis minus securis paregoricis uteretur; ac contra hodiernum usum, levamentum illis non adhibebatur, nisi & corpus prius purgaretur, & sanguis emmitteretur, & alia inutilia remedia inutiliter exhiberentur. Num ideo remini, vel ab adfidentibus, vel a medentibus, mala quæ observabant symptomata, iis noxiis medendi methodis attributa fuisse? Tantum abfuit, ut eæ medendi viæ reprobatæ fuerint, ab iisque egrotantium graviora supervenientia incommoda deducta sint, ut iis mordicus tenendis totis viribus certatum sit; nec, nisi per summas contentiones, ac continua feliciū experimentorum serie a posterioribus tandem evictum, & febrientibus; vel ipsius frigide, postquam eger incaluit, generosiores haustus utilissimos commodissimosque fore; & non minus purgato, quam impurgato corpore, opium, quasi præsens Divinum auxilium, dolentibus, vigilantibus, convulsis opem tutissimam ferre. Cur autem veritas hæc adeo luculenta in oculos medicorum, & adfidentium non incurbat? Quia cum utrique animum induxissent, ita agendum esse, easque methodos unice probandas fore; mala inde exorta, quæ consequiebantur, vi, & naturæ morbi tribuebant.

VII. Sæculo eodem Chemicorum, & præcipue Helmontianorum schola plurimum floruit. Cum enim isti validioribus remediis præ Galenistis uterentur: opium frequentius adhiberent; ac pharmaca minus ingrata, & nauseosa offerrent; atque omnia similitudinibus a furnis, Chemicisque operationibus petitis, quæ præ Galenistarum Theoriis captu faciliores erant,

rant , ornarent ; non exiguam hominum manum in sui favorem pellexere , immo traxere . Quæ mala , quæso , non obvenisse , acute febrientibus putandum non est , & a venæ sectione quam execrabantur , ommissa ; & ab exagitantibus validioribus , sudoriferisque , quibus initia quoque acutorum morborum urgebant ? Remini forte illa , vel ab ægrotantibus , vel ab adsidentibus , vel a medicis iisdem , temerariæ illi medendi methodo tributa fuisse ? Minime gentium . Eam præ Galenistarum methodo valentiolem , salubrioremque putabant ; eoque pravorum inde exorientium effectuum , non infida remedia , neque alieniores medendi vias , sed morbi perversam , maleque moratam indolem causabantur .

VIII. Sed quid vetera memoro ? Nonne reperiuntur adhuc Medici , qui totius exultæ Europæ Scholis , & experientia reclamante , Peruvianum Corticem exhibere febrientibus renuunt , nisi prius alvus deterfa , & sanguis emissus fuerit ? Cum deinde febris , & vires assumpsit , & capiti minitatur , & perniciosum characterem indepta est ; si forte a prima corticis uncia domita non fuerit , obtendentes febrifugum minime respondere , ab eo uberius exhibendo abstinent ; quapropter æger , vel ad plures cito migrat , vel non evadit , nisi longiore tempore , maximisque exantlatis periculis . Putatis forte eos animadvertere , unde mala ista veniant ? Adeo id non animadvertunt , ut errorem eundem iterato , & sæpius , & tempore eodem errare non desinant . Ea est præjudiciorum , quibus imbuti vivere volunt , vis , ut non auctoritas Scriptorum , quos tamen non legunt , non ratio ,

ratio, non aliorum observata, atque experientia illis oculos tandem aperire valeant. Ita quoque usu venit circa usum ciborum, quos reprobo. Nunquam, vel minima suspicio medentes, qui eos amant, incessit, eos acute ægrotantibus noxie adhiberi: adsidentes, maximeque mulieres, quæ imbecillitatem præ morbo timent, non modo non suspicantur ea noxia esse posse, sed utilissima, & apprime necessaria censent. Licetque sub illorum usu, modo capitis dolores & deliria ingravescant; modo calor, anxietasque intendantur; modo obstipetur venter, aut nimium fluat; modo æger nauseet, ac ne jurium quidem odorem sentire possit; semper autem morbi protrahantur, longiusque excurrant; non in malam victus rationem, sed in difficilioris morbi indolem omnia refundunt. Ægri interim non ab exhaustu, sed ob vim, & morbi acumen imbecilli languent: illæ autem desperabundæ (quæ scilicet inferioris sortis sunt) Deos hominesque testantur, se culinæ sumptibus nequaquam parcere: convenientibus mulierculis ollulas, quibus restricta jura ebulliere ostendunt: quot pullos ad ossium teneritudinem decoxerint, numerant: quantam restaurantis vim a monialibus confecti æger consumpserit, significant: & nihilominus ægrum imbecillimum languere quærulæ clamant. Ut, quæso, capita alte adeo præjudiciis imbuta noscere queant, num adversa, quæ ægris obveniunt, a perverso victus regimine pendeant? Quamvis itaque ea & a medicis, & ab aliis visantur sæpe nimium, non observantur tamen: neque etenim omnia, quæ oculis usurpantur, observatione quoque comprehenduntur. Quicumque qui o-

culos

culos habet, iisque utitur, videt, si vult, Solis, Lunæque Eclipses, & exorientia, atque occidentia astra; at exiguus tantummodo Astronomorum numerus eadem observat.

IX. Inutilitatem, incommoda, pravitatem alicujus methodi, præ quibuscumque aliis examinibus, in aperta luce ponit illius cum altera comparatio. Utriusque vos, dum medicinam facietis, caute, prudenterque experimenta capite: tunc vobis liberum relinquo, qua via in victus ratione febrientibus administranda procedendum sit, eligere. Ipse nullus dubito, quin ea progressuri sitis, quam Hippocratis, & reliquorum Græcæ Medicinæ Procerum exempla nobis aperuerunt: quam boni Itali, quam præclari Angli, quam e Gallia præstantissimi institerunt: quam denique, non Hypotheses, ingeniique commenta, sed natura ipsa, ac ratio ab observatis immediate deducta, veram, securioremque esse demonstrarunt. Neque vos exempla, ac numerus eorum, qui aliter sentiunt, aguntque, facile decipiat; etenim firmiter tenendum est, ut in reliquis, quæ opinione solummodo continentur, ita & in Medicina, argumentum pessimi turbam esse.

F I N I S.



